

## **Barɲanii nba ki MATIU din sɔb nae na**

*Ki jiin Mati u gbour na po*

Yennu maan nba ki Mati u sɔb na want barɲanii e nan Yiisa-e tee tinntɔɔ nba ki Yennu din senn mɔsonn ki jiin u po na. U niɲe ki Yennu gbeen mɔsonn nba ki u din tur u niib gbounkperuk ni na. Barɲanii na ki tee Juu teeb nba ki bi din mar Yiisa, ki u bia kpaat bi sinsuuk ni na kuukɔɔ yar kaa, ɲaan li tee durinya kur yare.

*Ki jiin Yiisa yeejamm po*

*(Luk 3.23-38)*

<sup>1</sup> Yiisa Masia yeejamm piinue na: u din tee Defid yaaboonne, ki Defid mun tee Abraham yaaboonn.

<sup>2</sup> Abraham din mar Aisak, ki Aisak mar Jakob, ki Jakob mun mar Juda nan u waarii.

<sup>3</sup> Juda din mar Peres nan Sera, ki bi naa tee Tamar;

ki Peres din mar Hesronn, ki Hesronn mar Ram.

<sup>4</sup> Ram din mar Aminadab, ki Aminadab mar Nasonn,

ki Nasonn mun mar Salmonn.

<sup>5</sup> Salmonn din mar Boas, wunba naa din tee Rahab na;

ki Boas mar Obed, wunba naa din tee Ruf na; ki Obed mun mar Jese.

- 6 Jese din mar Kpanbar Defid; ki Defid mun mar Solomonn,  
ki u naa din tee Yuria pakɔɔk.
- 7 Solomonn din mar Rehoboam, ki Rehoboam mar Abia,  
ki Abia mun mar Asa.
- 8 Asa din mar Jehosafat, ki Jehosafat mar Joram,  
ki Joram mun mar Yusia.
- 9 Yusia din mar Jotam, ki Jotam mar Ahas,  
ki Ahas mun mar Hesehia.
- 10 Hesehia din mar Manase, ki Manase mar Amonn,  
ki Amonn mun mar Josaya,
- 11 ki Josaya mar Jekonaya nan u waarii,  
baa din soor Israel teeb ki saan namm Babilonn yoo nba na.
- 12 Baa din soorib ki saan namm Babilonn na poorpo,  
ki Jekonaya mar Salatiel, ki Salatiel mun mar Serubabel.
- 13 Serubabel din mar Abiud, ki Abiud mar Elayakim,  
ki Elayakim mun mar Asor.
- 14 Asor din mar Sadok, ki Sadok mar Akim,  
ki Akim mun mar Eliud.
- 15 Eliud din mar Eleasar, ki Eleasar mar Matann  
ki Matann mun mar Jakɔb.
- 16 Jakɔb din mar Joosef, ki Joosef mun tee Meeri sɔrɔ,  
ki Meeri mar Yiisa nba ki bi yiu Yennu Ni-ganntɔɔ Masia na.
- 17 Laa din nyii Abraham yoo ki tan tuu Defid yoo din tee yeejamm piik nan bannae. Ki Defid

yoo ki tan tuu yoo nba ki bi din soor niib maŋ ki saan namm Babilonn na, din tee yeejamm piik nan banna. Laa din nyii li yoo ki tan tuu Masia maaru yoo, mun din tee yeejamm piik nan bannae.

*Baa mar Yiisa Masia bianjinba*  
(Luk 2.1-7)

<sup>18</sup> Baa din mar Yiisa Masia bianjinbae na: u naa Meeri din tee Joosef sarkpeŋe, ki bi daa ki koon leeb, ŋaan ki bi din tan la ki u mək poor. Yennu Seyeen paŋ nie ki u soor poor maŋ. <sup>19</sup> Joosef nba ki u din yaa wun kunɔ na din tee Yennu nipeemɔe. Li paak, u din ki loon wun nyinnir paanu ki lin dinn Meeri fei, ŋaan u din lor u par nie nan u ji kan koonɔ. <sup>20</sup> Waa ji din dukii linba na po nae, ki Yennu malaka baar u boor, damiit ni, ki tan betɔ a “Fin Joosef nba tee Defid yaaboonn na, daa yêen a sarkpeŋ Meeri koonu, kimaan waa mək poor nba na, Yennu Seyeen paŋe te ki u soor poor maŋ. <sup>21</sup> U tan saa mar bonjake, ki a saa purɔ Yiisa,\* kimaan u tan saa nyinn u niib bi biit ni.”

<sup>22</sup> Linba na kur din tun, a lin gbeen linba ki Yennu din te ki u səkiniisɔɔ pak li po nae a, <sup>23</sup> “Sapaanmunn tan saa soor poor ki mar bonjak, ki bi saa purɔ Imanuel.” Li paak tee a “Yennu be nant.”

<sup>24</sup> Joosef nba din tan fiir gɔon ni yoo nba, ki u tun nan Yennu malaka na nba betɔ bianjinba na, ki ji sak ki gaar u sarkpeŋ Meeri, <sup>25</sup> ŋaan u

---

\* **1:21** 1.21 Yiisa paak tee “Yennu tint.”

din ki koono nan waa din tan mar u sapaanmar, bonjak na. Ki Joosef pur u sann Yiisa.

## 2

### *Bannteeb nba din nyii yondopo na labaar*

<sup>1</sup> Bi din mar Yiisa Betlehem doo nie, ki li be Judea yent ni. Bi din maro Bat Herod yooe. Li yoo na ki banntesiab nyii yondopo ki baar Jerusalem ki tan boi niib a <sup>2</sup> “Juu teeb\* kpanbar saakoo nba ki bi maro na, u be lee? Ti daan la u nmaabire yondopo ki baar a ti tan jianto.” <sup>3</sup> Bat Herod nba din gbat nna man, ki li biir noo nan Jerusalem teeb kur para, ki bi ji ki fit kari. <sup>4</sup> Ki u yiin mannteeb yudamm nan sennu wantteeb ki tan boib a “Lee ki bi saa mar Yennu Niganntoo Masia na?”

<sup>5</sup> Ki bi jiino a “Betlehem, doo nba be Judea yent ni na; kimaan Yennu sokinii na din sob ki yaa Yennu yet a:

<sup>6</sup> ‘Fin Betlehem nba be Juda yent ni na, a ki tee tinbik kaa Juda yiar ni, kimaan batsoo tan saa nyi a nie, ki nooe tan sii yen n niib Israel† teeb.’ ”

<sup>7</sup> Linba na poorpoe ki Bat Herod yiin bannteeb man woonin ni, ki tan boib, ki fiitib fanu a wun bann yoo nba ki nmaabir na daan nyii; <sup>8</sup> ki yetib a, “Ii saa man Betlehem ki saa lon bik man fanu; yoo nba ki i lau, yin jenna ki tan betin ki n mun saan ki jianto.” <sup>9-10</sup> Bat na nba din pak nna ki gbenn yoo nba, ki bi nyii soor sonu; baa saa man,

---

\* **2:2** 2.2 Israel teeb sanleere tee Juu teeb. † **2:6** 2.6 Juu teeb sanleere tee Israel teeb.

ki bi la n̄maabir nba daan nyii yondopo na. Baa la n̄maabir maŋ na ki bi para penn bonchiann. Ki li gar bi t̄onn, ki saan set bik maŋ nba be n̄aak nba ni na, sanpaapo. <sup>11</sup> Ki bi k̄oo n̄aak maŋ ni, ki la bik na nan u naa Meeri; n̄anne ki bi gbaan ki jiant bik maŋ, n̄aan biit bi paka ki nyinn piinii ki turo; piinii maŋ din tee salima nan tulaarii nba ki bi yir frankinsens nan tulaarleer nba ki bi yir mir.

<sup>12</sup> T̄on, ki Yennu pak ki turib damiit ni, a bi ji daa n̄mat Bat Herod boor; li paak, ki bi ji din t̄okin s̄onjogaun ki n̄mat kun bi doo ni.

### *Joosef nba din chiar saan Ijpt bianjinba*

<sup>13</sup> Bannteeb na nba din kun na poorpoe ki Yennu malaka baar Joosef boor damiit ni, ki beto a “Fiit ki jii sanpantik maŋ nan u naa kii tiin kii saa Ijpt tingboun ni, ki saa kar lej nan yoo nba ki n tan saa tura m̄ob, kimaan Bat Herod saa lon bik na boore a wun kpiu.”

<sup>14</sup> Ki u din fiir nyiōk ki jii bik na nan u naa ki chiar saan namm Ijpt tingboun ni. <sup>15</sup> U din be leje nan yoo nba ki Bat Herod tan kpo. Linba na kur din tun ki gbeen linba ki Yennu te ki u sokiniis̄oo pak li po nae a “N din yiin n bija maŋ ki u nyii Ijpt tingboun nie.”

### *Bonjabis kpinu labaar*

<sup>16</sup> Herod nba din tan bann nan bannteeb maŋ kparoe na, ki li gbato bonchiann, ki u tun kunkonkonna a bin saan Betlehem nan li digbanbis ni ki saa kpi bonjabis kur; ki bi kpii sanpantii nan binba tee bina n̄anlelee, nan waa

daan boi bannteeb maŋ ki bann yoo nba ki ŋmaabir na nyii na.

<sup>17</sup> Waa kp̄ii waas na bianjinba na ki li din gbeen linba ki Yennu s̄okinii Jeremaya din pak na a:

<sup>18</sup> “Fuur fu Rama doo ni,  
 fuur nba tee kp̄em̄onii nan fabinii,  
 ki Rachel m̄o u waas paak,  
 ki bi barim̄o ki tan goo, kimaan u waas kpowa.”

*Joosef nba jen nan Yüisa nan u naa bianjinba*

<sup>19</sup> T̄on, ki Bat Herod tan kpo; ki u kuun poorpo ki Yennu malaka bia saan Joosef boor damiit ni, Ij̄ipt tingboun̄ ni, <sup>20</sup> ki yet̄o a, “Fiit ki j̄ii bik maŋ nan u naa, ki ŋmat saan Israel‡ tingboun̄ ni, kimaan binba din lor a bin kpi bik maŋ na kpowa.” <sup>21</sup> Ki Joosef fiir ki j̄ii bik maŋ nan u naa ki ŋmat saan Israel tingboun̄ ni.

<sup>22</sup> Waa din tan gbat a Akelaus dii naan ki kar u baa Herod naangbant paak Judea yent ni na, ki jaŋmaanii sooro nan wun kun leŋ; ki Yennu bia wann̄o damiit ni a wun ŋmat saan Galilii yent ni.

<sup>23</sup> Ki u din saan ki saa kar doo nba ki bi yi Nasaref na ni, ki li gbeen maan nba ki Yennu s̄okiniinba din sob ki j̄iin Masia maŋ po na a, “Bi tan sii yiu Nasaref nir̄o.”

### 3

*J̄oonn nba din wuur niib Yennu nyunwuru na labaar*

*(Mak 1.1-8; Luk 3.1-18; J̄oonn 1.19-28)*

<sup>1</sup> Li poor poe, ki J̄oonn nba wuur niib Yennu nyunwuru na be muuk ni, Judea yent ni, ki

---

‡ 2:20 2.20 Juu teeb sanleere tee Israel teeb.

mooŋtir Yennu barnanii ki yeen a <sup>2</sup> “Nyikin man i biit, kimaan Yennu ŋaanaan dinu per na.”  
<sup>3</sup> Yennu sokinii Aisaya din poŋ sob ŋoo Jooŋn poewa a:

“Nisoo tan sii be muuk ni ki hoot ki yaa  
 ‘Ŋammit man ti Yomdaano baaru sonu ki turo,  
 ki bia ŋamm u sonii ki lii took.’ ”

<sup>4</sup> Jooŋn din lia laagumii kobit liatire, ki bia boob gbann u siak ni, ki u jeet tee naasuut nan siat. <sup>5</sup> Li yoo ki Jerusalem doo ni teeb, nan Judea yent ni kur teeb, nan Joodann mokit tingbouŋ ni kur teeb, saan u boor, <sup>6</sup> ki fiit bi toonbiit, ki u wurib Yennu nyunwuru Joodann mokit na ni.

<sup>7</sup> Waa din tan la ki Farisiinba nan Sajusiinba\* bonchiann mun baat u boor ni a wun wurib Yennu nyunwuru na, ki u yetib a, “Yimm waal-abirii na! Ŋmee kpaani a yin tin nyi Yennu wutoor nba yaa lin baar i paak na ni? <sup>8</sup> Ii tuun linba saa wann nan i set nyik i biita. <sup>9</sup> I daa mok parbifaant nan Abraham tee i yeeja. N beerie nan Yennu saa fit fiin tana nba na ki lin kpant Abraham yaaboonawa. <sup>10</sup> Pajar poŋ teen siira a wun choo tiinii; ki tiik nba kur ki loon loonŋana, bi saa choore ki lur muu ni. <sup>11</sup> Min ŋarin wuuri nyun ki li want nan i nyik i biita, ŋaan wunba yaa wun baar n poor po na cheen; ki n poŋ ki jaŋ nan ki n jii u taasaati; ŋooe saa jii Yennu Seyeen nan muu ki wuur i para. <sup>12</sup> U dia u dilenn ŋmaniie ki yaa wun lenn fanu, ki nyinn dibin ki

---

\* **3:7** 3.7 Farisiinba nan Sajusiinba din tuu tee nisiab nba nunii mon nan Moses sennu dianu, ŋaan ki mok ninbatinu nan niibe, bi mok dont-n-moŋ kooe.

wuun u boor ni, ɲaan joo fouɲ na muu nba kan mi kpeen ni.”

*Jɔɔnn nba din wur Yiisa Yennu nyunwuru bianjinba*

*(Mak 1.9-11; Luk 3.21-22)*

<sup>13</sup> Li yoo maɲ ki Yiisa nyii Galilii ki saan Jɔɔdann mɔkir po, ki baar Jɔɔnn boor a wun wurɔ Yennu nyunwuru. <sup>14</sup> Ki Jɔɔnn ki saki, ki yetɔ a “Mine bo saa baar a boor ki a wurin, ɲaan ki a mun tan baat n boor ni-i?”

<sup>15</sup> ɲaan ki Yiisa yetɔ a “ɲaant ki lin tun nna mɔtana, kimaan nnae ɲan nan tin tun toonɲana kura.” Li yoo na ki Jɔɔnn sak.

<sup>16</sup> Waa wur Yiisa Yennu nyunwuru ki gbenn yoo nba, ki Yiisa nyii nyun na ni; li taakpaak ni ki sanpagbouɲ loot, ki u la ki Yennu Seyeenɲ siik ki tee nan ɲmann, ki tan jakin u paak. <sup>17</sup> Ki kunkɔr nyii sanpaapo ki yet a “N Bilonkake na, ɲɔɔe ki n numm gboou.”

## 4

*Bianjinba ki Sintaanii jamm Yiisa*

*(Mak 1.12-13; Luk 4.1-13)*

<sup>1</sup> Ki Yennu Seyeenɲ te ki Yiisa kɔɔ muuk ni a Sintaanii n saa jammɔ. <sup>2</sup> U din be leɲ ki ki dii siar dapiinna, yonnu ni nan nyiɔk, ki kon tan soorɔ. <sup>3</sup> Ki Sintaanii baar u boor ki yetɔ a “Li-i tee ki a set tee Yennu Bijaie, fan yet tana na ki lin kpant jeet.”

<sup>4</sup> Ki Yiisa jiin a, “Li sɔb Yennu gbouɲ ni a ‘Jeet kuukɔɔ paak kaa te ki niro be, ɲaan maan nba kur ki Yennu pak na paake.’ ”



<sup>5</sup> Li tonton na ki Sintaanii jiiu ki saan nano Jerusalem, ki saa donno Yenjiantu nasaakak mopin-yerik paak, n̄aan beto a <sup>6</sup> “Li-i tee ki a set tee Yennu Bijaie, fan yukir ki saa mob, kimaan li sob Yennu gbouŋ ni a ‘U saa te ki u malakanba-ii guua; bi sii dia-a nan bi nii, ki a taar kan gbiat tann gbaa.’ ”

<sup>7</sup> Ki Yiisa yeto a, “Li bia sob Yennu gbouŋ ni a ‘Soo daa bikii u Yomdaano Yennu.’ ”

<sup>8</sup> Ki Sintaanii bia jiiu ki saan nano kunkonn nba fok bonchiann paak, ki saa wanno tingbouŋ na yent kur nan li mokint, <sup>9</sup> n̄aan beto a, “Li-i tee ki a bo saa gbaan ki jiantin, n bo saa tura yent maŋ kura.”

<sup>10</sup> Ki Yiisa beto a, “Seetir nna Sintaanii. Li sob Yennu gbouŋ ni a ‘Niro-ii jiantir u Yomdaano Yennu kuukoo, kii bia kii waa n̄oo kuukooe.’ ”

<sup>11</sup> N̄anne ki Sintaanii ji yaat n̄aan nyiko, ki Yennu malakanba sik ki tan teeno saauŋ.

*Yiisa nba din piin u toonn Galilii yent ni bianinba*

*(Mak 1.14-15; Luk 4.14-15)*

<sup>12</sup> Yiisa nba din tan gbat nan bi koon Joonn dansarik na, ki u saan Galilii. <sup>13</sup> Waa din baar Nasaref na u din ki yukir leni, n̄aan gar saan Kapenaum doo nba be mok-kpiŋ, Sebulunn nan Naftali tiŋ ni na. <sup>14</sup> Linba na din tun a lin gbeen Yennu sokinii Aisaya nba din pak linba nae a,

<sup>15</sup> “Sebulunn tiŋ nan Naftali tiŋ nba be

Joodann mok-pootir po,

ki bia be mōkgbenjir boor:

Galilii yent nba ki binba ki tee Juu teeb kar na;

16 yimm nba be bunbɔnn ni na la yentjaann;  
binba kar kuun bunbɔnn yent ni na la  
ki yentu na yentir ki baatib.”

17 Li yoo maŋ ki Yiisa piin ki mɔontir a, “Nyikin i toonbiit man, kimaan Yennu ŋaanaan dinu per na.”

*Yiisa nba din yiin jansoora banna bianjinba  
(Mak 1.16-20; Luk 5.1-11)*

18 Yiisa nba din somm Galilii mɔkgbenir kpin na, ki u tan la wunba ki bi yiu Simonn ki bia yiu Piita na, nan u waarɔ Andru, ki bi lubin janlaauŋ mɔkgbiɔŋ, kimaan bi din tee jansoorae. 19 Ki u yetib a “Ii waan man, ki n saa te ki yii daak niib kii teenin.” 20 Ki bi set nyik bi janlaant yiama ŋaan waau.

21 Waa din nyii leŋ ki saan tɔonn waaminna, ki u la Sebedii nan u waas banlee, Jeems nan u waarɔ Jɔonn, ki bi be burgbetir ni, ki lik bi janlaant; ki u yiimm. 22 Li taakpaak ni, ki bi nyik burgbetir na nan bi baa, ŋaan waa Yiisa.

*Bianjinba ki Yiisa te ki baatib la laafia  
(Luk 6.17-19)*

23 Yiisa din lin Galilii yent kur po, ki want niib Yennu maan, jiantu diit ni, ki mɔontir Yennu naan barnjanii mɔontii ki teemm, ki te ki yiarboorii kur damm nan binba mɔk dani na kur laat laafia. 24 Ki bi din lin mɔont u sann Siria tingbouŋ kur po. Ki bi din jikit baatbooru booru kur, ki baat namm u boor: binba din yiar yiarbooru nba kur, li gbanantont, nan binba din gbee nan narinbiit, nan binba baa gbitgbiia, nan gbanankpeena damm, ki u te ki bi la laafia. 25 Ki

nibur nyii Galilii, nan Doi-piik, nan Jerusalem,  
nan Judea, nan Joodann mək-pootir ki bit waau.

## 5

### *Parpeenn labaar*

*(Luk 6.20-23)*

<sup>1</sup> Yiisa nba din la nibur maŋ na, ki u doo kunkonn paak ki kar; ki u poorpoweiteeb lakin u boor. <sup>2</sup> Ki u piin ki wantib Yennu maan ki yeen a,

<sup>3</sup> “Binba mi nan Yennu-e teemm bont kur na, parpeenn tee bi yare, ŋamme tee Yennu naan ni yab.

<sup>4</sup> “Binba mɔ ki fabin, parpeenn tee bi yare, kimaan Yennu saa maan bi parawa.

<sup>5</sup> “Binba sikin bi mɔŋ, parpeenn tee bi yare, kimaan ŋamme tan sii yen tingbouŋ na.

<sup>6</sup> “Binba ninbina mɔn ki bi para lakib nan Yennu toona, parpeenn tee bi yare, kimaan Yennu saa gboomm bi para nba lakib linba paaka.

<sup>7</sup> “Binba mək ninbatinu nan bi leeb, parpeenn tee bi yare, ŋamme ki Yennu mun saa timm ninbaauk.

<sup>8</sup> “Binba para yeen, parpeenn tee bi yare, kimaan ŋamme saa la Yennu.

<sup>9</sup> “Binba tee sindantinna nan kunkɔnpat-teeb, parpeenn tee bi yare, kimaan ŋamme ki Yennu yib u waas.

<sup>10</sup> “Binba jiantir Yennu ki bi mukisib na, parpeenn tee bi yare, ŋamme tee Yennu naan yab.

<sup>11</sup> “Niib-i sukii-i, ki mukisi, ki fa fabooru kur ki biiri, kimaan yaa tee n poorpoweiteeb na paak, parpeenn tee i yare. <sup>12</sup> Bi-i tanji teei nna, ii mək parpeenn bonchiann man, kimaan i nyoot tan sii yab Yendoun ni; nnae ki bi din mukis Yennu sokiniinba nba din be yaayoo ni na.

*Ki jiin yaarin nan yentu po*  
(Mak 9.50; Luk 14.34-35)

<sup>13</sup> “I tee nan yaarin nae tingboun na ni. Yaarim-i tanji biir ki ji ki mani, a saa teen nlee ki lin manj? Li ji kaa nyooti; see ki bi kpaar moon tij ni, ki niib somm li paak.

<sup>14</sup> “Yimme tee tingboun na yentu; doo nba ki bi maa ki senn kunkonn paak kan fit bori. <sup>15</sup> Soɔ mun kan joo fitir njaan jii nmanj ki chibini; see ki u jiir ki toon linba dokii paak ki lin tur njaak na niib kur yentu. <sup>16</sup> Ii muni be nna; njaant ki i yentu n yent tur nisaarii, ki bii laat i toonjana kii dont i Baa Yennu nba be sanpaapo na.

*Ki jiin sennu na po*

<sup>17</sup> “I daa dukii nan n baar maa n tan kpeen Yennu sennu nan u sokiniinba maan na; n ki baar maa n tan kpeenn kaa, njaan n baar maa n sakir nan barmoniie; <sup>18</sup> kimaan barmoniie ki n beeri na, sanpaak nan tingboun na tan saa gbenn, njaan Yennu sennu na nan li bonmintika kan mi bot, see ki li kur tan tun gbenn. <sup>19</sup> Li paak, wunba yet Yennu sennu manj yennkoo gbaa, ki bia wann leeb nna manj, u tan sii tee tarike Yennu naan ni; njaan wunba waa sennu manj fanu, ki bia want u leeb fanu, njooe tan sii tee nijaann Yennu naan na ni. <sup>20</sup> Kimaan mine beeri nan see

ki i toonɲana yab ki gar sennu wannteeb nan Farisiinba\* yar, li-i kii tee nnai kaa, i kan mi koo Yennu naan ni.

*Ki j̄in wutoor po*

<sup>21</sup> “I poŋ gbat ki bi din yeen yaayoo ni niib a ‘Daa kpi nirɔ, kimaan wunba kp̄ii nirɔ tan sii be bar̄ii ni barbudaar;’ <sup>22</sup> ɲaan min ɲarin beerie nan wunba dont wutoor u naa bik paak ((yann yann, ki li kaa paaki,)) u tan sii be bar̄ii ni barbudaar; ki wunba sukir u naa bik a ‘Bon-yann na,’ u tan sii be bar̄ii ni; ki wunba bia sukir u naa bik a ‘Bonjatir na,’ u tan sii be bar̄ii ni ki koo muu nba kan mi kpeen na ni. <sup>23</sup> Li paak, wunba koo Yennu diiuk ni a wun pi Yennu piinii, ɲaan tiar nan u mək biit nan u naa bik, <sup>24</sup> wun nyik u piinii maŋ leŋ, ɲaan ɲmat saan u naa bik na boor ki bin saa ɲamm bi bar̄ii ki gbenna, ki wun jen ki j̄ii u piinii maŋ ki tur Yennu.

<sup>25</sup> “Fin nan soo-i mək maan, ki saa bar̄ii maŋ buut, fan ɲaan ki yin taan mɔb ki ɲamm i bar̄ii maŋ, yoo nba ki i daa be soɲu ni na; li-i kii tee nnai kaa, daano maŋ saa jiia ki saan nana barbuuro boor, ki barbuuro na n mun jiia ki teena dansarguuro nuu ni, ki wun kooɲa dansarik. <sup>26</sup> Barmɔniie ki n beera na, a kan mi nyi leŋi, see ki a tan pa pann nba ki bi jiiaara na kur, ki jinjema kan tenni.

*Ki j̄in chonchonsin po*

---

\* **5:20** 5.20 Farisiinba din tee Juu nisiab nba nunii mon nan Moses sennu dianu, ɲaan ki mək ninbatinu nan niib, bi mək dont-n-moŋ kooe.

27 “I poŋ din gbia ki bi yeen a ‘Daa chommi,’  
 28 ŋaan min ŋarin beerie nan wunba got poo ki u  
 niɔŋ kɔɔu, u chomm nanɔ u par niwa. 29 Li-i tee  
 ki a diitu po ninbinnie te ki a yaa tun toonbiit,  
 fan kpakirɔ lu, kimaan li-i tee ki a kɔŋ a ninbinn  
 yennkɔɔ, li chee nan Yennu n tan kɔɔn a gbanant  
 kur muu nba kan mi kpeen na ni. 30 Li-i tee ki  
 a niidiitue te ki a yaa tun toonbiit, fan potɔ lu,  
 kimaan li-i tee ki a kɔŋ a nuu yennkɔɔ, li chee  
 nan a gbanant kur n tan kɔɔ muu ni.

### *Pooyêtu labaar*

*(Matiu 19.9; Mak 10.11-12; Luk 16.18)*

31 “Bi bia din yeen a ‘Wunba loon ki wun yêt u  
 ŋaapoo, wun turɔ pooyêtu gbouŋ;’ 32 ŋaan min  
 ŋarin beerie nan wunba kur yêt u ŋaapoo, ki li  
 ki tee u tun bonchonchontoonn kaa, ŋɔɔe saa te  
 ki u poo maŋ n tun bonchonchontoonn, li-i tee  
 ki u kun jɔɔ, ki wunba kɔɔn poo nba ki bi yêtɔ  
 maŋ mun bia tun bonchonchontoonna.

### *Ki jîin mɔpor po*

33 “I poŋ gbia ki bi yeen yaayoo ni niib a ‘Ti mi  
 ki a por faak mɔpor, ŋaan li-i tee ki a por mɔpor  
 Yennu sann ni, li ŋan ki a tun gbeen a mɔpor  
 maŋ;’ 34 ŋaan min ŋarin beerie, nan ii mi ki a por  
 mɔpor gbaa; daa yeen a ‘N por sanpaak,’ kimaan  
 li tee Yennu naangbouŋo; 35 daa yeen a ‘N por  
 tingbouŋ,’ kimaan li tee Yennu taanmaatire; a  
 bia daa yeen a ‘N por Jerusalem-i,’ kimaan li tee  
 Yabint Yennu dooe; 36 a bia daa yeen a ‘N por n  
 yuri,’ kimaan a kan fit te ki a yukobuk yennkɔɔ n  
 penn koo ki bonni; 37 ŋaan ŋaant man ki i jiinu-ii

tee, 'Nn,' koo 'Aaii.' Li-i tee ki a yet siar ki pukin linba na paak, li ji nyii Sintaanii boore.

*Daa jiint leeb pana man*  
(Luk 6.29-30)

<sup>38</sup> "I ponj din gbia ki bi yeen a 'Soo-i kpakir a ninbinn, fan mun kpakir u yar ki jiin pann; soo-i faa-a ki fokit a nyann, fan mun faau ki fokit u yar ki jiin pann;' <sup>39</sup> njaan min njarin beerie nan i daa jiint leeb pana; soo-i peba tanpak a niidiitu po kpianu, fan nmant a ganj po biak ki wun peb; <sup>40</sup> soo-i saa nana buut boor a wun gaar a soot, fan sak ki wun tont a liatgbakitir kii saa; <sup>41</sup> soo-i mia-a a fan jii u jik-kpiatir ki saan nann maar yennkoo, fan jii ki saan nann maar njanlee. <sup>42</sup> Wunba miara siar, fan turoo; ki wunba mun bia loon ki a kpentoo siar, fan kpentoo ki daa miino.

*Ii mok lomm nan i datai man*  
(Luk 6.27-28, 32-36)

<sup>43</sup> "I ponj din gbia ki bi yeen a, 'Ii loon a naa waas njaan kii nan a datai;' <sup>44</sup> njaan min njarin beerie nan yii loon i datai man, kii yeen wunba sukii-i na a 'Yennu piisin-ii be a paak;' kii tuun linba njan kii teen binba nami; kii mei Yennu kii teen binba dinti biak na. <sup>45</sup> Nanne saa te ki i set tee i Baa Yennu nba be sanpaapo na waas, kimaan njooe te ki yonnu do nibiit nan niijamm paak, ki bia te saak baa nibiit nan niijamm doi ni. <sup>46</sup> Li-i tee ki i loon binba looni na kooie, nyolannpoe ki i saa la Yennu boori? Li ki tee nna kaa ki nibiit na mun tuumi-i? <sup>47</sup> Ki li-i tee ki i foont i naa waas kooie, toonnanlannpoe ki i tun ki gar leebi? Nna kaa ki binba ki waa Yennu

sonu na mun tuumi-i? <sup>48</sup> Li paak, ii be man fanu nan i Baa Yennu nba be sanpaapo na.

## 6

### *Ki jün burchint po*

<sup>1</sup> “I daa tuun toonjana a niib n la ki paki kaa, kimaan i-i tuun nna, i kan la nyoot i Baa Yennu nba be sanpaapo na boori.

<sup>2</sup> “Li-i tee ki a yaa a tur talasdaano piiniie, faa daa moontir nan kpinkpanni damm nba tuun bianjinba Yenjiantu diit ni, nan doi ni, a niib n la bi toonjana ki pakib na. Barmoniie ki n beeri na, bi pon gaar bi nyoota. <sup>3</sup> Naan li-i tee ki a yaa a pi talasdaano, fan piu, ki daa te ki a yonanmon gbaa mi li po. <sup>4</sup> Tumin woonin ni, ki a Baa Yennu nba laat woonin ni na saa pa-a ((paanu ni.))

### *Ki jün Yenmiaru po*

*(Luk 11.2-4)*

<sup>5</sup> “Li-i tee ki a yaa a miar Yennu, faa daa tuun nan kpinkpanni damm nba tuun bianjinba na, kimaan bi loon bii see Yenjiantu diit nie, nan sonpaata nba be doi ni, kii mei Yennu a niib-ii laatib. Barmoniie ki n beeri na, bi pon gaar bi nyoota. <sup>6</sup> Naan li-i tee ki a yaa a miar Yennu-ie, fan koo a diiuk ni ki loon gann, naan miar a Baa Yennu nba be woonin ni na, ki a Baa Yennu nba laat linba ki a tuun woonin ni na saa pa-a ((paanu ni.))

<sup>7</sup> “Li-i tee ki a mei Yennu-ie, faa daa mantik mei mobona nba yab nan patmannteeb nba mei bianjinba na; bi dukii nan bi miaru bonchiann na paake ki bi pata saa gbat. <sup>8</sup> I daa tee nan namm



na, kimaan i Baa Yennu poŋ mi linba ki i loon ki i daa ki miarɔ. <sup>9</sup> Yaa sii mei Yennu bianjinbae na:

‘Ti Baa Yennu nba be sanpaapo,

ɲaant ki a sann n la baakir;

<sup>10</sup> ɲaant ki a naan n baar;

ɲaant ki a loomm n tun tingboun nna,

nan laa tuun Yendoun ni bianjinba na.

<sup>11</sup> Luunt dinna mann.

<sup>12</sup> Nyikin chab ti toonbiit

nan taa mun nyikit ki chabit binba tuumit biit  
bianjinba na.

<sup>13</sup> A daa te ki ti kɔɔ jinjammii ni,

ɲaan a nyinnit bonbiir\* ni.

((Kimaan fine yen naan nan yiikoo nan baakir  
mɔkmɔk nan mɔkmɔk.))’

<sup>14</sup> “Li-i tee ki i nyikit i leeb biit ki chabitibi,  
i Baa Yennu nba be sanpaapo na mun saa nyik  
chabiwa; <sup>15</sup> ɲaan i-i kii nyikit chabit i leeb biiti, i  
Baa Yennu mun kan nyik chab i biiti.

### *Mɔloru labaar*

<sup>16</sup> “Li-i tee ki i yaa i lor mɔi, yaa daa biir i nunii  
po nan kpinkpanii damm na, kimaan bi tuu biir  
bi nunii po, a sɔɔ kur n la ki bann nan bi lor  
mɔie. Barmɔniie ki n beeri na, bi poŋ gaar bi  
nyɔɔta. <sup>17</sup> Li-i tee ki a lor mɔb, fan yibir a numm  
po ki saat a yut fanu; <sup>18</sup> linba nae saa te ki leeb  
kan bann nan a lor mɔbi, ɲaan a Baa Yennu nba  
be woonin ni na kuukɔɔe sii mi; ki a Baa Yennu  
nba laat linba ki a tuun woonin ni ki teenɔ na  
saa pa-a ((paanu ni.))

\* **6:13** 6.13 Bonbiir ni, koo Sintaanii nuu ni.

*Yendouj ni məkint labaar*  
(Luk 12.33-34)

<sup>19</sup> “Daa bərii a məkint tingbouj na ni, siaminba ki bonḡminḡmabit nan tintanii saa biirir; ki nanyukib bia saa koo ki jami; <sup>20</sup> ḡnaan bərin a məkint Yendouj ni, siaminba ki bonḡminḡmabit nan tintanii kan fit biirir, ki nanyukib bia kan fit koo jami; <sup>21</sup> siaminba ki a məkint be na, a dudukit mun be leje.

*Gbanant yentu labaar*  
(Luk 11.34-36)

<sup>22</sup> “A ninbinae tee a gbanant fitir. Li paak, a ninbina-i ḡnani, a gbanant kur po sii mək yentue; <sup>23</sup> ḡnaan a ninbina-i kii ḡnani, a gbanant kur sii bəne. Li paak, li-i tee ki yentu nba be a ni na tan bəni, li sii tee bunbənchiḡḡo.

*Tingbouj na binbej labaar*  
(Luk 16.13; 12.22-31)

<sup>24</sup> “Soo kan fit tun ki tur yomdamm banlee; u sii nan yenḡe ḡnaan loon loo; koo u sii baakit yenḡe, ḡnaan sian loo na. I kan fit kii waa Yennu ki bia waa məkinti.

<sup>25</sup> “Li paake ki n beeri a i daa te ki li mukisi i binbej po nan yaa saa di linba koo ki nyu linba; ki bia daa te ki li mukisi i gbanant po nan yaa saa lia linba. Manfoor ki gar jeeti-i? ki gbanant mun bia ki gar tiati-i? <sup>26</sup> Gotir nḡonii nba yuuk ki lin na; bi ki buuri; bi bia ki jaan ki wuu suka nan naapaat ni, ḡnaan ki i Baa Yennu nba be sanpaapo na dintib. I ki mək nyoot ki gar nḡonii-i? <sup>27</sup> I manfoor paak daamii kan fit fəkin i manfoor.

28 “Bee ki i mukis i mɔŋ liant paaki? Gotir man mɔɔt puuk nan li fant; ŋaan bi ki tuun koo ki luu bi mɔŋ tiati, 29 ŋaan n beerie, Kpanbar Solomonn nba lek din mɔk taŋant bianjinba, ŋaan u din ki mi lia liant ki li fan nan mɔɔt puuk na gbaa. 30 Yennu-i faŋit mɔɔt nba be dinna, ŋaan wonn ki bi joo muuwa na, u kan lannini-i? Yimm yadkanpɔɔna damm na!

31 “Li paak, i daa te ki li mukisi ki i dukii a ‘N saa di bee?’ koo ‘N saa nyu bee?’ koo ‘N saa lia bee?’ 32 Binba ki mi Yennu na tuu mukis bi dudukit linba na kur paake; ŋaan i Baa Yennu nba be sanpaapo na set mi nan i loon linba na kura. 33 Ŋaant man ki i baka-ii be Yennu naan ni nan yentinu labaar ni, ki u saa jii bona nba na kur ki turi. 34 Li paak, daa te ki wonn barii mukisini, kimaan wonne saa dukin u mɔŋ po; daar kur mɔk daamii nba jaŋitɔe.

## 7

### *Leeb buut bunu labaar* (Luk 6.37-38, 41-42)

1 “I daa bu leeb buuti, ki Yennu mun kan bu i buuti, 2 kimaan yaa bu leeb buut bianjinba na, nnae ki Yennu mun tan saa bu i buut; bianjinba ki i bikii teen i leeb na, nnae ki Yennu mun saa bikin turi. 3 Bee ki a laat mɔɔnu nba be a loo ninbinn ni, ŋaan ki la dajinn nba be a mɔŋ mɔŋ ninbinn ni na? 4 Nlee ki a saa bet a loo a, ‘N yɔɔk, ŋaant ki n nyinn mɔɔnu nba be a ninbinn ni na,’ ŋaan ki ki laat dajinn nba be a mɔŋ ninbinn ni na. 5 Fin kpinkpannii daano na, nyint dajinn nba

be a ninbinn ni na sinsinn, ki ji fit la fanu ki nyinn mɔɔnu nba be a lɔɔ ninbinn ni na.

<sup>6</sup> “I daa jikit linba tee Yennu yar ki teen bɔi, kimaan bi saa ηmat juntie; i daa jikit linba mɔk nyɔɔt ki teen doorii, kimaan bi saa ηmatir nan tante.

*Ki jiiin Yenmiaru po  
(Luk 11.9-13)*

<sup>7</sup> “Miat Yennu, ki u saa turi; lomin man, ki i saa la; kpaan gann, ki u saa loot ki turiwa, <sup>8</sup> kimaan wunba kur mei Yennu gaane; ki wunba mun loon, u laate; ki wunba kpaan gann, ki bi lootir teenɔ. <sup>9</sup> Yimm baanba, i ηmee ki u bik saa miarɔ jeet ki wun jii tann ki turɔ? <sup>10</sup> koo ηmee ki u bik saa miarɔ jaŋ ki wun turɔ waauku? <sup>11</sup> Ki li-i tee yimm nba tee biitdamm na mi bianjinba ki i saa tur i waas bonɲana, i Baa Yennu nba be sanpaapo nae mantik saa tur binba meio na bonɲana.

<sup>12</sup> “Bianjinba ki a loon sɔɔ-ii tuun kii teena na, ii muni tuun nna kii teen leeb; kimaan Yennu sennu nan u sɔkiniinba wannu na ni want nnae.

*Tammɔyebik kɔɔnu labaar  
(Luk 13.24)*

<sup>13</sup> “Kɔɔn man tammɔyebik na ni; kimaan tammɔb nba kɔɔ muu nba kan mi kpeen na ni na yarin hei, ki li sɔnu bia man nan sommir; ki niib bonchianne kɔɔ tammɔb maŋ ni. <sup>14</sup> Manfoor tammɔb na ηarin tee bonyebike, ki li sɔnu bia paar nan tokinu; ki niib waaminnae kɔɔ tammɔb maŋ ni.

*Ki j̄in tiik nan u loona po*

*(Luk 6.43-44)*

<sup>15</sup> “Ii mi man faak s̄okiniinba na po, binba baat i boor ki naan pei, ŋaan tee kinkata nan barm̄on̄ii na. <sup>16</sup> Bi toona nie ki i saa bann baa tee binba; kunkon̄ ki loon gaa; ki jagotuk mun ki loon kinkana-a. <sup>17</sup> Tin̄aŋ kur loon loonŋanae; ki tikpeeun̄ kur loon loonbiit. <sup>18</sup> Tin̄aŋ kan lon loonbiiti; tikpeeun̄ mun kan lon loonŋana. <sup>19</sup> Tiik kur nba ki loon loonŋana, bi saa ch̄oore ki lu muu ni. <sup>20</sup> Li paak, faak s̄okiniinba toona nie ki i saa bannib.

*Yennu naan ni k̄oonu labaar*

*(Luk 13.25-27)*

<sup>21</sup> “Li ki tee binba yin ‘N Yomdaano, n Yomdaano’ na kur kaa tan saa k̄oo Yennu naan ni, see binba sak n Baa Yennu nba be sanpaapo na m̄ob. <sup>22</sup> Daar maŋ-i tan̄i baar, niib bonchianne tan sii yin ki yeen a ‘Ti Yomdaano, ti Yomdaano, ti din ki s̄okint Yennu maan a sann ni-i? A sann nie ki ti din nyint narinbiit niib ni, a sann nie ki ti bia tun bakitnaun̄ toonjaana.’ <sup>23</sup> Li yoo ki n mun tan saa yetib a, ‘N ki miini, yimm toonbiit damm na, seetir nna man!’

*Ŋamaara banlee labaar*

*(Luk 6.47-49)*

<sup>24</sup> “Li paak, wunba kur gbia n maan na ki waa-r fanu, n saa nanno nan yandaans̄oo nba din maa u ŋaak tanpiiuk paak nae; <sup>25</sup> ki saak tan baa, ki nyun gbee ki yat nan doo, ki woun̄ da, ki nyunpana koon ki liat ŋaak maŋ dikpina, ŋaan ki li lek see kenken ki ki baa, kimaan u maar tanpiiuk paake.

<sup>26</sup> “Wunba kur gbia n maan na, ɲaan yêl li weiu, n saa nannɔ nan jajatuk nba din maa u ɲaak tanbiinii ni nae; <sup>27</sup> ki saak tan baa, ki nyun gbee yat nan doo, ki wouɲ da, ki nyunpana koon ki liat ɲaak maɲ dikpina, ki li bet baa wamm, ho, baa biiuk jiaakii!”

*Ki jiiɲ Yiisa Masia yiikoo wannu po*

<sup>28</sup> Yiisa nba din pak mɔbona na ki gbenn yoo nba, ki u wannu maɲ bakit nibur na bonchiann, <sup>29</sup> kimaan u wannib nan daanɔ nba yen yiikoo nae, ki li ki tee nan sennu wantteeb nba wantib bianjinba na.

## 8

*Yiisa nba din te ki gbaatir la laafia bianjinba  
(Mak 1.40-45; Luk 5.12-16)*

<sup>1</sup> Yiisa nba din nyii kunkonn maɲ paak ki sik yoo nba, ki niib bonchiann wei u poor. <sup>2</sup> ɲanne ki gbaatsɔɔ baar ki tan gbaan u tɔɔnn ki yeen a “N Yomdaanɔ, li-i tee ki a loon, a saa fit te ki n ɲaauk na n gbenna.” <sup>3</sup> Ki Yiisa tant nuu ki siiu ki yetɔ a “N loon nna. A ɲaauk maɲ n gbenn!” Li taakpaak ni ki u ɲaauk na set gbenn. <sup>4</sup> ɲaan ki Yiisa kpaanɔ a “Ii mi ki a bet sɔɔ barii na, ɲaan ii saa Yennu manntɔɔ boor ki jii a mɔɲ ki wannɔ, ki bia mann maruɲ nba ki Moses din senn ki jiiɲ gbaata paaku po na, ki sɔɔ kur n bann nan a ɲaauk maɲ set gbenna.”

*Ki jiiɲ Rom tiɲ kunkɔnkɔnna yudaanɔ yada po  
(Luk 7.1-10)*

<sup>5</sup> Yiisa nba din koo Kapenaum yoo nba, ki Rom\* tinj kunkonkonna yudaansoo cheto sonu ni ki barimo ki yeen a <sup>6</sup> “N Yomdaano, n toontunno yiare, ki u gbanant kpowa, ki li mukiso bonchiann, ki u doo diiuk ni.”

<sup>7</sup> Ki Yiisa beto a “N saa saan ki te wun la laafiawa.”

<sup>8</sup> Ki u jiin a “N Yomdaano, daa bakint a moŋ ki baati; kimaan, n ki ŋan nan fan koo n ŋaak ni; ŋaan pakin mabonne, ki n toontunno na n la laafia. <sup>9</sup> Kimaan n mok binba garin ki yenin, ki n mun dia kunkonkonna ki yemm, ki fit tian yeno paak a ‘Baat,’ ki u baat; ki tian loo paak a ‘Saant,’ ki u saa; ki bia te ki n daabir tuun maa loon bianinba.”

<sup>10</sup> Yiisa nba din gbat linba na, ki li yaar lito; ki u jiant got niib nba waa u poor po na ki betib a “Barmoniie ki n beeri na, n daa ki mi la soo ki u teenin yada na booru yimm Israel† teeb ni gbaa. <sup>11</sup> N beerie, niib bonchiann tan saa nyi yondo po nan yonbaa po, ki ŋamm nan Abraham, nan Aisak, nan Jakob n lakin kar ki di jeet, Yennu naan ni; <sup>12</sup> ŋaan ki yimm nba tee naan maŋ niib na, bin jii-i ki lu-i nanyer po, bunbonn ni; leŋ mane ki i tan sii fabin mo ki ŋman nyana.” <sup>13</sup> Ki Yiisa ŋmant ki yet kunkonkonna yudaano maŋ a “Ii kun! Faa teen yada bianinba na, lin tun nna ki tura.” Ki u toontunno na set din la laafia li yoo na.

---

\* **8:5** 8.5 Rom teeb din nyann Juu teeb ki diab. † **8:10** 8.10 Juu teeb sanleere tee Israel teeb.

*Bianjinba ki Yiisa te ki baatib bonchiann la laafia*

*(Mak 1.29-34; Luk 4.38-41)*

<sup>14</sup> Tɔn, ki Yiisa saan koo Piita njaak, ki la Piita dianpook doo yiar ki u gbanu ton. <sup>15</sup> Ki Yiisa sii u nuu; ki u gbanantouŋ na gbenn, ki u fiir ki teemm saauŋ.

<sup>16</sup> Li daar maŋ daajoouk, bi din jii niib bonchiann nba ki narinbiit be bi ni na, ki baar namm Yiisa boor; ki u kpan pak mɔbonn ki nyinn narinbiit na; ki bia tur binba yiar na kur laafia.

<sup>17</sup> Waa din tuun bianjinba na tee nan Yennu sokinii Aisaya nba din pak nae a, “U moŋ moŋe gaar ti gbanantouŋ nan ti yiarbooru booru ki yaat nann.”

*Binba loon bin wei Yiisa na labaar*  
*(Luk 9.57-62)*

<sup>18</sup> Yiisa nba din la ki nibur lintɔ yoo nba, ki u yet u poorpoweiteeb na a bin fiir ki bin saan mɔkgbenjir na pootir po. <sup>19</sup> Ki Yennu sennu wantɔsɔɔ baar ki tan yetɔ a, “Wantɔɔ, n saa weia siaminba kur ki a saa.”

<sup>20</sup> Ki Yiisa yetɔ a, “Lunlona mɔk fɔrii, ki noonii mun bia mɔk tiat, njaan min nisaarik Bik ki mɔk dindɔboori.”

<sup>21</sup> Tɔn, ki u poorpoweiteeb yeno mun tan yetɔ a, “N Yomdaano, njaant ki n pii n baawa.”

<sup>22</sup> Ki Yiisa jiino a, “Ii waan, njaan nyik ki kpeemm-ii‡ pii bi leeb.”

*Wouŋ nan nyun nba sak Yiisa mɔb bianjinba*  
*(Mak 4.35-41; Luk 8.22-25)*

‡ 8:22 8.22 Kpeemm tee binba ki waa Yiisa nae.



<sup>23</sup> Yiisa nba din koo burgbetir ni yoo nba, ki u poorpoweiteeb na mun wei koo. <sup>24</sup> Ki wonpaaruk fikit ki da mɔkgbenjir man paak, ki nyunpana pir koo burgbetir na ni ki tan yaa lin gbee; n̄aan ki Yiisa doo goont. <sup>25</sup> Ki u poorpoweiteeb na baar ki fiino, ki yeto a “Ti Yomdaano, tintit, ti be kuun nie.”

<sup>26</sup> Ki Yiisa yetib a “Yimm yadkanpooona damm na, bee ki i tiin janmaanii?” n̄aan fiir ki tian wouj nan nyunpana na paak a bin n̄min, ki bi set n̄min soon.

<sup>27</sup> Ki li yaar litib, ki bi ji boi leeb a “Niro na tee niboorbee? ki wouj nan nyunpana saak u mɔb gbaa.”

*Ki j̄in jab banlee nba ki narinbiit din be bi ni na po*

*(Mak 5.1-20; Luk 8.26-39)*

<sup>28</sup> Yiisa nba din poot Galilii mɔkgbenjir ki koo Gerasa tin ni na, ki jab banlee nba gbee nan narinbiit na nyii kaat ni ki cheto; bi din mɔk janmaansooruk hei, ki soo ki fit gaar baa be siami. <sup>29</sup> Ki bi din yikin sanpaapowa ki yeen a, “Fin Yennu Bija, timm nan fin, nlee mantiki? A baar nna a fan dinnit farae-e? n̄aan ki li yoo daa ki baari.”

<sup>30</sup> Ton, doorii bonchiann din see kpin po nna, ki di, ki ki fok nammi. <sup>31</sup> Ki narinbiit man din barin Yiisa bonchiann ki yeto a, “Li-i tee ki a nyinnit, fan chabit ki tin saan koo doorii na ni.”

<sup>32</sup> Ki Yiisa betib a “Ii saa man.” Ki bi nyii jab man ni, ki saan koo doorii na ni; ki doorii na kur tin birr, ki sik kunkonn na ki saan baa mɔkgbenjir na ni ki dii nyun.

<sup>33</sup> Ki binba guu doorii manj firr ki chiar saan doo ni, ki saa moont linba kur teen, nan bianjinba ki narinbiit nyii jab na ni. <sup>34</sup> Ki doo na niib kur bit ki saan ki saa took Yiisa. Baa din lau yoo nba, ki bi barimo a wun nyi bi tinj ni.

## 9

*Yiisa nba din te ki gbanankpeenn daano la laafia bianjinba*

*(Mak 2.1-12; Luk 5.17-26)*

<sup>1</sup> Njanne ki Yiisa nmat koo burgbetir na ni, ki poot mokgbenjir na gbingbanleer, ki kun u doo ni. <sup>2</sup> Nisiab din tan jii jasoo ki u gbanant kpowa; ki bi paano lian paak ki baar nanao Yiisa boor. Yiisa nba la baa teeno yada bianjinba na, ki u yet baatoo na a “N bik, ii mok parcheenn; n nyik chab a biita.”

<sup>3</sup> Ki sennu wantesiab ji dukii bi para ni a “Joo na yekint u moŋ nan Yennu-e.”

<sup>4</sup> Yiisa narin din bann bi dudukit manja, ki boib a “Bee teen ki i dukii dudukbiit na i para ni?

<sup>5</sup> Maa yet baatoo na a ‘N nyik chab a biit’ koo maa saa yeto a ‘Fiit kii somm na,’ maan munlee na lannpoe paari? <sup>6</sup> N ji saa wanni nan min nisaarik Bik mok yiikoo tingbouŋ na ni ki saa nyik chab niib bi biit,” naan jiant bet joo nba ki u gbanant kpo na a “Fiit ki jii a lian kii kun.”

<sup>7</sup> Ki joo manj firr ki kun. <sup>8</sup> Nibur na nba la nna manj, ki janmaanii soorib; ki bi piak dont Yennu nan waa tur nisaarik yiikoo na booru na.

*Yiisa nba din yiin Matiu bianjinba*

*(Mak 2.13-17; Luk 5.27-32)*

<sup>9</sup> Ki Yiisa nyii lenj ki saa, ki saa la jasoo, ki bi yiu Matiu, ki u kar u toonn paak lampogaar-diiuk ni; ki Yiisa beto a “Fiit kii waan.” Ki u fiir ki waau.

<sup>10</sup> Yiisa nba din saan Matiu manj njaak ki saa kar di jeet yoo nba, ki lampogaarteleeb nan biitdamm bonchiann koo ki tan kar pukin Yiisa nan u poorpoweiteeb po ki di namm. <sup>11</sup> Farisiinba na nba din la nna manj, ki bi boi u poorpoweiteeb na a “Bee ki i wantto manj di nan nibooru na?”

<sup>12</sup> Ki Yiisa gbat bi pinpauk manj ki yetib a “Binba mok laafia ki loon tebtoo; binba yiar, njamme loon tebtoo. <sup>13</sup> Li sob Yennu gbouj ni a ‘Yennu loon ninbatinue ki gar maruj.’ Ii saa man ki saa tumii ki bann linba na paak. N ki baar a n yiin popeendamm kaa; njan n baar a n yiin biitdamme, ki bin nyik bi biit.”

### *Moloru labaar*

*(Mak 2.18-22; Luk 5.33-39)*

<sup>14</sup> Ki Joonn nba wuur niib Yennu nyunwuru na poorpoweiteeb tan baar Yiisa boor ki boio a “Timm nan Farisiinba lorin moi yoo kura; bee teen ki a poorpoweiteeb ki lorimi?”

<sup>15</sup> Ki Yiisa jiin ki boib a “Poochiann-i be, saamm sii mok parbiir, yoo nba ki pooyookir soro daa be bi boor ni nawa-a? Aaii. Njan yoo baat, ki bi tan saa nyinn pooyookir soro na bi boor; li yoee ki bi saa lor moi.

<sup>16</sup> “Soo kan jii chabpaann ki lik takperi; li-i tee ki u teen nna, chabpaann na saa pat takper nae, ki li patimin saa namm pukin. <sup>17</sup> Soo bia kan sak liak dapaanin wajakorkper ni; wunba tun nna, dapaanin na-i tanj mo, li saa put koruk nae, ki

daan na n mɔɔn, ki kɔruk na n mun biir. Naan bi tuu jii dapaanin ki liak kɔrpaann nie, a li kura daa biiri.”

*Yudaansɔɔ bonpobik kuun labaar*

*(Mak 5.21-43; Luk 8.40-56)*

<sup>18</sup> Yiisa nba din daa piak ki teemm yoo nba na, ki yudaansɔɔ baar ki tan gbaan u tɔɔnn, ki yetɔ a “N bipoo dɔɔ ki kpowa; li paak, baat ki tan jii a nuu ki yii u paak, ki wun la manfoor.”

<sup>19</sup> Ki Yiisa nan u poorpoweiteeb weiɔ, ki bi saa.

*Poosɔɔ nba sii Yiisa liatir ki la laafia bianjinba*

*(Mak 5.25-34; Luk 8.42-47)*

<sup>20</sup> Poosɔɔ mun din be, ki siik fabouŋ ki tan jan bina piik nan ŋanlee; ki din tan baar ki bar lint Yiisa poorpo ki sii u liatir mɔgbann; <sup>21</sup> kimaan u poŋ din dakin u par niewa a, “Mi-i lekii sii u liatir gbaa, n saa la laafiawa.”

<sup>22</sup> Ki Yiisa jiant ki la poo na, ki betɔ a, “N niipoo, ii mɔk parcheenn. Faa teenin yada na paake te ki a la laafia.” Li taakpaak ni, ki u set la laafia.

*Yiisa nba fiin bonpobik na kuun ni bianjinba*

*(Mak 5.35-43; Luk 8.49-56)*

<sup>23</sup> Yiisa nba din saa baar yudaano maŋ ŋaak ni yoo nba, ki u la yerpebira peeb yerii, ki nibur bia bui kpemɔnii ki fabin. <sup>24</sup> Ki u betib a “Ii nyi man; bonpobik na ki kpo kaa, ŋaan u gɔɔnte.” Ki bi laau. <sup>25</sup> Ŋanne ki bi ber niib maŋ ki nyinnib; li yoo na ki Yiisa kɔɔ ki soor bonpobik na nuu, ki u yeent ki fiir. <sup>26</sup> Ki bi din mɔɔnt li labaar tingbouŋ maŋ kur po.

*Yiisa nba nyɔɔnt jɔɔnii banlee bianjinba*

27 Yiisa nba din nyii leŋ ki gaar saa tɔɔnn po na, ki jab nna banlee tee jɔɔnii ki waa u poorpo, ki yikin yeen a “Fin Defid yaaboonn, a tint ninbaauk.”

28 Yiisa nba din saan ki saa kɔɔ ɲasiak nna ni yoo nba, ki jɔɔnii na baar ki kɔɔ leŋ. ɲanne ki u boib a “I teen yada nan n saa fit turi laafiawa-a?”

Ki bi jiin a “Ti Yomdaano, nn.”

29 ɲanne ki u jii u nuu ki sii bi ninbina, ki betib a “Yaa teen yada bianjinba na, lin tun nna ki turi.” 30 Ki bi ninbina maŋ nyɔɔnt; ki u kpaamm fanu a bii mi ki bin bet sɔɔ li po.

31 ɲaan ki bi nyii ki mɔɔnt u labaar tin maŋ ni kura.

### *Bianjinba ki Yiisa te muuk pak*

32 Baa din fiir ki nyii yoo nba, ki siab mun baar nan jasɔɔ, wunba ki narinbimuuk be u ni na, Yiisa boor. 33 Ki Yiisa nyinn narinbimuuk na jɔɔ na ni, ki u ji piin ki piak li yoo. Li din jaar lit nibur maŋ, ki bi ji yeen a “Ti daa ki mi la bonbooru na, timm Israel teeb\* tin ni na.”

34 ɲaan ki Farisiinba na daan nyatuk a “Narinbiit bate teenɔ yiikoo a wuu nyint narinbiit niib ni.”

### *Bianjinba ki Yiisa mɔk ninbatinu nan niib*

35 Tɔn, Yiisa din kak lin doi nan digbanbis kur ni, ki kɔɔ Yenjiantu diit ni, ki mɔɔntir Yennu naan barɲanii ki want niib, ki te binba yiar yiarboorii boorii kur la laafia. 36 Waa din la nibur maŋ, ki ninbaauk sooro, kimaan bi din tee

---

\* **9:33** 9.33 Juu teeb sanleere tee Israel teeb.

tatimme ki kaa sommtoo, ki naan pei nba kaa pekpaarik. <sup>37</sup> Nanne ki u bet u poorpoweiteeb a “Dii na beer ki bia yaba, naan ki dijaara waar. <sup>38</sup> Li paak, ii mei man kpaab man daano ki wun namm pukin dijaara, ki te ki bin saan jaan u dii man.”

## 10

*Ki jün toomiinba piik nan banlee na po*  
(Mak 3.13-19; Luk 6.12-16)

<sup>1</sup> Yiisa din yün u poorpoweiteeb piik nan banlee na, ki turib yikoo a bii nyint narinbiit niib ni; ki te ki binba yiar yiarboorii boorii kur n la laafia. <sup>2</sup> U toomiinba\* piik nan banlee man sanae na: Sinsinn yooe tee Simonn, wunba sann bia tee Piita na; nan u waaro Andru; nan Jeems nan u waaro Joonn, binba din tee Sebedii waas na; <sup>3</sup> nan Filip nan Batolomiu; nan Tomas, nan Matiu, wunba din tee lampogaartoo na; nan Jeems nba din tee Alfeus bija na, nan Tadeus; <sup>4</sup> nan Simonn nba din loon namm Juu teeb-ii yen bi moŋ na, nan Judas Iskariot wunba din tan nyii Yiisa poor na.

*Yiisa nba din tun u poorpoweiteeb man bianinba*  
(Mak 6.7-13; Luk 9.1-6)

<sup>5</sup> Ki Yiisa tun u poorpoweiteeb piik nan banlee man, naan kpaamm a bii mi ki bin saan binba ki tee namm Israel teeb† na boor, a bii mi ki bin

---

\* **10:2** 10.2 Bi yi u poorpoweiteeb piik nan banlee mane toomiinba. † **10:5** 10.5 Juu teeb sanleere tee Israel teeb.

koo Samaria teeb doi ni, <sup>6</sup> a n̄aan bin saan Israel teeb nba tee nan pei nba bot na boor kuukoo. <sup>7</sup> U din yetib a, “Yaa saa na, yii m̄oontir Yennu naan bar̄nani na, kii yeen a ‘Yennu naan dinu per na,’ <sup>8</sup> ki te ki baatib-ii laat laafia, kii fiint kpeemm, ki bia te ki gbaata-ii laat laafia, kii bia kii nyint narinbiit niib ni. I gaar yanne, ii muni teen man yann. <sup>9</sup> I daa jikit likirii. Ii mi man ki yin jii kobu gbaa ki teen i likb̄oorii ni. <sup>10</sup> Ii mi man ki yin jii paka ki saan i sonu maŋ, koo liata n̄anlelee, koo taasaati, koo kii dia patii; kimaan li n̄an ki toontunno n di u toona ni.

<sup>11</sup> “N̄aan digbangbeŋa koo digbanbis nba ni ki i saa koo, yin boi ki la popeendaano n̄aaka, ki koo kii be leŋ nan i fiiru daar. <sup>12</sup> Ki yoo nba ki i yaa i koo n̄aak nba ni, yin foont n̄aak maŋ ni teeb fanu. <sup>13</sup> N̄aak maŋ teeb-i tee burchimm, i parmaasir n biar bi paak; n̄aan burchimm-i kaa lenji, i parmaasir maŋ n jen i boor. <sup>14</sup> Wunba saa ȳet i gaaru, ki bia ȳet wun gbat i bar̄nani m̄oontii maŋ, yoo nba ki i nyi n̄aak maŋ ni, koo doo maŋ ni, yin pit pit i taapant ni tant ki lu leŋ maŋ. <sup>15</sup> Barm̄oniie ki n beeri na, daar nba ki Yennu tan saa bu niib buut na, doo maŋ niib tubdatu tan saa gar Sodom nan Gomora teeb yara.

*Biak baaru labaar*  
(Mak 13.9-13; Luk 21.12-17)

<sup>16</sup> “Gotir man, n tuumie, ki i sii tee nan pei nba be kinkata sinsuuk ni na. Ii sub man nan wai‡ na, n̄aan kii be soon nna nan n̄mana na. <sup>17</sup> Ii

‡ 10:16 10.16 Bi yaa waauko mantik sub.

mi man niib po, kimaan bi tan saa soori ki saan nani barbuteeb boor; ki bia booi Yenjiantu diit ni. <sup>18</sup> Bi tan saa saan nani tin yudamm nan kpanbara boor ki bin bu i buut, kimaan yaa waan na paak; ñaan i tan saa bet ñamm nan binba ki tee Juu teeb na n barñanii. <sup>19</sup> Ñaan bi-i tanji saan nani buut damm boor; i daa te ki li daamii-i nan yaa saa pak linba, nan bianjinba ki i saa pak, kimaan li yooe ki Yennu Seyeen saa turi mɔbona nba ki i saa pak jiinib, <sup>20</sup> kimaan li ki tee yimm kaa tan saa paki, ñaan i Baa Yennu Seyeenje tan sii be i ni ki piak.

<sup>21</sup> “Li yoo man, niro tuu tan saa fikis u moñ moñ ninja ki bin kpiu; ki baanba mun tan saa fikis bi waas ki bin kpib; ki waas mun bia tan saa kon nan bi damm ki chabib nan kuun. <sup>22</sup> Ki soo kur tan sii nami kimaan yaa waan na paak; ñaan wunba tan gubin nan biak yoo na joontu tan saa la tinnuwa. <sup>23</sup> Bi-i tanji mukisi digban-yenn ni, yin nyi len ki loor digbanleer ni; ñaan barmoniie ki n beeri na, i kan fit lin ki gbenn Juu teeb digbana kur kaawa, ki min nisaarik Bik jenna.

<sup>24</sup> “Tɔn, tumiitoo ki gar u wanttoo; daabir mun bia ki gar u yomdaano. <sup>25</sup> Li ñan ki tumiitoo binben-ii tee nan u wanttoo binben na; ki daabir binben-ii munii tee nan u yomdaano binben na. Bi-i tanji pur ñaadaano narinbiit bat Beelsebul-i, bi ji sii yi u ñateeb bia?

*Ti saa tin ñmee janmaanii?  
(Luk 12.2-7)*



26 “I daa tiin niib jaŋmaanii, kimaan barsai kaa ki be woonin ni ki tan kan wooti, koo ki bɔr ki tan kan nyi paanu. 27 Linba ki n beeri bunbɔnn ni na, ŋaan nyintir man yeenin ni; ki linba ki n lɔkinii na, nyintir man paanu ni. 28 I daa tiin binba saa fit kpi i gbanant, ŋaan kan fit kpi i sei; ii tiin man Yennu, wunba saa fit biir i gbanant nan i sei kura muu ni na. 29 Bi kɔi jinjera banlee jinjen kuukɔɔe, ŋaan li-i kii tee i Baa Yennu loommi, bi yenɔkɔɔ gbaa kan baa tin ni. 30 Yimm ŋarin, Yennu mi i yut kann gbaa. 31 Li paak, i daa tiin jaŋmaanii, kimaan i mɔk nyɔɔt ki gar jinjera bonchiann.

*Li nyint a mɔŋ paanu nan a tee Yiisaweirɔe  
(Luk 12.8-9)*

32 “Wunba nyint u mɔŋ paanu nan u tee n weirɔe, nnae ki n mun tan saa nyinnɔ paanu n Baa Yennu nba be sanpaapo na boor. 33 Wunba yaa u ki tee n weirɔ, niib ni, nnae ki n mun tan saa yet a n ki miu, n Baa nba be sanpaapo na boor.

*Bɔkitu labaar  
(Luk 12.51-53; 14.26-27)*

34 “I daa dukii nan n baar nan parmaasire tingboun na teeb paak; n ki baar nan parmaasir kaa, ŋaan n baar nan bɔkitue. 35 N baar maa n tan tukin bonjake nan u baa, bonpook nan u naa, poo nan u siponaa. 36 Nirɔ mɔŋ mɔŋ ŋaateebe tan sii tee u datai.

37 “Wunba loon u naa koo u baa ki garin, u ki ŋan nan wun teen n poorpoweitɔɔ; wunba mun bia loon u bija koo u bipoo ki garin, u ki ŋan

nan wun teen n poorpoweitoo. <sup>38</sup> Wunba ki jii u kuun dapunpunn ki waami, u ki njan nan wun teen n poorpoweitoo. <sup>39</sup> Wunba dekii u manfoor tan saa kɔnjira, njan wunba likin u saanman n paak, u tan saa la u manfoor man.

*Binba tan saa la paauk labaar*  
(Mak 9.41)

<sup>40</sup> “Wunba gaari saauj, u gaar mine; ki wunba mun gaarin saauj, u gaar Yennu nba tumin nae. <sup>41</sup> Wunba gaar Yennu sokinii saauj nan waa tee Yennu sokinii na paaki, u tan saa gaar Yennu sokinii nyootte. Wunba gaar popeendaano saauj nan waa tee popeendaano na paaki, u tan saa gaar popeendaano nyootte. <sup>42</sup> Wunba finn nyunmaasin waamina ki tur n poorpoweitoo yeno nba po i ni gbaa, nan waa tee n poorpoweitoo na paak, barmoniie ki n beeri na, u kan mi kɔnj li nyootti.”

## 11

*Jɔɔnn nba din wuur niib Yennu nyunwuru na labaar*  
(Luk 7.18-35)

<sup>1</sup> Yiisa nba din wann u poorpoweiteeb piik nan banlee na ki gbenn yoo nba, ki u nyii lej ki saan bi doi ni ki mɔontir Yennu maan ki want niib.

<sup>2</sup> Tɔn, Jɔɔnn nba din wuur niib Yennu nyunwuru na din be dansarik ni, ki tan gbat Yiisa Masia toona po, ki tun u poorpoweiteeb Yiisa boor <sup>3</sup> a bin saa boio a “Fine tee wunba yaa wun tan baar na, koo tii daa kii guu soo?”

<sup>4</sup> Ki Yiisa bet Jɔɔnn toomiinba maŋ a “Ii ŋmat man ki saa bet Jɔɔnn linba ki i gbat ki bia la na, <sup>5</sup> a i la ki jɔɔnii nyɔɔntir, ki wɔbii taa naatir ki bi somm, ki gbaata ŋaat gbent, ki tuukpaa ji gbia, ki kpeemm fi kuun ni, ki talasdammm gbiintir barŋanii na mɔɔntii. <sup>6</sup> Parpeenn be wunba ki birisin na paak.”

<sup>7</sup> Tɔn, Jɔɔnn toomiinba na nba nyii leŋ ki ŋmat kun yoo nba, ki Yiisa ji piin ki boi niib maŋ buboit ki jiin Jɔɔnn po a “Yaa daan saan Jɔɔnn peŋ muuk ni na, i daan dukii a i saa la bee? I daan mi a i saa la muuk nba ki wouŋ damm nae-e? <sup>8</sup> I mantik jia daan saan a i la bee? Niro ki u lia taŋant amii? Binba lia taŋant be kpanbara ŋei nie. <sup>9</sup> Naan i mantik jia daan saan a i la bee? I daan dukii a i saa la Yennu sɔkiniie-e? Barmɔniie ki n beeri na, Jɔɔnn ŋarin gar sɔkiniywa. <sup>10</sup> U poe ki Yennu gbouŋ poŋ din sɔb ki want na a, ‘N saa tun toomu ki wun liit ki ŋamm a baaru sɔnu.’ ” <sup>11</sup> Ki Yiisa bia yetib a “Barmɔniie ki n beeri na, bi daa ki mi mar sɔɔ ki u chee Jɔɔnn nba daan wuur niib Yennu nyunwuru na, ŋaan wunba joont tarik Yennu naan ni chee Jɔɔnn. <sup>12</sup> Laa nyii Jɔɔnn maŋ yoo ki tan tuu mɔtana, binba ninbina mɔn nan bin tan kɔɔ Yennu naan ni na, dia nan ninmɔnne a bin tan kɔɔ nan paŋ. <sup>13</sup> Yennu sennu nan u sɔkiniinba maan na poŋ din pak ŋɔɔ Yennu naan poewa, ki Jɔɔnn tan baar. <sup>14</sup> Li-i tee ki i loon yin teen linba na yadaie, ŋɔɔ Jɔɔnn-e tee Yennu sɔkinii Elaija, wunba yaa wun tan baar na. <sup>15</sup> Wunba mɔk tuba, wun gbiint.”

<sup>16</sup> Ki Yiisa bia yet a “Yimm, mɔtana nigbouŋ



*Baat n boor ki tan gaar foon man*  
(Luk 10.21-22)

<sup>25</sup> Li yoo maŋ ki Yiisa yet a “N Baa Yennu nba tee sanpaapo nan tingboun na Yomdaano, n piaka, kimaan a boor a maan na subindamm nan bannteebe, ŋaan fiit wann waas; <sup>26</sup> kimaan nnae ki a tuun a toona ki li mana.

<sup>27</sup> “Tɔn, n Baa Yennu-e wannin barii na kura; ki soo ki mi maa tee wunba, see n Baa maŋ; ki soo mun bia ki mi n Baa maŋi, see min, u Bija na, nan binba ki n loon ki n fiit wannib na.

<sup>28</sup> “Yimm nba tun toona ki jii jik-kpiata ki bak na, baat n boor man, ki n turi foon. <sup>29</sup> Ii sak n weiu man, kii tumii n wannu, ki i saa la foon, kimaan n tee sikin-n-moŋ daano, ki n par mei.

<sup>30</sup> N weiu ki paar, ki n jikir bia ki kpai.”

## 12

*Ki jün foon daar na po*  
(Mak 2.23-28; Luk 6.1-5)

<sup>1</sup> Li poor po ki Yiisa nan u poorpoweiteeb tan gaar dii kpaab ni foon daar; ki kon mox u poorpoweiteeb na, ki bi konii dikara ki pinii ŋman. <sup>2</sup> Farisiinba na nba la nna maŋ, ki bi bet Yiisa a “Gotir, a poorpoweiteeb na tuun linba ki ti sennu ki chab nan tii tuun foon daari.”

<sup>3</sup> Ki Yiisa boib a “I ki karin Yennu gboun ni Defid nba din tun bianjinba-a? Kon nba din soor ŋoo nan u joomu, <sup>4</sup> ki u koo Yennu ŋasaakak ni ki saa jii Yennu boroboro, ki ŋoo nan u joomu na ŋman; ŋaan ki sennu na din ki chab nan bi soo n di Yennu boroboro maŋi, see Yennu mannteeb kuukoo. <sup>5</sup> Koo i ki karin Yennu sennu gboun ni,

mannteeb nba din tuun bianjinba-a? Bi din tuu yoo tuun toona Yenjiantu nasaakak ni foon daar kur, ki biir sennu na, njaan kaa biiti. <sup>6</sup> Njaan n beerie, wunba chee Yenjiantu nasaakak na be nna. <sup>7</sup> Li sob Yennu gbouŋ ni a 'Yennu loon ninbatinue ki gar maruŋ.' Li-i tee ki i bo bann linba na paaki, i bo kii piak ki biir binba kaa biiti; <sup>8</sup> kimaan min nisaarik Bike yen foon daar."

*Yiisa nba din te ki nuukpeenn daano paak bianjinba*

*(Mak 3.1-6; Luk 6.6-11)*

<sup>9</sup> Ki Yiisa nyii leŋ ki saan koo bi jiantu diiuk ni. <sup>10</sup> Ki jasoo mun din be leŋ, ki u nuu kpo. Ki siab din loon bin la Yiisa biit ki biiro; li paak, ki bi boio a "Ti sennu sak a niro n te ki baatoo n la laafia foon daari-i?"

<sup>11</sup> Ki u mun nmant boib a "I yeno-i mok peyenokoo, ki peeuk maŋ tan baa bunbunn ni foon daar; u kan donno foon daar na-a? <sup>12</sup> I ki mi nan nisaarik mok nyoot ki gar peeuku-u? Li paak, sennu na chab a tii tuun toonjana foon daar." <sup>13</sup> Nanne ki u nmant bet nuukpeenn daano na a "Tantir a nuu na." Ki u tant, ki li la paŋ ki tee nan leer na.

<sup>14</sup> Ki Farisiinba na nyii nanyer, ki lor nan leeb baa saa teen bianjinba ki kpi Yiisa.

*Ki jiin Yennu bigannkak na po*

<sup>15</sup> Ki Yiisa bann bi lor maŋ po, ki nyii leŋ. Ki niib bonchiann waa u poor. Ki u te ki baatib kura la laafia, <sup>16</sup> njaan kpaamm nan ninmonn a bi daa moontiro. <sup>17</sup> U din tun nnae a linba ki Yennu sokinii Aisaya din sokin na n gbee a,

18 “N toontunnɔe na, ɲɔɔe ki n gann, ki mantik loonɔ.

N par mei u paak.

N saa jii n Seeke ki teen u ni.

U tan saa mɔɔnt buut nba took  
ki tur binba ki tee Juu teeb.

19 U tan kii mɔk mɔniɔk,  
ki bia tan kii tee kpayɔk daanɔ,  
koo ki pak nan kunkɔsaakar sɔnii ni.

20 U tan kan kɔnn lanbankɔɔnn ki tonti,  
ki bia tan kan kpeen fitir nba ki di fanu.

U tan saa te ki barbuut nba took n la nyannu.

21 U sann paake, ki binba ki tee Juu teeb na  
tan sii mɔk dindann.”

*Yiisa nan narinbiit bat Beelsebul labaar  
(Mak 3.20-30; Luk 11.14-23)*

22 Li yoo na ki nisiab baar nan jasɔɔ ki narinbiit be u ni, ki teenɔ muuk, ki bia teenɔ jɔɔɲ; ki Yiisa te ki u la laafia, ki u ninbina nyɔɔnt, ki u ji laat, ki bia muut ki ji piak. <sup>23</sup> Ki li yaar lit niib na kur bonchiann, ki bi boi bi leeb Yiisa po a “Jɔɔ nae nok tee Defid yaaboonn na-a?”

24 Naan Farisiinba na nba gbat nna man, ki bi yet a “Narinbiit bat Beelsebul-e\* teen jɔɔ man yiikoo, a wuu nyint narinbiit niib ni.”

25 Ki Yiisa bann baa dukii linba, ki betib a “Naan niib-i ɲmat kɔn ki tookit bi leeb, bi naan man saa biira. Ki doyenknɔɔ niib koo ɲayenknɔɔ niib-i ɲmat kɔn nan leeb, li kan seti. <sup>26</sup> Li-i tee ki Sintaanii nyint Sintaanii, li want nan u kɔn ki bokitir u mɔɲe; nlee ki u naan na saa seti?”

---

\* **12:24** 12.24 Sintaanii sanleere tee Beelsebul.

27 Ki li-i tee Beelsebul teenin yiikoo a mii nyint narinbiit niib ni, ki yimm muni, ηmee chab i niib a bii nyint narinbiiti? I mɔŋ niib maŋ toonae want nan i ki mɔk mɔnii. 28 Njaan min ηarin, Yennu Seyeen paake ki n nyint narinbiit niib ni; ηanne mun bia want nan Yennu naan be i boor ni.

### *Yiisa fit lor Sintaanii*

29 “Soo kan fit koo jawakitir† ηaak ni ki bakir u bona ki nyi nann, li-i kii tee li yoo doŋ lora ηmiiti kaawa, ηaan fit koo ki bakir u bona maŋi.

30 “Wunba ki see n poor, u kon nanime; ki wunba mun ki tikii niib ki teenimi, u yatibe.

31 Li paake ki n beeri na, Yennu saa nyik chab nisaarik u biit nan barbiit kura; ηaan wunba sukii Yennu Seyeen, Yennu kan mi nyik chab li daano. 32 Wunba piak barbiit ki teen min nisaarik Bik, Yennu saa nyik chabo; ηaan wunba piak barbiit ki teen Yennu Seyeeni, Yennu kan mi nyik chab li daano durinya na ni, koo durinya nba tan saa baar na ni.”

### *Tiik nan u loona barjouk*

*(Luk 6.43-45)*

33 Ki Yiisa bia yet a “Li-i tee ki tiik ηan, u loon loonηanae; ηaan li-i tee ki tiik ki ηani, u loon loonbiite, kimaan tiik loona nie ki bi banto. 34 Yimm waalabirii booru na, yaa tee nifobiit bianinba na, nlee ki barηanii saa nyi i mo i ni? Kimaan linba ki nisaarik dukii u par ni, ηanne bia nyi u mo b ni. 35 Niηano tuun

† 12:29 12.29 Jawakitir maŋe tee Sintaanii, ηaan Yiisa mɔk paŋ ki garo, ki lora ηmiit.



toonɲana, kimaan u par ni ɲan; ki nibiiuk mun tuun toonbiit, kimaan u par ni bi.

<sup>36</sup> “N beerie, barbuut daar Yennu tan saa bu niib buut nan baa pak baryana kur nba paak, <sup>37</sup> kimaan soɔ kur pinpako tan saa nyinnɔ koo ki kooɔɔ daar man ni.”

*Ki jiin binba loon bin la nyina na po  
(Mak 8.11-12; Luk 11.29-32)*

<sup>38</sup> ɲanne ki sennu wantteeb nan Farisiinba na bet Yiisa a “Wanttɔɔ, ti loon ki a tun bakitnaun nyinne ki wannit.” <sup>39</sup> Ki u jiin a, “Mɔtana nigbouɲ nba tee biitdamm ki bia ki waa Yennu na loon bin la bakitnaun nyinae; ɲaan n kan mi tun nyinsiar ki turibi; Yennu sokinii Jona nyinbooru na kooe ki n saa wannib: <sup>40</sup> Jona nba din be jangbenjir poor ni yonnu nan nyioɔk ki saan jan daa ɲantaa na, nnae ki min nisaarik Bik mun tan sii be tij ni yonnu nan nyioɔk ki saa jan daa ɲantaa. <sup>41</sup> Buut daar, Ninefe teeb tan saa set wann nan mɔtana nigbouɲ na mɔk biit; kimaan Jona nba din mɔont Yennu maan ki turib na, bi din nyik bi biite; gotir man, wunba chee Jona be nna. <sup>42</sup> Buut daar, poobat nba din nyii niidiitu po na mun bia tan saa set wann nan mɔtana nigbouɲ na mɔk biit, kimaan u din nyii digbann banfokirewa ki tan baar a wun gbiint Bat Solomonn yanfoon na pinpauk; gotir man, wunba chee Solomonn be nna.

*Narinbiiuk nba tuu jen koo niro ni bianjinba  
(Luk 11.24-26)*

<sup>43</sup> “Li-i tee narinbiiuk tan nyii niro ni, u tuu yeeke ki lin kunkoouk paak, ki loon foon boor,

ɲaan ki ki laati; <sup>44</sup> li paak, u tuu tan yet u moɲe a 'N saa ɲmat saan ɲaak nba ki n daan nyii na nie;' wu-u ji kii ɲmat baar, ki la ki li doo yann, ki bi piar ɲamma, <sup>45</sup> u ji saa ɲmat nyie ki saa yiin narinbileeb banlore, binba bi ki chee u, ki baar namm, ki bin koo ki lakin be; niro maɲ binben sii bi bonchiann ki gar waa daan tuu be sinsinn bianɲinba na. Linba nae tan saa baar motana nigboun nba tee biitdamm na paak."

*Ki jiin Yiisa waarii nan u naa po  
(Mak 3.31-35; Luk 8.19-21)*

<sup>46</sup> Yiisa nba din daa piak ki teen niib na yoo nba, ki u naa nan u waarii baar ki see nanyer po, ki tun soo a wun yiino ki bin pak nana. <sup>47</sup> Nanne ki soo beto a "Gotir, a naa nan a waarii see nanyer po ki loon bin pak nana."

<sup>48</sup> Nanne ki Yiisa boi niro nba beto na a "Nmee tee n naa? ki lamme tee n waarii?" <sup>49</sup> ɲaan tant u nuu ki wann u poorpoweiteeb ki yet a "Gotirii, n naa nan n waariie na. <sup>50</sup> Wunba kur tuun n Baa Yennu nba be sanpaapo na loommu, ɲooe tee n ninja, nan n niipoo, nan n naa."

## 13

*Tanburtoo barjouk  
(Mak 4.1-9; Luk 8.4-8)*

<sup>1</sup> Li daar maɲ ki Yiisa nyii ɲaak na ni ki saan kar mokgbenjir kpin. <sup>2</sup> Ki nibur lakin u boor; li paak, ki u saan koo kar burgbetir ni, ɲaan ki nibur na see gbingbann. <sup>3</sup> Ki u yimm barjokit bonchiann ki yet a "Jasoo din doo kpaab a wun saa bur tan. <sup>4</sup> Waa din buur na ki bonboorii na

yenn nba yat baa sɔnjouk ni, ki nɔɔnii baar ki dii.  
<sup>5</sup> Ki leer mun baa tanpuut paak, siaminba ki tant  
 ki yabi, ki pia ki kpaat yiama, kimaan tant ki yab  
 lenji, <sup>6</sup> ɲaan yonnu nba din tan toɲ yoo nba, ki li  
 jɔɔk. Laa din ki fit sikin jiina na paak, li kur din  
 kpoe. <sup>7</sup> Ki leer mun bia baa kunkonii jiina ni, ki  
 tan lakin pia ki kpaat nan kunkonii na, ɲaan ki  
 kunkonii na ɲmabirir. <sup>8</sup> Ki leer mun baa tinɲaɲ  
 ni, ki nan naanɲaun; ki siab nan kobik kobik,  
 siab piinloob-loob, ki siab mun piintaa-taa.

<sup>9</sup> “Wunba mɔk tuba, wun gbiint.”

*Barjokit na yinu paak*  
*(Mak 4.10-12; Luk 8.9-10)*

<sup>10</sup> ɲanne ki Yiisa poorpoweiteeb na baar u  
 boor ki tan boio a “Bee ki a piak barjokit kuukɔɔ  
 ki teen niib na?”

<sup>11</sup> Ki u betib a “Yimm ɲarin, Yennu chabi a  
 yin bann woonin ni barii ki jiin u naan po,  
 ɲaan ɲamm ɲarin, u ki chabibi. <sup>12</sup> Tɔn, wunba  
 mɔk Yennu bannu, ɲɔɔe sii laat pukii ki mɔk  
 bonchiann, ɲaan wunba ki mɔki, u saa kɔɲ linba  
 ki u mɔk na gbaa. <sup>13</sup> Li paake te ki n yiimm  
 barjokit, kimaan bi goriie, ɲaan ki ki laati, ki bia  
 gbia, ɲaan ki ki bant li paaki. <sup>14</sup> Bi binbeɲ na  
 paake te ki Yennu sɔkinii Aisaya nba din sɔkin  
 linba na set tan gbee nan mɔnii. U din yaa Yennu  
 yet a:

‘Niib maɲ set saa gbat,  
 ɲaan bi kan bann li paaki.  
 Bi set saa la,  
 ɲaan bi kan bann baa la linba maɲ paaki.  
<sup>15</sup> Kimaan niib na yan dɔkine,

bi tuba mun paar,  
 bi bia mun bi ninbinae,  
 kimaan bi ki loon bin la siari,  
 ki bia ki loon bin gbati,  
 ki bia ki loon bi yan n dokiti,  
 ki bia ki loon bin nyik bi toonbiit,  
 ki n te ki bin la laafia.'

<sup>16</sup> "Tɔn, yimm ɲarin, parpeenn tee i yare, kimaan i ninbina laat; ki i tuba bia gbia. <sup>17</sup> Ɗaan barmɔniie ki n beeri, Yennu sɔkiniinba nan yentinna bonchiann din loon bin la linba ki i laat na, ɲaan ki la, ki bia din loon bin gbat labaar nba ki i gbia na, ɲaan ki gbati."

*Tanburtɔɔ barjouk na paak*  
*(Mak 4.13-20; Luk 8.11-15)*

<sup>18</sup> Ki Yiisa yet u poorpoweiteeb a "Ghiintir man ki bann tanburtɔɔ barjouk na paak. <sup>19</sup> Niro-i gbat Yennu naan barɲanii, ɲaan ki bann li paaki, Sintaanii tuu baare ki tan nyinn linba bo kɔɔ li daano par ni na; ɲanne tee bonboorii nba baa sɔnjouk paak na. <sup>20</sup> Bonboorii nba mun baa tanpuut paak na tee nan wunba gbat Yennu maan ki gaar yiama nan parpeenn; <sup>21</sup> ɲaan ki li daa ki sik u par ni fanu, u tuu yabir waaminna; ɲaan biak koo mukisuk-u baaro Yennu maan na paak, u tuu foke lu yiama. <sup>22</sup> Bonboorii nba baa kunkonii jiina ni na mun tee nan wunba gbat Yennu maan na, ɲaan ki tingbouŋ na daamii nan mɔkint lomm nyakin maan maŋ u par ni nae, li kan nami. <sup>23</sup> Ki bonboorii nba baa tinɲaŋ ni na tee nan wunba gbat Yennu maan na, ki bann li paak, ki li tan kpaat ki nan; ki siab nan kobik

kobik, siab mun nan piinloob-loob, ki siab mun bia nan piintaa-taa nae.”

### *Dinatimii barjoux*

<sup>24</sup> Ki Yiisa bia yimm barjoux na ki pukin a “Yennu naan tee nan jasoo nba din doo u kpaab ni ki saa bur diboornanii, naan nmat kun. <sup>25</sup> Ki niib tan doo, ki u dataak saan bur dinatimii ki koon diboornanii na ni, naan yaat. <sup>26</sup> Dii na nba din tan puk ki ji maar yoo nba, ki bi ji bann nan dinatimii be lenj. <sup>27</sup> Nanne ki u naatoontunna baar ki boio a ‘Chanbaa, diboornanii kuukoo kaa ki a daan bur a kpaab na ni-i? Naan li teen nlee ki dinatimii tan be lenj?’ <sup>28</sup> Ki u betib a, ‘Datasooe tun nna.’ Ki bi boio a, ‘Ki a loon tin saan ki nabir dinatimii manji-i?’ <sup>29</sup> Nanne ki u jiin a ‘Aaii, kimaan i-i yaa yin nabirir, i tan saa kpet nabir dinaniie. <sup>30</sup> Li paak, nyikin man ki lii be nan dijaan-yoo; ki dijaan-yooe ki n tan saa bet dijaanteeb na ki bin choo dinatimii na sinsinn ki poon ki joo muu; naan kpen nan dinanii na ki tan wuun, n dii sinsoj ni.’ ”

### *Bonboorik barjoux*

*(Mak 4.30-32; Luk 13.18-19)*

<sup>31</sup> Ki Yiisa bia yimm barjoux na ki pukin a “Yennu naan tee nan kanperik binn nba ki niroo din jii ki bur u kpaab ni, <sup>32</sup> ki li waar ki gar bonboorii kur, naan ki li tan pia ki kpaat, ki tan teen tiik, ki yab bonchiann, ki noonii baat ki jak li yiinii paak nae.”

### *Datinj barjoux*

*(Luk 13.20-21)*

<sup>33</sup> Ki Yiisa bia yimm barjoux na ki pukin a “Yennu naan tee nan datin nba ki poo tuu jii ki nmat nan boroboro yon nba yab, ki lin tan miik ki ji fuut do nae.”

*Barjokit man yinu paak*  
(Mak 4.33-34)

<sup>34</sup> Yiisa din yin barjokite ki piak linba na kur ki teen nibur na. U din ki pak siar ki turib ki li ki tee barjoux ni kaa. <sup>35</sup> U tun nnae a linba ki Yennu sokiniisoo din sokin na n gbee a, “N tan saa yaat n mob ki yet barjokite, ki pak fiit wann woonin ni bona nba din woon ki ki nyii paanu durinya piinu niwa ki tan tuu motana na.”

*Dinatimii barjoux na paak*

<sup>36</sup> Nanne ki Yiisa nyik nibur man len, naan saan koo u nadootik ni. Ki u poorpoweiteeb baar u boor ki tan yeto a “Betirit dinatimii barjoux na paak.”

<sup>37</sup> Ki u betib a “Min nisaarik Bike tee wunba bur diboornanii na. <sup>38</sup> Tingbouj nae tee kpaab na; ki diboornanii na tee Yennu naan ni niib; naan ki dinatimii na mun tee Sintaanii niib. <sup>39</sup> Dataak nba bur dinatimii na mun tee Sintaanii; ki dijaan-yoo na tee durinya na gbennu; ki dijaanteeb na mun tee Yennu malakanba. <sup>40</sup> Bianinba ki bi tikir dinatimii ki joo muu na, nnae ki li tan sii tee durinya na gbennu daar. <sup>41</sup> Min nisaarik Bik tan saa tun n malakanba ki bin gann nibiit kur nba te ki leeb tuun toonbiit, nan biitdamm kur nba be n yent ni, <sup>42</sup> ki lub musaakau ni; lenje ki bi tan sii mo fabin ki nman

bi nyana. <sup>43</sup> N̄aan li yoo maŋ, yentinna kur tan sii be bi Baa Yennu n̄aanaan niewa, ki nyirii nan yonnu nba nyirii na. Wunba m̄ok tuba, wun gbiint.

*Barjouk nba jiin m̄okint nba b̄or na po*

<sup>44</sup> “Yennu naan tee nan m̄okint nba din b̄or tiŋ ni s̄oo kpaab ni nae; ki jas̄oo tan baar ki la ki n̄amm gbiir tant piinir, n̄aan saan nan parpeenn ki saa k̄oi waa m̄ok linba kura, ki jen tan daa kpaab maŋ.

*Tuliat barjouk*

<sup>45</sup> “T̄on, Yennu naan bia tee nan daak̄oōō nba din kak lin ki loon tuliat nba n̄an, a wun daa nae. <sup>46</sup> U din saa la yenn ki li daauk paar bonchiann; ki u n̄mat saa k̄oi waa m̄ok linba kur, ki saan daa tuliat maŋ.

*Janlaauŋ barjouk*

<sup>47</sup> “Yennu naan bia tee nan janlaauŋ nba ki bi lu ki soor janbooru booru nae. <sup>48</sup> Laa din gbee yoo nba, ki bi dat donn gbingbann, ki kar gann jan̄anii ki teen chibit ni, n̄aan lu janbiit na. <sup>49</sup> Li tan sii tee nnae durinya na gbennu daar; Yennu malakanba tan saa baare ki gann nīamm, n̄aan nyik nibiit. <sup>50</sup> Bi tan saa jii nibiit maŋ ki lub musaakau ni. Leŋewa, ki niib tan sii m̄o fabin ki n̄man bi nyana.”

*Ki jiin barkperii nan barpaanii po*

<sup>51</sup> N̄anne ki Yiisa boib a “I bann barjokit maŋ kur paaka-a?”

Ki bi sak a “Nn.”

<sup>52</sup> Ki u betib a “Li paak, Yennu sennu wantoo nba kur tumii n wannu, ki jiin Yennu naan po ki bann li paak fanu, u tee nan njaadaan nba nyint bonkpera nan bonpaana u mokint ni nae.”

*Biaŋinba ki Nasaref doo ni teeb yêŋ Yiisa  
(Mak 6.1-6; Luk 4.16-30)*

<sup>53</sup> Yiisa nba din yin barjokit na ki gbenn yoo nba, ki u nyii leŋ, <sup>54</sup> ki kun u moŋ moŋ doo ni, ki saa want niib Yennu maan, jiantu diiuk ni. U wannu maŋ din teen niib na bakitnaun bonchiann, ki bi boi bi leeb a “Lee ki joo na la yanbooru na? Lee ki u la paŋ ki tuun bakitnaun toonjaana na? <sup>55</sup> Waa! Kanpinta bik na kaa na-a? U naa kaa tee Meeri na-a? U waarii kaa tee Jeems nan Joosef nan Simonn nan Judas na-a? <sup>56</sup> U niipoob kaa ki timm nan namm lakin be doo na na-a? U la bannu na kur lee?” <sup>57</sup> Li paak, bi din ki teeno yada.

Nanne ki u betib a “Yennu sokinii ki koŋit baakiri, see u moŋ moŋ doo ni, nan u njaateeb boor.” <sup>58</sup> Li paak, u din ki tun bakitnaun toonjaana bonchiann leŋi, kimaan niib maŋ nba ki teeno yada na paak.

## 14

*Jooonn nba din wuur niib Yennu nyunwuru na kpinu labaar*

*(Mak 6.14-29; Luk 9.7-9)*

<sup>1</sup> Li yoo maŋ ki Galilii batsaakoo Herod gbat Yiisa bakitnaun toonjaana na po, <sup>2</sup> ki yet u jiamm a “Jooonn nba daan wuur niib Yennu nyunwuru na fir kuun nie na, li paak te ki u mok paŋ



ki tuun bakitnaunj toonjaana na.” <sup>3-4</sup> Njaan soo Herod manj ponj kpui Joonn na.

Linba paak ki u daan kpui na tee nnae: Herod din fat u monj monj waarɔ Filip njaapoo Herodias-e ki koonɔ. Ki Joonn din tuu beerɔ a “Yennu sennu ki chaba nan fan fat a waarɔ njaapoo ki kooni.” Li paak, ki Herod soor Joonn ki koonɔ dansarik, ki baanɔ bant, <sup>5</sup> ki loon wun kpui, njaan tiin niib janmaanii, kimaan soo kur mantik din teen Joonn yada nan u tee Yennu sokiniie.

<sup>6</sup> Ki Bat Herod maaru jaamm daar tan baar; ki Herodias manj bipoo baar ki waa siak bi toonn, ki li manj Bat Herod bonchiann. <sup>7</sup> Li paak, ki u por mɔpor a u saa tur bonpobik na linba kur ki u saa yet a u loon. <sup>8</sup> Nanne ki u naa Herodias wannɔ waa saa boi linba po, ki bonpobik manj yet Bat Herod a wun pot Joonn, wunba wuur niib Yennu nyunwuru na yur, ki kpeen tatilaauk ni ki turɔ.

<sup>9</sup> Linba na din biir bat na par hei; njaan waa donj por mɔpor saamm na toonn na paak, u ji ki fit yɛti; ki chab a bin tun nna, <sup>10</sup> ki tun siab a bin saan dansarik ni ki saa pot Joonn yur. <sup>11</sup> Ki bi saan ki saa pot u yur ki kpeen tatilaauk ni, ki tan tur bonpobik manj; ki u mun gaar saan tur u naa. <sup>12</sup> Nanne ki Joonn poorpoweiteeb baar ki tan jii u gbanant ki pii; njaan ji saan ki saa bet Yiisa.

*Bianjinba ki Yiisa dinn jab tusaa njanjmu  
(Mak 6.30-44; Luk 9.10-17; Joonn 6.1-14)*

<sup>13</sup> Yiisa nba gbat Joonn kpinu po yoo nba, ki u fiir lej ki koo burgbetir, a wun poot koo muuk. Nibur na nba la nna manj, ki bi somm taatinj

ki kokin mōkir na ki saa chetō mōk-pootir maŋ.  
<sup>14</sup> Yiisa nba nyii burgbetir ni ki la nibur maŋ na, ki ninbaauk soorō bonchiann, ki u te binba yiar ki be leŋ na kura la laafia.

<sup>15</sup> Yonnu nba tan maakit yoo nba, ki u poorpoweiteeb baar u boor ni, ki yetō a “Nna na tee muuk nie, ki yonnu mun yaa lin baae; li paak, ŋaant ki niib na n saan digbanbis nba kpia na ki la jeet ki daa.”

<sup>16</sup> Ŋanne ki u betib a “Bi daa saa. I mōŋ n turib jeet ki bin di.”

<sup>17</sup> Ki bi betō a “Boroboro kuna ŋanŋmu nan janbis ŋanlee kuukōe be ti boor ni.”

<sup>18</sup> Ŋanne ki u betib a “Jiin turin maŋ,” <sup>19</sup> ŋaan bet nibur na a bin kar mōot paak. Ki u jii boroboro kuna ŋanŋmu nan janbis ŋanlee na, ki gokit got sanpaapo, ki tur Yennu niipoouk jeet na paak, ki ji ŋmit ŋmit boroboro na ki tur u poorpoweiteeb, ki bi tor nibur na. <sup>20</sup> Ki bi kur dii gboo ki tenn. Ki u poorpoweiteeb tikir jeet nba tenn na, ki li gbee kpanchibit piik nan ŋanlee. <sup>21</sup> Jab nba din dii jeet maŋ teen nan tusaa ŋanŋmu nawa, ŋaan ki poob nan waas kann ki pukin leni.

*Yiisa nba din somm nyun paak bianjinba  
 (Mak 6.45-52; Jōonn 6.15-21)*

<sup>22</sup> Li poorpo ki Yiisa te ki u poorpoweiteeb kōō burgbetir ni ki tōk nyunpaanu saa u tōonn po pootir, ŋaan ki u biar a wun chab nibur na.

<sup>23</sup> Waa chab nibur na ki gbenn yoo nba, ki u doo kunkonn paak a wun miar Yennu. Ki nyiōk tan baar ki u bia daa be leŋ u kōō. <sup>24</sup> Li yoo ki u

poorpoweiteeb ηarin ji be burgbetir na nie nyun ni, ki fɔk nan gbingbanawa, ki nyunpana dia ki labimm, kimaan bi din tookit wouŋo.

<sup>25</sup> Li poorpoe ki Yiisa tan nyii kunkonn na paak kojomɔɔk ki sik somm nyun paak, ki saa bi boor.

<sup>26</sup> U poorpoweiteeb nba tan lau ki u somm nyun paak ki baat na, ki janmaanii soorib bonchiann, ki bi yaa “Gotir man, kpeemmɔe,” ηaan yikin janmaanwuyikinii.

<sup>27</sup> Li taakpaak ni ki u betib a “Cheen i para man, li tee mine; i daa tiin janmaanii.”

<sup>28</sup> Ki Piita yetɔ a “N Yomdaano, li-i setiki tee finie, fan te ki n somm nyun na paak ki cheta.”

<sup>29</sup> Ki u jiin Piita a “Baat na.” Ki Piita nyii burgbetir na ni ki sik nyun na paak, ki piin somm ki che Yiisa. <sup>30</sup> Waa la ki wouŋ pir nyunpana ki baat yoo nba, ki janmaanii sooro, ki u piint kpil li yoo, ηaan yikin a “N Yomdaano, tintin!”

<sup>31</sup> Ki Yiisa tant nuu yiama ki sooro, ηaan boio a “Fin yadkanpɔonn na, bee ki a birisimi?”

<sup>32</sup> Baa ηmat saan kɔɔ burgbetir na ni yoo nba, ki wouŋ na nyik danu. <sup>33</sup> Ki binba be burgbetir na ni baar ki tan gbaan jiantir Yiisa ηaan yeen a “Barmɔniie, a set tee Yennu Bijae.”

*Yiisa nba te ki baatib la laafia bianjinba  
(Mak 6.53-56)*

<sup>34</sup> Baa saa baar mɔkgbenir na pootir yoo nba, ki bi nyii doo Genesaret. <sup>35</sup> Doo maŋ teeb nba bann Yiisa na paak, ki bi mɔont tur len niib kura, ki bi tikir bi baatib kur ki baar namm u boor ni, <sup>36</sup> ki tan barimo a wun sak ki baatib maŋ n sii u liatir mɔgbann. Ki binba siir na kura la laafia.

# 15

## *Juu teeb yeejamm kaar labaar* (Mak 7.1-13)

<sup>1</sup> Li yoo na ki Farisiinba nan sennu wantteeb nyii Jerusalem ki baar tan boi Yiisa a <sup>2</sup> “Bee ki a poorpoweiteeb ki waa ti yeejamm kaari? Kimaan bi ki waa ti kaar nba yaa ti tuu nit ti niiwa ki di na.”

<sup>3</sup> Ki u mun boib a “Bee ki yimm ki sak Yennu sennu weiu njaan waa i yeejamm kaari? <sup>4</sup> Yennu-e senn u sennu a ‘Turin a baa nan a naa baakir; ki wunba tan sukir u naa koo u baa, bin kpiu;’ <sup>5</sup> njaan yimm njarin yaa ‘Nirɔ-i bet u naa koo u baa a, Maa bo saa tura linba na, li kpant Yennu yara, li ki tee miar kaa nan wun tur u damm siari.’ <sup>6</sup> Yaa tuun bianjinba na, i ki dia Yennu sennu na, kimaan i yeejamm kaar weiu na paak. <sup>7</sup> Yimm kpinkpanii damm na, Yennu sokinii Aisaya nba din pak i po bianjinba na set tee barmɔniie. U din yet a Yennu yaa,

<sup>8</sup> ‘Niib na teenin baakir bi mɔi ni kuukɔɔe, njaan bi para fok nanin bonchiann.

<sup>9</sup> Bi jiantirin yanne, kimaan bi dia nisaarii kaare ki want niib, li ki tee min Yennu sennu kaa.’ ”

## *Linba be nisaarik par ni labaar* (Mak 7.14-23)

<sup>10</sup> Nanne ki Yiisa yiin nibur na ki tan yetib a “Gbiintir man, ki bann linba ki n yaa n yeti na paak: <sup>11</sup> Linba kɔɔ nisaarik mɔb ni ki fit tee jakint u par ni; njaan linba be nisaarik par ni ki nyi u mɔb nie teenɔ jakint.”

<sup>12</sup> Nanne ki u poorpoweiteeb na baar u boor ki tan boio a “A mi nan Farisiinba na nba gbat a maan man, bi wutoa doo a paaka-a?”

<sup>13</sup> Ki u jiin a “Tiik nba kur ki n Baa Yennu nba be sanpaapo na ki bur, see ki bi tan nabire ki lu.

<sup>14</sup> Li paak, naantib man ki bii saa, kimaan bi tee nan joonii nae ki daar bi joonlei; ki li-i tee ki joon daar u loo, see ki bi kur baa bootuk ni.”

<sup>15</sup> Nanne ki Piita beto a, “Wantit barjouk na paak.”

<sup>16</sup> Ki Yiisa jiin a “I mun bia lek daa ki bant n maan na paaki-i? <sup>17</sup> I ki mi nan linba koo mob ni, li yaa lin sik poor nie, ki kpant bint ki nyii-i? <sup>18</sup> Naan barbiit nba ki nisaarik piak u mob ni, li nyii u par nie, nann mune teeno jakint. <sup>19</sup> Niro par nie ki dudukbiit na nyi: nikpinu, nan bonchonchontoona, nan nanyukin, nan faak siara, nan sanjaau. <sup>20</sup> Linba na nbae teen nisaarik jakint, naan nijakina dinu kan fit teen niro jakinti.”

*Poosoo nba din teen Yiisa yada bianjinba  
(Mak 7.24-30)*

<sup>21</sup> Ton, ki Yiisa nyii lej ki saan Taya nan Sidonn bokir po. <sup>22</sup> Nanne ki Keenann tinj ni poosoo nna mun be bokir man po, ki tan baar Yiisa boor ki yet a “N Yomdaano, Defid yaaboonn, tinimin ninbaauk. Narinbiuk be n bipoo ni, ki mukiso bonchiann.” <sup>23</sup> Ki Yiisa ki jiin siari; naan ki u poorpoweiteeb beto a, “Berin poo na, kimaan u waa ti poor ki mok fuut.”

<sup>24</sup> Nanne ki Yiisa jiin a, “Israel teeb\* nba tee

\* **15:24** 15.24 Juu teeb sanleere tee Israel teeb.

nan pei nba bot na, namm kuukoɔe ki Yennu tumin a man saan bi boor.”

<sup>25</sup> Ki poo maŋ baar ki tan gbaan Yiisa tɔɔnn n̄aan yeto a “N Yomdaano, sommitin.”

<sup>26</sup> Ki Yiisa jiino a “Li ki n̄an ki niro n jii waas jeet ki tur boi.”

<sup>27</sup> Nanne ki poo na jiin a “N Yomdaano, li set tee monie; n̄aan boi nba doo bi daamm saanmanii boor ki koŋit jebura nba baa ki tokii di.”

<sup>28</sup> Nanne ki Yiisa ji yeto a “Poo, a teenin yada bonchiann. Linba ki a loon na, lin tun nna ki tura.” Li taakpaak ni ki u bipoo maŋ la laafia.

*Yiisa nba din te baatib bonchiann la laafia bianinba*

<sup>29</sup> Li poorpoe ki Yiisa nyii leŋ ki gar Galilii moŋgbenjir kpiŋ, ki saan doo kunkonn paak ki kar. <sup>30</sup> Ki nibur baar u boor ki dia wobii, nan joonii, nan mui, nan dianii, nan binba yiar yiarbooru booru kur, ki tan birib u tɔɔnn; ki u te ki bi kura la laafia. <sup>31</sup> Nibur na nba la ki mui piak, ki dianii somm fanu, ki wobii somm, ki joonii laat na, ki li yaar litib, ki bi piak dont namm Israel teeb Yabint Yennu na sann.

*Yiisa nba dinn jab tusaa nanna bianinba  
(Mak 8.1-10)*

<sup>32</sup> Ki Yiisa yiin u poorpoweiteeb ki tan yetib a “Ninbaauk moŋkin nan niib na, kimaan daa n̄antaae na ki bi be n boor nna, ki ki moŋ jeet ki di. N ki loon man kunnib komi, ki bi tan saa mann fib.”

<sup>33</sup> Ki u poorpoweiteeb boio a “Lee ki ti saa la jeet muuk na ni ki tur nichioŋ na ki bin di gboo?”

<sup>34</sup> Ki u boib a “I mək boroboro kuna ɲanɲae?”  
Ki bi jiin a “ɲanlore, nan janbis waamina.”

<sup>35</sup> Ki u bet niib na a bin kar tiɲ ni; <sup>36</sup> ɲaan jii boroboro kuna ɲanlore nan janbis na, ki tur Yennu niipoouk li paak, ɲaan ɲmit ɲmit tur u poorpoweiteeb, ki bi jii tor niib maɲ. <sup>37</sup> Ki niib na kur dii ki gboo ɲaan ki li tenn; ki u poorpoweiteeb tikir jeet nba tenn na, ki li gbee kpanchibit ɲanlore. <sup>38</sup> Jab nba dii jeet na din tee tusaa ɲanna, ki poob nan waas kann ki pukin lenji. <sup>39</sup> Li poorpo ki Yiisa chab niib maɲ, ɲaan koo burgbetir ki poot koo Magadann tingboun ni.

## 16

*Baa loon bakitnaun nyinn bianjinba  
(Mak 8.11-13; Luk 12.54-56)*

<sup>1</sup> ɲanne ki Farisiinba nan Sajusiinba baar Yiisa boor. Baa loon ki bin jammoo na paak, ki bi yeto a wun tun bakitnaun nyinn ki lin wann nan Yennu set mi u po. <sup>2</sup> Ki u jiin a “Li-i tee ki sanpagbant mon daajoouk, i tuu yet a ‘Wonn ɲarin, daar won sii yeen.’ <sup>3</sup> ɲaan li-i tee ki sanyiok ni sanpagbant mon ɲaan tan boont, i tuu yet a ‘Dinna ɲarin, saak saa baawa.’ I fit buntir sanpagbant nyina, ɲaan ji kan fit bukit motana yoo na. <sup>4</sup> Motana niib, biitdamm nba ki waa Yennu na loon bin la bakitnaun nyina; ɲaan n kan mi tun nyinsiar ki turibi; Yennu sokinii Jona nyinbooru na kooe ki n saa wannib.” U yet nnae, ɲaan seet ki nyikib.

*Ki jiin Farisiinba nan Sajusiinba wannu na po  
(Mak 8.14-21)*

<sup>5</sup> Tɔn, Yiisa nan u poorpoweiteeb nba din saa poot mɔkɔbenjir na pootir yoo nba, ki u poorpoweiteeb na ji tiar nan bi ki jii boroboro. <sup>6</sup> U din betib a “Ii mi man Farisiinba nan Sajusiinba datinii na po.”

<sup>7</sup> Ki bi ji piin ki beer bi leeb a “Taa ki baar nan boroboro na paake te ki u yeen nna.”

<sup>8</sup> Nanne ki u bann baa yeen linba maɲ, ki boib a “Yimm yadkanpɔɔna damm na, bee ki i beer i leeb nan yaa ki baar nan boroboro na paake?

<sup>9</sup> I bia lek daa ki bann li paaki-i? I ki tian maa daan jii boroboro kuna njanɲmu ki dinn jab tusaa njanɲmu na-a? Kpanchibit njanɲae ki i daan tikir jeet nba tenn na? <sup>10</sup> Ki i bia ki tian jab tusaa nanna nba ki n daan jii boroboro kuna njanlore ki dinnib na-a? I daan tikir jeet nba tenn na ki gbeen chibit njanɲae? <sup>11</sup> Bee ki i ki bann nan li ki tee boroboro po kaa ki n piaki? Ii mi man Farisiinba nan Sajusiinba datinii na po.”

<sup>12</sup> Nanne ki u poorpoweiteeb ji bann nan li ki tee datinmɔɲ po kaa ki u piak a bii guu bi mɔɲi; njan Farisiinba nan Sajusiinba wannu na poe.

*Piita nba din pak barjaann nba ki jiin Yiisa po (Mak 8.27-30; Luk 9.18-21)*

<sup>13</sup> Yiisa nba tan baar Siisarea Filipi tinj ni yoo nba, ki u boi u poorpoweiteeb a “Niib yaa min nisaarik Bik tee nɲmee?”

<sup>14</sup> Nanne ki bi jiin a “Siab yaa a tee Jɔɔnn nba daan wuur niib Yennu nyunwuru nae, ki siab yaa a tee Elaija-e, ki siab mun yaa a tee Jeremaya-e, koo Yennu sokiniisɔɔ nba din be yaayoo niwa nae.”



15 Ki u ji boib a “Ki yimm muni, i yaa n tee ŋmee?”

16 Nanne ki Simonn Piita yeto a “Fine tee Yennu nba fo na Bija Masia, wunba ki u ganno na.”

17 Ki Yiisa beto a “Fin Simonn, wunba tee Jona bija na, parpeenn be a paak, kimaan nisaarik kaa fiit barii na ki wannani, ŋaan n Baa Yennu nba be sanpaapo nae fiit ki wanna. 18 Fin Piita, min ŋarin beerae, a tee tanne; ki tanpiiuk\* na paake ki n saa jii n niib ki senn; ki kuun kan fit nyannibi. 19 N saa tura Yennu naan gann peenii; li paak, linba ki a tan lor ki yaa li koo tingbouŋ na ni, ŋanne mun bia poŋ koo Yendouŋ ni; ki linba ki a bia yaa li ki koo, ŋanne mun bia poŋ ki koo Yendouŋ ni.”

20 Nanne ki Yiisa kpaan u poorpoweiteeb na nan ninmonn a bii mi ki bin bet soo nan ŋooe tee Yennu Niganntoo Masia na.

*Yiisa nba pak u biakdinu po bianjinba  
(Mak 8.31–9.1; Luk 9.22-27)*

21 Laa din nyii li yoo maŋ ki jii saa, ki Yiisa piin ki beer u poorpoweiteeb linba tan saa teeno. U din yeen a “See ki n fabir saan Jerusalem, ŋaan ti tin saakab, nan Yennu mannteeb yudamm, nan sennu wantteeb saa dinnin biak bonchiann, ki bia tan saa kpima; ŋaan daa ŋantaa daar, Yennu saa fiinin kuun ni.”

---

\* **16:18** 16.18 Bi maan ni, baa yi tanpiiuk bianjinba nan baa yi Piita bianjinba, li naane.

<sup>22</sup> Ki Piita yiino kpiŋ po, ki kpaano a “N Yomdaano, Yennu n bor bonbiir na ki li daa baat a paaki.”

<sup>23</sup> Nanne ki Yiisa jiant bet Piita a “Sintaanii na, seetir nna na. A tee tangbiatkare n sonu ni, kimaan a ki dukii linba tee Yennu yar po, ŋaan dukii linba tee nisaarik yar,” <sup>24</sup> ŋaan bet u poorpoweiteeb a “Wunba-i loon wun wein, see ki u likin u saanmanj ki jii u kuun dapunpunn kii waan, <sup>25</sup> kimaan wunba ki sak wun jii u manfoor ki turin, ŋooe tan saa koŋir, ŋaan wunba likin u saanmanj n paak, ŋooe tan saa la u manfoor nan barmonii. <sup>26</sup> Li-i tee ki niro yen tingbouŋ na mokint kura, ŋaan tan koŋ u manfoor, nyolanpoe ki u la? Soo kan fit jii siar ki daa u manfoori. <sup>27</sup> Min nisaarik Bik tan saa jen nan n Baa Yennu paŋ, nan n malakanba, li yoo manj, n tan saa pa soo kur nan u toona nba tee bianinba. <sup>28</sup> Barmoniie ki n beeri na, siab be nna, ki kan kpo see ki bi tan la min nisaarik Bik naan dinu.”

## 17

### *Yiisa gbanant lebitu labaar* (*Mak 9.2-13; Luk 9.28-36*)

<sup>1</sup> Li daa ŋanloob daar, ki Yiisa jii Piita, nan Jeems nan u naa bik Joonn, ki doo namm kunkonfoouk paak, bi kuukoo. <sup>2</sup> Li yoo na ki bi la ki u lebit; ki u numm po kpint nyirii nan yonnu na; ki u liant penn ki nyirii bonchiann. <sup>3</sup> Ki bi la Moses nan Elaija lekit yomm, ki see piak nano. <sup>4</sup> Nanne ki Piita yeto a, “N Yomdaano, li ŋan nan taa be nna na. Li-i tee ki a bo saa saki, n bo saa

faa lanbont nantaae, ki yenn-ii tee a yar, ki leer-ii tee Moses yar, ki leer-ii munii tee Elaija yar.”

<sup>5</sup> Piita mɔb daa ki baa tinj kaawa, ki sanpagbounpeeun sik bakin bi paak; ki bi gbat kunkɔsiar nyii sanpagboun na ni, ki yet a “N Bilonkake na, wunba ki n numm gboou, gbiintir u mɔb man.”

<sup>6</sup> Yiisa poorpoweiteeb na nba gbat kunkɔr man, ki janmaanii soorib, ki bi baa fabin tinj ni.

<sup>7</sup> Ki Yiisa baar ki tan yii yiib, n̄aan betib a “Fiit man. I daa tiin janmaanii.” <sup>8</sup> Ki bi gokit got, n̄aan ji ki la sɔɔ bi boor, see Yiisa kuukɔɔ.

<sup>9</sup> Baa nyii kunkonn na paak ki siik yoo nba, ki Yiisa kpaamm a “I daa beer sɔɔ linba ki i la na, ki saa tuu yoo nba ki min nisaarik Bik tan saa fir kuun ni.”

<sup>10</sup> N̄anne ki u poorpoweiteeb man boio a “Bee ki sennu wantteeb yaa see ki Yennu sokinii Elaija baar Masia sinsinni?”

<sup>11</sup> Ki u jiin a “Li set tee moniie nan see ki Elaija man baar sinsinn ki tan n̄amm bonsiar kur ki sennir li sɔnu ni. <sup>12</sup> N̄aan mine beeri na, Elaija ponj din baara, n̄aan bi din ki banno, ki diau gbaka gbaka nna, baa loon bianjinba. Nnae ki bi mun bia saa teen min nisaarik Bik na, ki dinnin biak.”

<sup>13</sup> N̄anne ki u poorpoweiteeb na ji bann nan u piak Joɔnn, wunba din wuur niib Yennu nyunwuru na poe.

*Yiisa nba nyinn narinbiiuk naasinbik ni bianjinba*

*(Mak 9.14-29; Luk 9.37-43a)*

<sup>14</sup> Ki Yiisa nan u poorpoweiteeb bantaa man tan baar nibur na boor; ki jasoo baar ki tan gbaan Yiisa toonn, n̄aan yeto a <sup>15</sup> “N Yomdaano, tinin n bija na ninbaauk, kimaan u baa gbitg-biire; li daamo bonchiann ki u baa muu ni, ki bia baa nyun ni yoo kur. <sup>16</sup> Ki n baar n̄ano a poorpoweiteeb boor ni, ki bi gbar u tebu.”

<sup>17</sup> Ki Yiisa jiin boib a “Yimm motana niib nba mantik kaa yada, ki bia ki waa Yennu fanu na, n saa yukir nani nlee? Yoo nlee ki n saa di sukuru nani mantiki? Baat nan bik man nna.” Ki bi baar n̄ano. <sup>18</sup> Ki Yiisa tian narinbiuk na paak, ki u nyii yiama, ki nyik bik na. Li taakpaak ni ki u la laafia.

<sup>19</sup> Li poorpo, ki Yiisa poorpoweiteeb baar u boor, bi kuukoo, ki tan boio a “Bee ki timm n̄arin bo ki fit nyinn narinbiuk manj?”

<sup>20</sup> Ki u jiin a, “I yada kaarin paake. Barmoniie ki n beeri na, li-i tee ki i teen Yennu yada ki li yab nan kanpotik binn na, i saa fit yet jojaann na a ‘Fiit ki saa baa nawa,’ ki li set saa fiire; i bo saa fit tun bonsiar kura. <sup>21</sup> N̄aan narinbiuk na booru n̄arimi, i kan fit nyinn see ki i lor moi ki mei Yennu.”

*Yiisa nba n̄amm pak u kuun po bianjinba  
(Mak 9.30-32; Luk 9.43b-45)*

<sup>22</sup> Ton, Yiisa poorpoweiteeb nba tan lakin leeb Galilii yent ni yoo nba, ki u betib a “Bi tan saa jii min nisaarik Bik ki kubin niib nuu ni <sup>23</sup> ki bin kpin, n̄aan daa n̄antaa daar ki n saa fiir kuun ni.”

Li din biir u poorpoweiteeb para bonchiann.

*Yenjiantu nasaakak likgaaru labaar*

<sup>24</sup> Yiisa nan u poorpoweiteeb nba baar Kape-naum yoo nba, ki Yenjiantu nasaakak likgaar-teeb baar ki tan boi Simonn Piita a “A wanttoɔ ki pa likirii manji-i?”

<sup>25</sup> Ki Piita jiin a “U pa,” njaan koɔ njaak ni. Li yoo na ki Yiisa doŋ piin li barii ki boio a “Simonn, a dukii nlee? Lamme tuu pa lampo ki teen tingboun na kpanbara? Bi moŋ booru ni niib amii saamme?”

<sup>26</sup> Ki u jiin a “Saamme.”

Ki Yiisa yeto a “Ton, li-i tee nnaie, li want nan bi moŋ booru nuu kaa li ni. <sup>27</sup> Njaan taa ki loon ki tin biir bi para na paak, ii saa mɔkgbenjir na ni, ki saa lu janpeenu. Jan nba ki a sooro sinsinn ki donno na, fan yaat u moɔ; a saa la likirii nba saa fit pa min nan fin paak, ki fan jii pa.”

**18***Nmee tee nijaanni?*

*(Mak 9.33-37; Luk 9.46-48)*

<sup>1</sup> Li yoo na ki u poorpoweiteeb baar u boor ki tan boio a “Nmee tee nijaann Yennu naan ni?”

<sup>2</sup> Ki u yiin bik nna ki tan sennɔ bi sinsuuk ni, <sup>3</sup> njaan betib a “Barmoniie ki n beeri na, wunba ki lebit u binbenj ki li tee nan bik binbenj na, u kan koɔ Yennu naan ni kaawa. <sup>4</sup> Wunba sikint u moŋ ki u binbenj tee nan bik na binbenj na, njoɔe tan sii tee nijaann Yennu naan ni. <sup>5</sup> Wunba gaar bik na booru n paak, u gaar mine.”

*Jinjammii labaar*

*(Mak 9.42-48; Luk 17.1-2)*

<sup>6</sup> “Waas nba teenin yada na narin, wunba te ki bi yenokoo tun toonbiit, bi-i bonni lann naar li daano turu ni ki tut lu-u mokgbenjir ni ki u dii nyun gbaa, li bo sii so ki turo. <sup>7</sup> Bonbiir sii be tingbouŋ na teeb nba kpann bi leeb ki bi tuun toonbiit na paak. Jinjammii set saa baara, n̄aan li sii bi ki tur wunba te ki jinjammii maŋ baat niib paak.

<sup>8</sup> “Li-i tee ki a niipaun koo a taapaun te ki a yaa a tun toonbiit, fan potir lu. Li-i tee ki a mok niipaun yennkoo, koo taapan-yennkoo, ki la manfoor nba kaa gbennu, li chee fii mok a niipant kur nan a taapant kur n̄aan Yennu n tan koonna muu nba kan mi kpeen na ni. <sup>9</sup> A ninbinni te ki a yaa tun toonbiit, fan kpakiro lu. Li-i tee ki a mok ninbin-yenn ki la manfoor maŋ, li chee fii mok ninbina n̄anlee n̄aan Yennu n tan koonna muu maŋ ni.

*Pebotikauk barjouk*  
(Luk 15.3-7)

<sup>10</sup> “Ii mi man ki soo n sian waas maŋ yenokoo; kimaan li tee barmoniie, bi malakanba nba be sanpaapo na be Yennu toonne yoo kur. <sup>11</sup> Ton, min nisaarik Bik baar a n tan tinn binba bote.

<sup>12</sup> “Li-i tee ki niro mok pei kobik, n̄aan ki yenokoo tan boti, i dukii u saa teen nlee? See ki u nyik pei piinyia nan banyia na kunkona paak, n̄aan saan ki saa lon pebotikauk na. <sup>13</sup> U lau yoo nba, barmoniie ki n beeri na, u sii mok parpeenn nan monii pebotikauk nba ki u lau na paak, ki gar pei piinyia nan banyia nba ki bot na. <sup>14</sup> Nnae

mun ki i Baa Yennu nba be sanpaapo na ki loon waas na ni yeno n boti.

*Ti leeb biit nyikinhab labaar*

<sup>15</sup> “A naa bik-i tun siar ki biira, fan saan u boor, yoo nba ki u be u kuukoo na, ki pak wannoo u biit; ki li-i tee ki u bann u biiti, i bia namm teen naa waase na. <sup>16</sup> Nnaan li-i tee ki u ki sak wun gbat turani, fan yiin niyeno, koo niib banlee, ki pukin a paak, ki yin saan u boor, ki niib banlee koo bantaa man n gbat barii man ki teen a siara damm. <sup>17</sup> Li-i tee ki u bia ki sak wun gbat ki turibi, fan wann Yennu niib kura; ki li-i tee ki u bia ki sak wun gbat ki tur Yennu niibi, yin ji nnaan ki wuu tee nan wunba ki tee Yenweiro na, koo lampogaartoo na.

*Yiisa nba tur u weira yikoo bianjinba*

<sup>18</sup> “Barmoniie ki n beeri na, linba ki i tan lor ki yaa li koo tingbouj na ni, nanne mun ponj koo Yendouj ni; ki linba ki i bia yaa li ki koo, nanne mun ponj ki koo Yendouj ni.

<sup>19</sup> “N bia beerie, i ni banlee-i taan mob tingbouj na ni ki mei n Baa Yennu nba be sanpaapo na siar paak, u saa tun yaa loon bianjinba ki turiwa. <sup>20</sup> Kimaan siaminba ki niib banlee koo bantaa taan leeb n sann ni, leje ki n mun be bi sinsuuk ni.”

*Daabir nba kaa nyikinhab barjouk*

<sup>21</sup> Nanne ki Piita baar Yiisa boor ki tan boio a “N Yomdaano, li-i tee ki n naa bik tuumin biit, taar munnaae ki n saa nyik chabo? Taar munlore-e?”

22 Ki Yiisa jiin a “Aaii, taar munlore kuukoo kaa, nyaan taar piinlore ki saa jan taar munlore. 23 Li paak, Yennu naan tee nan batsoo nba din tan yiin u nyaadaaba a wun kan bi likirii pana nae. 24 Waa piin kanu yoo nba, ki bi koo nan jasoo nna, ki u dia bat na pann botoouk tusbamm. 25 Ki u kan fit la pa; ki bat na tur mob a bin koi hoo nan u nyaapoo nan u waas, nan waa mok linba kur, ki tan pa pann man. 26 Nanne ki joo man gbaan bat na toonn nan baru, ki yeen a ‘Chanbaa, n saa pa li kura; lek din sukuru.’ 27 Ki ninbaauk soor bat na bonchiann, ki u chabo pann man, a wuu saa.

28 “Joo man nba narin nyii yoo nba, ki u chet u daabiloo, ki u mun dia u pann likirii waamina; ki u soor u turu ni, ki faa birinto, nyaan beero a ‘Pan n pann na motana.’ 29 Ki u loo na mun gbaan u toonn nan baru, ki yeen a ‘Din sukuru, ki n saa paawa.’ 30 Ki hoo narin ji ki sak u loo na baru na, nyaan te ki bi jiu ki koono dansarik, a see ki u tan pa pann na, ki wun nyinno. 31 Ki u daabileeb na nba la nna yoo nba, ki li biir bi para bonchiann, ki bi nmat ki saa yet bat na linba kur tun. 32 Ki bat na tun a bin yiin joo man na; ki piin u sukut a ‘Fin bonyoonn na, faa bo barimin na paak, ki n chaba faa dia n pann nba kur. 33 Li mun bo nan fan chab a loo na ki tino ninbaauk, nan maa bo chaba bianinba na.’ 34 Bat na wutoor nba doo bonchiann bianinba na, ki u jii joo man ki saan koono dansarik a wuu be lej ki saa tuu daar nba ki u tan saa pa pann na kur.”

35 Barjouk na poorpo ki Yiisa ji yet a “Li-i tee ki



i ki nyikit chabit i leeb nan i para kuri, nnae ki n Baa Yennu nba be sanpaapo na saa teen i mun.”

## 19

### *Pooyêtu labaar* (*Mak 10.1-12*)

<sup>1</sup> Yiisa nba pak mɔbona na ki gbenn yoo nba, ki u nyii Galilii ki saan Judea yent nba be Jɔɔdann mɔk-pootir po na. <sup>2</sup> Ki nibur wei u poorpo, ki u te binba yiar na kura la laafia leŋ.

<sup>3</sup> Ki Farisiinba siab baar u boor ki loon bin jammɔ, ki boio a “Yennu sennu chabit nan jɔɔ n yêtu u ŋaapoo waa loon bianjinba-a?”

<sup>4</sup> Ki u jiin a “I ki karin Yennu gbouŋ nba yet bianjinba na-a? a ‘Piinu niwa, Yennu din nan jɔɔ nan pooe, <sup>5</sup> ki yet a, Li paak, ki jɔɔ saa nyik u baa nan u naa, ŋaan kɔɔn u poo, ki bi niib banlee n taan ki teen gbananyennkɔɔ.’ <sup>6</sup> Tɔn, li-i tee nna, bi ji ki tee niib banlee kaa, ŋaan ji tee niyenokɔɔe. Li paak, binba ki Yennu taamm, nisaarik-ii mi ki wun bokitib.”

<sup>7</sup> Ki Farisiinba na boio a “Bee ki Moses ŋarin din tur yaak u sennu na ni, nan jɔɔ saa fit tur u ŋaapoo yêtu gbouŋ ŋaan yêtu?”

<sup>8</sup> Ki Yiisa jiin betib a “I tubkangbatin paake ki Moses din tur yaak a yii yêen i ŋaapoob, ŋaan piinu ni li din ki tee nna kaa. <sup>9</sup> Barmɔniie ki n beeri, wunba yêtu u ŋaapoo, ki li ki tee poo na tun bonchonchontoonni, ŋaan kɔɔn poogano, jɔɔ maŋ tun bonchonchontoonna; ((ki wunba mun kɔɔn poo nba ki u sɔɔɔ yêtu na, u mun tun bonchonchontoonna.))”

<sup>10</sup> Ki Yiisa poorpoweiteeb na yeto a “Li-i tee nnaie joo nan u njaapoo sinsuuk ni, njann njarin joo-i kii koon poo, li so.”

<sup>11</sup> Ki u yetib a “Soo kur kan fit dia wannu manj; binba ki Yennu turib li yaak na, njamm kooe saa fit diar. <sup>12</sup> Kimaan bona bonchianne te ki jasiab ki koon poobi; bi tuu mar siab, ki bi ki tee jabi; siab mun, niibe tuu teemm jatooka; ki siab mun, Yennu naan paake tuu te bin yet poo koonu; njan wunba saa fit dia wannu manj, wun diar.”

*Yiisa nba din gaar waas bianjinba  
(Mak 10.13-16; Luk 18.15-17)*

<sup>13</sup> Ton, ki nisiab tan baar nan bi waas Yiisa boor, a wun yii u nii bi paak ki miar Yennu ki turib; njan ki u poorpoweiteeb tian niib manj paak. <sup>14</sup> Ki Yiisa yet a “Njaant man ki waas manj-ii baat n boor na, ki daa tiammi, kimaan bi boorue yen Yennu njanaan,” <sup>15</sup> njan jii u nii ki yii yii bi paak, njan ji seet saan.

*Naasin-mokitsoo labaar  
(Mak 10.17-31; Luk 18.18-30)*

<sup>16</sup> Ton, ki naasimo nna baar Yiisa boor ki tan boio a “Wantoo, toonjanlannpoe ki n saa tun, ki la manfoor nba kaa gbennu?”

<sup>17</sup> Ki Yiisa jiino a “Bee ki a boin toonjann po? Niyeno kooe tee njano; njan li-i tee ki a loon manfoor nba kaa gbennu, fii dia Yennu sennu na.”

<sup>18</sup> Ki naasimo na boi Yiisa a “Sennlanupoe?”

Ki u beto a “Daa kpi niro; daa tuun bonchonchonsin; daa jaami; daa tee faak siara; <sup>19</sup> ii teen

a baa nan a naa baakir; kii loon a loo nan faa loon a moŋ bianjinba na.”

<sup>20</sup> Ki naasimo na beto a “N ponj waa sennu na kura. Lannpoe ki n bia saa tun pukin linba na paaki?”

<sup>21</sup> Ki Yiisa beto a “Li-i tee ki a loon a binbenj-ii tee fanu nan barmonii, fii saa ki saa koi faa mok linba kur; ki jii li likirii ki tur talasdamm, kii mok mokint Yendouj ni, ki ji kii waan.”

<sup>22</sup> Naasimo na nba gbat nna yoo nba, ki u seet nan parbiir, kimaan u mokint yab bonchiann.

<sup>23</sup> Nanne ki Yiisa ji yet u poorpoweiteeb a “Barmoniie ki n beeri na, li sii paar bonchiann nan mokitoo n tan koo Yennu naan ni. <sup>24</sup> N ŋammit beerie nan li paar nan mokitoo n koo Yennu naan ni ki gar laagumii n kuut kparpeenu miar ni nae.”

<sup>25</sup> Ki u poorpoweiteeb nba gbat nna manj, ki li yaar litib bonchiann, ki bi piin ki boi bi leeb a “Li-i tee nnaie, ŋmee ji saa fit la tinnu?”

<sup>26</sup> Nanne ki Yiisa gokit gotib ŋaan yet a “Nisaarike kan fit tun linba na, ŋaan Yennu ŋarin saa fit tun bont kura.”

<sup>27</sup> Li yoo na ki Piita yeto a “Gotir, timm ŋarin nyik ti bonsiar kure ŋaan waa-a. Ti nyoot tan sii tee bee?”

<sup>28</sup> Nanne ki Yiisa betib a “Barmoniie ki n beeri na, yoo nba ki min nisaarik Bik na tan kar n naangbant paak nan panj bonchiann, durinya paann na ni, yimm nba tee n poorpoweiteeb na mun tan saa kar naangbant piik nan ŋanlee paake, kii bu Israel teeb\* booru piik nan ŋanlee

\* **19:28** 19.28 Juu teeb sanleere tee Israel teeb.

na buut. <sup>29</sup> Ki wunba kur nyik u ŋaak, koo u yoorib, koo u waarii, koo u baa, koo u naa, koo u waas, koo u kpaant, n sann paak, u tan saa la li booru kobik, ki bia la manfoor nba kaa gbennu. <sup>30</sup> Ŋaan niib bonchiann nba doŋ toonn motana, bi tan saa joont poora; ki bonchiann nba mun bia joont poor tan saa gar toonna.”

## 20

### *Toontunna barjouk*

<sup>1</sup> “Kimaan Yennu naan tee nan ŋaadaano nba din nyii sanyapob ni ki loon niib a wun jiiib ki bin ko u kpaab nae. <sup>2</sup> Ki bi dii daauk ki u sak ki saa pab daar paauk, ŋanne ki bi doo ki saa jak konu. <sup>3</sup> Laa tan baar kut munyia yoo nba, ki ŋaadaano maŋ fiir saan daak ni, ki saa la siab ki bi see ki ki tuun siari. <sup>4</sup> Ki u betib a ‘Ii do man n kpaab ni kii saki ko, ki n pai linba jaŋ.’ <sup>5</sup> Ki bi doo. Ki li tan baar kut piik nan munlee yoo, ki u bia ŋmat teen nna; ki kut muntaa yoo, ki u bia ŋmat ki teen nna. <sup>6</sup> Ki li baar kut munŋmu, ki u bia ŋmat saan ki la siab ki bi lakin see, ki u boib a ‘Bee ki i see nna yann damunn ki ki tuun siari?’ <sup>7</sup> Ki bi jiin a ‘Soo ki jiiit toonni.’ Ŋanne ki u betib a ‘Ii muni do man n kpaab ni kii sakii ko.’

<sup>8</sup> “Laa tan bont yoo nba, ki ŋaadaano na bet u toontunna saakoo a ‘Ii saa ki yiin kpaara maŋ na, ki tan pab. Fi-i yaa a pab yoo nba, fan piin kii pa binba bo joont baar na, ki tan joont binba bo doŋ baar na.’ <sup>9</sup> Ki u toontunna saakoo maŋ piin ki pa binba bo joont baar na daar paauk. <sup>10</sup> Ton,

laa tan baar binba bo baar sanyapob niwa na paak yoo nba, ki bi dukii a bi yar sii yabe, ɲaan ki u pab daar paauk mun biak. <sup>11</sup> Baa gaar bi likirii gbenn yoo nba, ki bi piin ki burin sukii ɲaadaano na, <sup>12</sup> ki yeen a 'Gotir, binba joont ki doo kut munɲmu na koo yoo waaminnae, ɲaan ki timm nba ɲarin la fara sanyiok niwa, ki yonnu faat bonchiann na, ɲaan ki timm nan ɲamm tan lakin gaar payouŋ kuukoɔ.'

<sup>13</sup> "Nanne ki ɲaadaano na yet bi yeno a 'N yook, gbiintir, n ki ɲmabani, kimaan ti bo dii daauko ki a sak daar paauk. <sup>14</sup> Li paak, jiin a yar kii saa. Li tee n lomme nan ki n pa fin nan binba bo joont baar maŋ yomm. <sup>15</sup> N ki mok yaak ki saa jii n likirii ki tun maa loon bianjinba-a? Koo a mok funfunn nan maa ki wuun na paake-e?' "

<sup>16</sup> Yiisa nba din yin barjouk na ki gbenn na poorpoe, ki u ji betib a "Li paak, binba joont poor tan saa doŋ tɔonn, ki binba doŋ tɔonn tan saa joont."

*Yiisa nba pak u kuun po taar muntaa ni bianjinba*

*(Mak 10.32-34; Luk 18.31-34)*

<sup>17</sup> Yiisa nba din tan do Jerusalem na, ki u yiin u poorpoweiteeb piik nan banlee na ki tan bor betib a <sup>18</sup> "Gotir man, ti do Jerusalem-e na; ki bi sa saa jii min nisaarik Bik ki teen mannteeb yudamm nan sennu wantteeb nuu ni, ki bi saa bu n buut ki yet a n ɲan nan kuume. <sup>19</sup> Bi tan saa jiin ki tur binba ki tee Juu teeb ki bin fiakin, ki

boon kpaasir,\* ki kpaab tabinin dapunpunn paak ki man kpo, njaan li daa njantaa daar, n saa fiir kuun niwa.”

*Ki jiin Jeems nan Jɔɔnn naa miatuk po  
(Mak 10.35-45)*

<sup>20</sup> Li yoo na ki Sebedii njaapoo jii u waas banlee Jeems nan Jɔɔnn ki baar namm Yiisa boor ki tan gbaan u tɔɔnn, ki miarɔ sommir po. <sup>21</sup> Ki Yiisa boio a “A loon bee?”

Ki u jiin a “Turimin mɔsonn nan n waas na yeno tan saa kar a diitu po, ki loo na mun n kar a ganj po, yoo nba ki a tan dii a naan na.”

<sup>22</sup> Yiisa din bet Jeems nan Jɔɔnn a, “I ki mi yaa mei linba. I saa fit jii jik-kpiatir nba ki n yaa n jii nawa-a?”

Ki bi jiin a “Ti saa fita.”

<sup>23</sup> Ki Yiisa betib a, “Tɔn, i set saa jii n jik-kpiatir nawa; njaan n ki mɔk yaak, li ki tee min kaa saa gann wunba tan saa kar n diitu po koo n ganj po, kimaan n Baa Yennu mɔn mɔne gann binba tan saa kar li kinkaani paak.”

<sup>24</sup> Yiisa poorpoweiteleb na nba gbat nna manj yoo nba, ki bi wutoa doo banlee manj paak. <sup>25</sup> Ki Yiisa lakin bi kura u boor ni, ki betib a “I mɔn mi nan tingbouj na njaateeb yudamm dont bi mɔne; ki nijaana bia dia bi niib nan ninmɔnne; <sup>26</sup> njaan yimm njarin, li daa tee nna i sinsuuk ni. Li-i tee ki soo loon yudant i ni, li njan wun kpant tarik kii tuun kii teen i kura. <sup>27</sup> Ki li-i bia tee ki soo loon wun tan gar sinsinni, wun kpant i daabir, <sup>28</sup> nan min nisaarik Bik nba tee bianjinba

---

\* **20:19** 20.19 Bi kpaasa din mɔk kut koo tanae li moi paak.

na, kimaan n ki baar maa niib n tun turin kaa, n̄aan n baar maa n tun ki tur niibe, ki bia kpo ki lin te niib bonchiann n la tinnu.”

*Yiisa nba din nyɔɔnt jɔɔnii banlee bianjinba  
(Mak 10.46-52; Luk 18.35-43)*

<sup>29</sup> Tɔn, baa din tan nyi Jeriko yoo nba, ki nibur waa Yiisa poorpo. <sup>30</sup> Ki jɔɔnii banlee kar sonjokpin ki gbat a Yiisa baat a wun gar lenj. Ki bi piin ki yikin sanpaapowa a “Ti Yomdaano nba tee Defid yaaboonn, tinimit ninbaauk.”

<sup>31</sup> Nanne ki nibur na tian bi paak a bin n̄min. N̄aan ki bi n̄amm yikin sanpaapowa a “Ti Yomdaano nba tee Defid yaaboonn, tinimit ninbaauk.”

<sup>32</sup> Ki Yiisa set n̄aan yimm ki tan boib a “I loon ki n tun bee ki turini?”

<sup>33</sup> Ki bi jiino a “Ti Yomdaano, ti loon ki a nyɔɔnt ti ninbinae.”

<sup>34</sup> Ki ninbaauk sooro, ki u sii sii bi ninbina man, ki li nyɔɔnt, ki bi ji waau.

## 21

*Yiisa nba baat Jerusalem ki bi dontiro bianjinba  
(Mak 11.1-11; Luk 19.28-40; Jɔɔnn 12.12-19)*

<sup>1</sup> Baa din tan per Jerusalem ki baar Bef-fej doo nba biak kunkonn nba ki bi yir Olif Tiinii kunkonn na, ki Yiisa tun u poorpoweiteeb na banlee u tɔɔnn po, <sup>2</sup> ki betib a “I saa man digbanbik nba be i tɔɔnn po na ni. I saa la ki bi lor bonnaan̄ nan u bik; ki yin lotib ki baar namm n boor ni na. <sup>3</sup> Li-i tee ki soɔ boi-i siarie, yin beto a i Yomdaano loomm, ki u saa chabi ki yin baar namm.”

<sup>4</sup> Linba na din tun a lin gbeen linba ki Yennu sokinii Aisaya din sokin nae, a

<sup>5</sup> “Yetir Sayonn doo teeb a,  
‘Gotir man, i kpanbar nae baat i boor na.  
U tee wunba sikint u mɔŋe  
ki jak boŋ nba set tee bonpaan.’ ”

<sup>6</sup> Ki Yiisa poorpoweiteeb na set saan ki saa tun nan waa betib bianjinba na, <sup>7</sup> ki baar nan bonnaan na nan u bik, ki tan jii bi liata ki paan bi boona paak a Yiisa n jak. <sup>8</sup> Ki niib na siab lat bi tiat sonjouk ni, ki leeb mun choon tiinii yiinii nan tutuut ki lat sonjouk na ni. <sup>9</sup> Ki nibur nba gar u toonn po nan binba din waa u poorpo ji yikin ki yeen a

“Hosaana,\* ii piak man Defid yaabonn man.  
Piisin-ii be wunba baat Yennu sann ni na paak.  
Yimm nba be sanpaapo, ii hoot man a ‘Hosaana.’ ”

<sup>10</sup> Waa din tan koo Jerusalem yoo nba, ki doo man niib kur fiir, ki boi leeb a “Nmee na?”

<sup>11</sup> Ki nibur na jiin a “Yiisa, wunba tee Yennu sokinii ki nyii Nasaref nba be Galilii yent ni nae.”

*Yiisa nba namm Yenjiantu nasaakak bianjinba  
(Mak 11.15-19; Luk 19.45-48; Joonn 2.13-22)*

<sup>12</sup> Yiisa din koo Yenjiantu nasaakak ni ki ber nyinn binba koi nan binba daa na kura, ki labir chibin lik-kpenta teebula nan nmankoi teeb kokii na <sup>13</sup> ki betib a “Li sob Yennu gbouŋ ni a nɔɔ Yennu yet a ‘N njaak na sii tee Yenmiaru njaake,’ njaan yimme kpintir ki teen fat-teeb kinkarboor.”

---

\* **21:9** 21.9 Hosaana paak tee “tintit.”



<sup>14</sup> Ki jɔonii nan wobii baar u boor Yenjiantu ɲasaakak na ni, ki u te ki bi kura la laafia.

<sup>15</sup> Ɗaan mannteeb yudamm nan sennu wanteeb nba la bakitnaɲ toona nba ki u tun na, ki bia gbat ki waas yikin Yenjiantu ɲasaakak ni ki yeen a “Hosaana! Ii piak man Defid yaaboonn na,” ki li donn bi wutoa. <sup>16</sup> Ki bi boio a “A gbat baa yeen linba na wa-a?”

Ki u jiin a “Nn, ɲaan li sob Yennu gbouɲ ni a ‘A te ki waas nan sanpantii piaka fanu;’ i ki mi karimi-i?”

<sup>17</sup> Ɗanne ki u nyikib ɲaan nyii Jerusalem ki saan Betani doo ki saa doo.

*Yiisa nba tun kinkanɲ bianɲinba  
(Mak 11.12-14, 20-24)*

<sup>18</sup> Laa din yent ki Yiisa nyii len ki ɲmat Jerusalem. Ki kon moko; <sup>19</sup> ki u la kinkanɲ see sonjokpiɲ. Ki u saan a wun poor kinkana, ki soo siar kaa kinkanɲ na paaki see faat kuukoɔ. Ɗanne ki u yet tiik na a “Laa nyii dinna ki saa, a kan mi lon loona.” Li taakpaak ni, ki tiik na koor.

<sup>20</sup> U poorpoweiteeb na nba la nna yoo nba, ki li bakitib, ki bi boi bi leeb a “Li teen nlee ki kinkanɲ na taan koor yiama na?”

<sup>21</sup> Ɗanne ki u betib a “Barmoniie ki n beeri na, li-i tee ki i teen Yennu yada nan barmonii ki ki biriso, i mun sii tuun nan maa tun tiik na bianɲinba nae; ɲaan li ki tee nna kuukoɔ kaa ki i saa tumi, ɲaan li-i tee ki i bet jojaann na gbaa a wun fikit ki saa baa mɔkgbenjir na ni, u saa fikita.

<sup>22</sup> Linba kur ki i saa miar Yennu li po, li-i tee ki i teen yada a i saa la, i set saa lawa.”

*Nisiab nba boi Yiisa u yiikoo po bianjinba  
(Mak 11.27-33; Luk 20.1-8)*

<sup>23</sup> Yiisa nba din saan koo Yenjiantu nasaakak ni ki want niib Yennu maan yoo nba na, ki mannteeb yudamm nan tin man ni saakab baar u boor ki tan boio a “yiikolannpoe ki a mok ki tuun linba na kuri? Ki nmee chaba li yiikoo?”

<sup>24</sup> Ki Yiisa jin a “N mun mok buboit ki saa boi-i; li-i tee ki i fit jini, n mun saa wanni yiikoo booru nba ki n dia ki tuun linba na: <sup>25</sup> Joonn nba din tuu wuur niib Yennu nyunwuru na, Yennu-e chabo li yiikoo amii nisaarike?”

Ki bi nmant faa leeb baann ki yeen a “Ti-i yet a Yennu-e chabo li yiikoo, u saa boit a ki bee teen ki ti ki teeno yada; <sup>26</sup> ki ti mun bia tiin nibur na janmaanii nan tin yet a ‘Niibe chabo li yiikoo,’ kimaan so kur teen yada nan Joonn set din tee Yennu sokiniie.” <sup>27</sup> Nanne ki bi bet Yiisa a “Ti ki mi.” Ki Yiisa mun betib a “Ton, n mun kan beti wunba chabin li yiikoo ki n tuun linba na.”

*Ki jin jasoo waas banlee po*

<sup>28</sup> Li poorpoe ki Yiisa boib a “I dukii nlee linba na po? Jasoo nna din mok waas banlee, ki tan yet wunba tee saakoo po na a ‘N bik, don kpaab ni ki saa ko dinna.’ <sup>29-30</sup> Naan ki u bet u baa a u kan do. Nanne ki u baa nyiko ki ji yet bonbik po nan waa bo bet u yooo bianjinba na. Ki noo narin sak ki jin a ‘N baa, min saa dow,’ naan ki ki doo. Li poorpoe ki saakoo na ji tan lebit u dudukit ki doo.” <sup>31</sup> Yiisa nba din yimm barjouk man ki gbenn na, ki u ji boi niib na a “Waas banlee na ni, nmee tun u baa loommu?”

Ki bi jiin a “Saakoo po na.”

Ki Yiisa betib a “Barmooniie ki n beeri na, lampogaarteeb nan bonchonchona tan saa donji Yennu naan ni koonuwa, <sup>32</sup> kimaan Joonn nba daan wuur niib Yennu nyunwuru na daan baar i boor ki wannu yentinu binbeja, naan ki i ki teeno yada, naan ki lampogaarteeb nan bonchonchona teeno yada. Yaa lek la linba na nba kur poorpo, i ki lebit i dudukit ki teeno yada.”

### *Toontunna barjouk*

*(Mak 12.1-12; Luk 20.9-19)*

<sup>33</sup> Ki Yiisa bia betib a “Gbiintir man barjouk leer. Naadaansoo nnae din be ki koo tilontii kpaab, ki chaan gungoun ki lintir, ki bia gbiir gbiouk nba ki bi tuu sii nmakii tiinii man loona nyun lej, ki maa difoouk a wuu guu tiinii na; ki jii kpaab na ki teen toontunna nii ni a bii gorii. A li-i taji jan nan pooru, bin poor ki turo, naan mun poor bi yar. Li poorpo ki u yaat saan digbansiar. <sup>34</sup> Ki tiloona man punpoor yoo tan baar, ki naadaano na tun u daaba a bin saan toontunna na boor ki saa gaar u tiloona na. <sup>35</sup> Naan toontunna na din soor u daaba mane, ki boo yeno bonchiann, ki kpai loo, naan jaat loo na mun tana. <sup>36</sup> Nanne ki u bia namm tun daabileeb, ki bi yab ki gar sinsinn yab na, ki toontunna na bia teemm nna. <sup>37</sup> Linba na poorpo ki u ji tun u mon mon bija, naan yeen a ‘N mi nan bi saa baak n bija nawa.’ <sup>38</sup> Naan toontunna na nba din tun ninbinn ki la u bija na baat, ki bi bet bi leeb a ‘U fadiiroe na; naant tin kpiu, naan ki

faar na n kpant ti yar.' <sup>39</sup> Bi din soorɔe ki nyii nana kpaab na kpiɲ ki saa kpiiu."

<sup>40</sup> Yiisa nba yin barjouk na ki gbenn na ki u boib a "Tɔn, kpadaana maɲ-i tani baari, u saa teen toontunna maɲ nlee?"

<sup>41</sup> Ki bi jiin a, "U saa kpi toonbiit damm maɲ gbenna, ɲaan jii u kpaab maɲ ki tur toontunsiab nba saa sak kii yoo kii teena li loona, punpɔɔr yoo."

<sup>42</sup> Ki Yiisa boib a "I daa ki mi karin laa sob Yennu gbouɲ ni bianinba-a? Li sob a:

'Tann nba ki tanmaara yɛtir na,  
ɲanne tan tee lotik ni tanɲann,  
Yennu-e teen nna, ki li teent bakitnaun.' "

<sup>43</sup> Ki Yiisa ji betib a "Barmɔniie ki n beeri na, Yennu tan saa gaar u naan i boor ki tur nibooru nba saa te ki wun di u naan nyooɔ. <sup>44</sup> ɲaan wunba tan baa tann maɲ paak, u saa but bute, ɲaan tann maɲ-i baa wunba paak, bimm, see ki li nana buk buk nan yon na."

<sup>45</sup> Mannteeb yudamm nan Farisiinba na nba din gbat barjokit na ki gbenn, ki bi bann nan Yiisa yin barjokit na ki denn ɲamme. <sup>46</sup> Ki bi ji din loon bin sooro, ɲaan tiin nibur na janmaanii, kimaan soo kur teen yada nan u set tee Yennu sokiniie.

## 22

### *Poochiann jaamm barjouk (Luk 14.15-24)*

<sup>1</sup> Ki Yiisa bia piin ki yiin barjokit ki teen niib maɲ a: <sup>2</sup> "Yennu naan tee nan batsoo nba din teen siir a wun teen poochiann jaamm ki tur u

bija nae. <sup>3</sup> U din tan tun u daaba a bin saan bet niib nba ki u daan poib na a bin baar; ŋaan ki bi ki loon bin baari. <sup>4</sup> Ki u ŋamm tun daabileeb ki betib a 'Ti saa man ki bet niib nba ki n daan poib na, a jaamm jeet teen siira; n poŋ kp̄ii naajai nan bonkob-kpamma, ki li kur teen siira; li paak, bii saana ki tan di jaamm maŋ.' <sup>5</sup> Ŋaan waa daan poi binba maŋ ki gbiint ki tur u daaba, ŋaan yaat yaat ki saan bi toona ni: ki yeno doo u kpaab, ki loo mun saan bont koiu daak ni. <sup>6</sup> Ŋaan ki siab mun soor u daaba na ki boob ki saa kp̄iib. <sup>7</sup> Ŋanne ki bat na wutoor doo bonchiann; ki u tun u kunkonkonna, ki bi saan ki saa kp̄ii nikpiira maŋ, ŋaan joo bi doo muu. <sup>8</sup> Li poorpo bat na ji din yiin u daaba ki tan betib a 'Poochiann jeet na teen siira, ŋaan niib nba ki n daan doŋ poib na ji ki ŋan nanni. <sup>9</sup> Li paak, ii saa man soŋjara ni, ki yiin binba kur ki i lab, ki bin baar na ki tan di jaamm maŋ.' <sup>10</sup> Ki u daaba na nyii ki saan soŋjara ni, ki saa yiin binba kur ki bi lab, li nibiit nan niŋamm; ki bi baar tan gbee poochiann ŋaak na kenken.

<sup>11</sup> "Tɔn, ki bat na tan koo a wun gon poochiann niib maŋ, ki la joo nna ki u foo bi sinsuuk ni ki ki lia poochiann jaamm tiati. <sup>12</sup> Ki bat na boio a 'N yook, a teen nlee ki tan koo nna ŋaan ki ki lia poochiann jaamm na tiati?' Ki joo na ki jiin siari. <sup>13</sup> Ki bat na bet u ŋaajab na a, 'Lorimo man, u nii nan u taa, ki nyi saa lu-u nanyer po bunbonn ni. Leŋewa ki u sii mo fabin ki ŋman nyana.' "

<sup>14</sup> Ki Yiisa joont, ki yet a "Yennu yiin niib bonchianne, ŋaan u tan saa gann waaminnae."

*Ki jiin lampo panu po*  
(Mak 12.13-17; Luk 20.20-26)

<sup>15</sup> Ki Farisiinba na saan ki saa lor baa saa teen bianjinba ki la Yiisa mɔ̃bonkpetir. <sup>16</sup> Nanne ki bi tun bi poorpoweiteeb nan Bat Herod poorpojɔ̃mu Yiisa boor, ki bi saa boio a “Wanntɔ̃, ti mi nan a tee barmɔ̃npakirɔ̃e, ki want niib Yennu sonu nan barmɔ̃nii, ki ki fiin niib po, kimaan a baka kaa nan nisaarik nba tee wunba. <sup>17</sup> Li paak, betirit, a dukii nlee ki jiin lampo panu po? Ti sennu chabit nan tii pa lampo kii teen Rom tin kpanbar Siisa, amii ti daa pa?”

<sup>18</sup> Yiisa din mi bi dudukbiit man. Li paak, ki u jiin betib a “Yimm kpinkpannii damm na, bee ki i loon yin kɔ̃onin jinjammii ni? <sup>19</sup> Wantin man likirib nba ki ti saa jii pa lampo man.” Ki bi jii likirib ki turo. <sup>20</sup> Ki u boib a “Nmee naauj nan sanne be likirib na paaki?” <sup>21</sup> Ki bi jiin a “Siisa yare.” Ki Yiisa betib a “Tɔ̃n, ii yenn-ii pa man kii teen Siisa linba tee u yar, n̄aan mun bia kii pa kii teen Yennu linba tee Yennu yar.” <sup>22</sup> Baa gbat linba na ki li ji bakitib, ki bi seet nyii, n̄aan nyiko.

*Ki jiin kpeemm firu po*  
(Mak 12.18-27; Luk 20.27-40)

<sup>23</sup> Li daar man ki Sajusiinba siab baar Yiisa boor. (N̄amme din tuu yaa kpeemm tan kan fir kuun ni na.) <sup>24</sup> Bi din bet Yiisa a “Wanntɔ̃, Moses din wann nan li-i tee ki jɔ̃ kɔ̃on u poo n̄aan kpo ki ki mar biki, a u naa bik n faar u pakɔ̃ok man ki mar waas tur kpeemmɔ̃ na. <sup>25</sup> Jab banlore nba tee naanɔ̃ok din be doo na ni, ki

saakoɔ po tan koon poo ki ki mar biki, ŋaan kpo, ki u naa bik faarɔ. <sup>26</sup> Ki li tun nna ki tur wunba pukin banlee, nan wunba pukin bantaa ni, ki saa gbenn jab banlore manj. <sup>27</sup> Li poorpo ki poo na tan joont kpo. <sup>28</sup> Li paak, li-i tee ki kpeemm fiiru daar baari, bi ŋmee tan sii yen poo manj? Kimaan bi kur din koonɔwa.”

<sup>29</sup> Ki Yiisa betib a “I bota, kimaan i ki mi Yennu gbouj, ki bia ki mi waa mok paŋ bianinba. <sup>30</sup> Kpeemm-i taŋi fiir kuun ni, bi sii tee nan malakanba nba be Yendouj ni nae. Pookɔont nan jakunt tan sii kaa. <sup>31</sup> Tɔn, ki jiin kpeemm fiiru po, i ki mi karin linba ki Yennu piaki u gbouj ni na-a? <sup>32</sup> a, ‘Mine tee Abraham Yennu, nan Aisak Yennu, nan Jakob Yennu.’ Niib na nba din poŋ kpo sianyoowa na, ŋaan bi bia lek daa fo, kimaan Yennu ki tee kpeemm Yennu kaa, u tee footib Yennu-e.”

<sup>33</sup> Niib na nba din gbat u wannu manj, ki li bakitib.

### *Sennu nba gar leer labaar*

*(Mak 12.28-34; Luk 10.25-28)*

<sup>34</sup> Farisiinba na nba din gbat a Yiisa moamaan na nyann Sajusiinba na, ki bi taan leeb ki baar. <sup>35</sup> Ki bi ni yenɔ nba tee sennu wanttoɔ na boi Yiisa buboit, a wun jammɔ, a <sup>36</sup> “Wanttoɔ, sennlanupoe tee sennjaann ki gar sennii na kuri?”

<sup>37</sup> Ki Yiisa jiinɔ a “ ‘Ti loon a Yomdaanɔ Yennu, kii mantik-ii loonɔ nan a par kura, nan a seek kura, nan a dudukit kura.’ <sup>38</sup> Sennu na tee sennjaanne ki bia tee sinsinn sennu.

<sup>39</sup> Linba pukin ŋanlee ni ki tee barkpann mun

bia tee nnae, 'Ii loon a loo nan faa loon a moŋ bianjinba na.' <sup>40</sup> Moses sennu na kura, nan Yennu sokiniinba wannu na kura gaa sennii ŋanlee na paake."

*Ki jiin Masia nba tee wunba po  
(Mak 12.35-37; Luk 20.41-44)*

<sup>41</sup> Farisiinba na nba din lakin leeb yoo nba, ki Yiisa boib a <sup>42</sup> "I dakin nlee ki jiin Yennu Ni-ganntoo Masia na po? U tee ŋmee yaaboonne?"

Ki bi jiin a "U tee Defid yaaboonne."

<sup>43</sup> Ki u ji boib a "Ki bee ki Defid din yiino a 'Yomdaano?' Yennu Seyeeŋ nba din gbee Defid na ki u yet a

<sup>44</sup> 'Yennu din yet n Yomdaano a, Karin n niidiitu po

mokmok nan maa tan saa te fan ŋmaa a datai a taapaun ni.'

<sup>45</sup> Li paak, Defid nba din yiin Masia a 'Yomdaano' na, nlee ki Masia tee ŋoo Defid yaaboonni?"

<sup>46</sup> Sooo din ki fit jiin u buboit manji; li paak, laa nyii li daar manji ki saa, sooo ji din ki mok par ki saa boi Yiisa buboisiati.

## 23

*Ki jiin sennu wanteeb nan Farisiinba binben po*

*(Mak 12.38-39; Luk 11.43, 46; 20.45-46)*

<sup>1</sup> Nanne ki Yiisa piin ki piak teen nibur na nan u poorpoweiteeb a, <sup>2</sup> "Sennu wanteeb nan Farisiinba nae ki bi turib yaak nan bii sokint Moses sennu na. <sup>3</sup> Li paak, li ŋan ki yii saak kii waa baa wanti linba na kura, ŋaan kii mi



man ki yin gaar bi binben, kimaan bi ki tuun baa want linba manji. <sup>4</sup> Bi jint niib jik-kpiata nba paar nan jiinu, naan kan sak jii bi niibir gbaa ki babir soo ki wun jii. <sup>5</sup> Linba kur ki bi tuun na, bi tuun a niib n la ki pakibe. Gotir baa jii Yennu sennu na waan nba sob ghanbis paak, ki lor lor bi yugbia nan bi nii paak, ki li yarin bianinba; bia gotir bi liatbaant mogbana nba fok ki bia yarin bianinba. <sup>6</sup> Bi-i saan jaamm ni, bi tuu loon bin kar yudamm kinkaanii paake; bi-i koo Yenjiantu diit ni, bi bia loon nijaana kaanii boae. <sup>7</sup> Bi bia tuu loon ki niib-ii foontib burchinfoontii dai ni, kii yib a 'Wannteeb.' <sup>8</sup> Naan yimm narin, i daa te ki bi yi-i 'Wannteebi,' kimaan i kura tee naa waase nan leeb, ki mok Wanntoo yenokoo. <sup>9</sup> I daa yi soo 'Baa' tingbouj na ni, kimaan i mok Baa yenokoo; hooe tee Yennu nba be sanpaapo na. <sup>10</sup> I bia daa te ki niib yi-i 'Yomdammi,' kimaan i mok Yomdaano yenokoo; hooe tee min Yiisa Masia. <sup>11</sup> Wunba tee nijaann i ni, wun teen u moŋ i kura toontunno. <sup>12</sup> Wunba dont u moŋ, Yennu tan saa sikinowa; naan wunba sikint u moŋ, Yennu-e tan saa donno."

*Kpinkpannii damm labaar*

*(Mak 12.40; Luk 11.39-42, 44, 52; 20.47)*

<sup>13</sup> Yiisa bia yet a "Yimm sennu wannteeb nan Farisiinba nba tee kpinkpannii damm na, li sii bi turi, kimaan yimme loo Yennu naan tammob a niib daa koo. I moŋ moŋ ki koo, naan dok binba loon bin koo tammob man na. (( <sup>14</sup> Yimm sennu wannteeb nan Farisiinba nba tee kpinkpannii damm na, li sii bi turi, kimaan i gaan pakoi jei,

ki mei Yennu ki yukii ki kpann a i tee yentinnae, i tubdatu tan sii bi bonchiann.))

<sup>15</sup> “Yimm sennu wantteeb nan Farisiinba nba tee kpinkpanonii damm na, li sii bi turi, kimaan i pootir moka ki gaar digbana ki loon wunba saa kpint u binbeɲ kii waa i poorpoe, ki li-i tee ki i tan la soo ki u waaini, i tuu te ki u biit nba jikito saa Sintaanii muu ni na n namm pukin taar munlee-e ki gar i yara.

<sup>16</sup> “Yimm joonii nba daar i leeb na, li sii bi turi. I want niib na a ‘Soo-i por Yenjiantu nasaakak na, li ki kpaa talasi, njan li-i tee ki soo por likirii nba be nasaakak man ni na, a see ki u gbeen u mopor na.’ <sup>17</sup> Yimm joonii nba daar i leeb na, bona njanlee na ni, lannpoe tee barkpanni, likirii na amii Yenjiantu nasaakak nba te ki likirii na tee Yennu yar na? <sup>18</sup> Ki i bia yet a ‘Li-i tee ki soo por maruɲ binbintiri, li ki kpaa talasi, njan li-i tee ki soo por maruɲ bonkobuk nba paa binbintir na paak na, see ki u gbeen u mopor man.’ <sup>19</sup> I set tee jooniie nan barmonii. Bona njanlee na ni, lannpoe tee barkpanni, maruɲ bonkobuk na koo binbintir nba te ki li tee Yennu yar na? <sup>20</sup> Li paak, li-i tee ki soo por maruɲ binbintiri, li want nan u por binbintir na nan linba kur paa li paak nae. <sup>21</sup> Li-i tee ki soo bia por Yenjiantu nasaakak na, li want nan u por njaak man nan Yennu nba be leɲ nae. <sup>22</sup> Li-i bia tee ki soo por Yendouɲ, u por Yennu naangbouɲ nan njoɔ nba kar li paak mane.

<sup>23</sup> “Yimm sennu wantteeb nan Farisiinba nba tee kpinkpanonii damm na, li sii bi turi. I jikit baarii nan bukuɲ nan narii nan li bonlia piik

nɔɔk ni yennkɔɔ ki teen Yennu, ɲaan nyik linba tee barkpana u sennu ni; ɲanne tee barbunu nba took, nan ninbatinu, nan yada teenu. Linba na nbae bo ɲan nan yii tuun, ki daa nyikit li yenn nba tumu. <sup>24</sup> Yimm jɔɔnii nba daar i leeb na, i tuu lot kpajuuke nyun ni ki lu, ɲaan nak laagumii nan nyun.

<sup>25</sup> “Yimm sennu wantteeb nan Farisiinba nba tee kpinkpanii damm na, li sii bi turi, kimaan i sokii nyunnyunmanii nan senii poorpoe, ɲaan ki nɔɔk ni gbee nan fatuk nan jawuuk. <sup>26</sup> Yimm Farisiinba nba tee jɔɔnii na, sokit man nyunnyunmanii nan senii nɔi ni sinsinn, ki li poorpo saa nyiwa.

<sup>27</sup> “Yimm sennu wantteeb nan Farisiinba nba tee kpinkpanii damm na, li sii bi turi. I tee nan kaat nba ki bi maa ki pent nae, ki li poorpo fan, ɲaan ki li nɔɔk ni gbee nan kpaba nan poi. <sup>28</sup> Nnae ki niib gorii i nanyer po ki i ɲan, ɲaan ki i para gbee nan kpinkpanii nan toonbiit.

*Yiisa nba piak bi tubdatu po bianjinba  
(Luk 11.47-51)*

<sup>29</sup> “Yimm sennu wantteeb nan Farisiinba nba tee kpinkpanii damm na, li sii bi turi. I maa Yennu sokiniinba kaat, ki jabib, ki sent, ki li tee linba saa tiar niib yentinna kuun po, <sup>30</sup> ɲaan yeen a ‘Ti-i dinji bonni be ti yeejamm yoo, ti din bo kan tun baa din tun linba ki kpai Yennu sokiniinba na.’ <sup>31</sup> Linba na want nan i set sak nan i tee binba din kpai Yennu sokiniinba na yaaboonae. <sup>32</sup> Li paak, i yeejamm nba din piin ki tuun toonbiit nba na, tontir man. <sup>33</sup> Yimm wai! Yimm waalabirii waas na, nlee ki i tan

saa nyi tubdatu nba tee muu nba kan mi kpeen na ni? <sup>34</sup> Li paake ki n beeri na, n tan saa tun Yennu sokiniinba nan yandamm nan wantteeb i boor ni, naan i tan saa kpi bi siabe, ki kpaas siab dapunpuna paak, ki boo siab Yenjiantu diit ni, ki bia wei tokii bi taa ki nyi doyenu ni ki tootir doleu ni. <sup>35</sup> Li paak, baa din kpai yentinna nba na kura tubdatu be i paak, laa nyii nipeemo Abel ki saa tuu Berekia bija Sekaria, wunba ki bi din kpaiu Yenjiantu nasaakak nan maruŋ binbintir sinsuuk ni na. <sup>36</sup> Barmoniie ki n beeri na, motana nigbouŋ na tan saa la tubdatu, toonbiit maŋ kur paake.

*Yiisa nba loon Jerusalem teeb bianjinba  
(Luk 13.34-35)*

<sup>37</sup> “Nbaayoo-o, Jerusalem teeb, yimm nba kpi Yennu sokiniinba, ki bia jaat u toomiinba nba ki u tumm i boor na tana, bikinu taar munjaae ki n gbaa maa n lakini yomm nan korik nba tuu lakin u waas u kpinkpant ni na, ki i ki saki. <sup>38</sup> Gotir man, Yennu nyik i jiantu njaak nae, ki li doo yann. <sup>39</sup> N beerie, laa nyii motana ki saa, i kan mi lan ki saa tuu daar nba ki i tan saa yet a ‘Piisin be wunba baat Yennu sann ni na paak.’ ”

## 24

*Yenjiantu nasaakak biiru po  
(Mak 13.1-2; Luk 21.5-6)*

<sup>1</sup> Yiisa nba din nyii Yenjiantu nasaakak ni ki saa na, ki u poorpoweiteeb baar u boor ki tan wanto jiantu njaak maŋ diit. <sup>2</sup> Nanne ki u boib a “I la linba na nba kura-a? Barmoniie ki n beeri

na, bi tan saa tut li kur ki lu tinj niwa, ki li tann yennkoo tan kan biar ki paa leer paaki.”

*Mukisuk nan biak labaar  
(Mak 13.3-13; Luk 21.7-19)*

<sup>3</sup> Yiisa nba din tan saan kar kunkonn nba ki bi yir Olif Tiinii kunkonn paak na, ki u poorpoweiteeb baar u boor, bi kuukoo, ki boio a “Bia yooe ki linba na kur tan sii tee? Bee tan sii tee a baaru nyinn, nan durinya na gbennu nyinni?”

<sup>4</sup> Ki u betib a “Ii mi man ki soo n tan kpanni, <sup>5</sup> kimaan niib bonchiann tan saa jii n sanne ki baar ki yeen a njamme tee min Masia na, ki kpann niib bonchiann. <sup>6</sup> I tan saa gbat tob fuut i koonn ni, nan li labaar banfoka, naan i daa jee, kimaan li kpaa talase nan linba na kur n tun, naan li ki want nan durinya gbennu baare na. <sup>7</sup> Nibooru nan nibooru tan saa kon nan leeb, ki kpanbar nan kpanbar mun tan saa took leeb ki kon. Ki kon nan tinj jekiruk tan sii be loka kur po. <sup>8</sup> Linba na nba kur tan sii tee nan matyiaru pinpiik nae.

<sup>9</sup> “Li yoo man bi tan saa soori ki dinni biak, ki kpi-i, ki booru kur tan sii nami kimaan yaa waan na paak. <sup>10</sup> Li yoo man, niib bonchiann tan saa yet n weiu, ki fikisir leeb, ki bia nan leeb. <sup>11</sup> Ki faak sokiniinba tan saa nyi ki kpann niib bonchiann. <sup>12</sup> Biit nba tan saa mantik yabit tingbouj na ni na paak, niib bonchiann lomm tan saa maak. <sup>13</sup> Naan wunba tan gubin nan biak yoo man joontu tan saa la tinnuwa. <sup>14</sup> Ki bi tan saa moont Yennu naan barjanii moontii

na tingbouŋ na kur po, a nibooru kur n gbata, ki durinya gbennu n yen fit baar.

*Janmaanbiiuk labaar*

*(Mak 13.14-23; Luk 21.20-24)*

<sup>15</sup> “I tan saa la bonbiir nba ki Yennu sokinii Daniel din yet li po na, linba ki Yennu koo na, ki li see Yenjiantu nasaakak ni.” (Wunba kur tan karin sobu na, wun bann laa want linba.)

<sup>16</sup> “Li yoo maŋ, binba tan be Judea yent ni, bin chiar kii do kunkona, <sup>17</sup> ki wunba tan be u njaak yur paak,\* waa daa gbaa koo u diiuk ni a wun jii u siari, <sup>18</sup> ki wunba tan be u kpaab ni, u daa nmat a wun jii u liatiri. <sup>19</sup> Yoo maŋ ni, podamm nan binba dia walai tan saa di biak bonchiann. <sup>20</sup> Ii mei Yennu man ki u daa te ki biak na baat sabouŋ, koo foon daari. <sup>21</sup> Kimaan li yoo maŋ, biak sii be; Yennu nba nan durinyawa nan dinna, li biak booru daa ki mi baari; li booru mun bia ji kan mi baar linba na poor po. <sup>22</sup> Yennu-i taŋi kii wat daa maŋ yabinti, soo tan kan tinni; njan u nigannkab paak ki u tan saa wat daa maŋ yabint.

<sup>23</sup> “Li yoo maŋ, soo-i taŋi beti a ‘Gotir man, Masia be nna,’ amii ‘U be nawa,’ i daa tee li daano yada, <sup>24</sup> kimaan li yoo maŋ, faak Masianba nan faak sokiniinba tan saa nyi ki tuun nyina nan bakitnaun toonjaana a bin kpann niib; ki li-i taŋi fit gbaa, bi tan saa kpann Yennu nigannkab tionja. <sup>25</sup> Gbiintir man, n doŋ betiewa, ki yoo maŋ daa ki baari.

<sup>26</sup> “Li paak, bi-i taŋi beti a ‘Gotir man, u be muuk ni,’ i daa saa; koo bi-i beti a ‘Gotir man,

---

\* **24:17** 24.17 Bi njei yura paak, bi din tuu sere.

u be diiuk ni,' i daa tee yada, <sup>27</sup> kimaan min nisaarik Bik baaru tan sii tee nan sanyikintii nba tuu nyi yondo po ki saan sik yonbaa po nae.

<sup>28</sup> "Siaminba ki bonkpeenn be, leñe ki juut tikii.

*Yüsa jenu labaar*

*(Mak 13.24-27; Luk 21.25-28)*

<sup>29</sup> "Biak na poorpo ki yonnu tan saa bönn, ki ŋmaarik ji kan yenti; ki ŋmaabira tan saa nyi sanpaapo ki baa, ki linba kur be sanpaapo tan saa damm ki ŋmat ŋmat. <sup>30</sup> Li yoo mañ, niib tan saa la min nisaarik Bik jenu nyinn sanpaapo, ki nibooru booru nba be tingboun na ni kur tan sii fabin, ki la min nisaarik Bik, ki n be sanpagboun ni, ki siik nan pañ nan yentsaakar. <sup>31</sup> Naatunn tan saa mo, ki n tun n malakanba ki bin saan ki tikir n nigannkab nba be tingboun na kur po, ki baar namm.

*Sinsabik nyinn labaar*

*(Mak 13.28-31; Luk 21.29-33)*

<sup>32</sup> "Ii jii sinsabik ki tumii yan mañ; yaa tuu la ki tiik mañ bintir yoo nba, i ji tuu mi nan siok pere na. <sup>33</sup> Nnae mun, yoo nba ki i tan laat ki linba na nba kur tuun, yin bann nan n jenu mañ pere na, li ji kan yukiri. <sup>34</sup> Barmõniie ki n beeri na, motana nigboun na kan kpo ki gbenn kaawa ki linba na kur n tumi. <sup>35</sup> Sanpaak nan tin tan saa gara, ŋaan n maan ŋarin kan mi gari.

*Soo ki mi Yüsa jenu daar*

*(Mak 13.32-37; Luk 17.26-30, 34-36)*

<sup>36</sup> "Ŋaan soo ki mi daar mañ koo yoo nba ki n saa jeni; li sanpaapo malakanba, koo min Yennu

Bija mɔŋ ki mi, see n Baa Yennu kooe mi. <sup>37</sup> Laa din tee bianjinba Nowa yoo na, li mun bia tan sii tee nnae min nisaarik Bik jenu yoo. <sup>38</sup> Nowa yoo maŋ, yoo nba ki nyunchioŋ din daa ki baar na, niib din di ki nyu, ki kooŋt poob, ki jikit bi waas ki teemm jab, ki tan tuu daar nba ki Nowa koo ŋaringbenir ni na. <sup>39</sup> Niib maŋ din bia daa ki bann linba tuumi, ki tan tuu daa nba ki nyungbeeuk baar ki dii bi kur na. Li bia tan sii tee nnae, yoo nba ki min nisaarik Bik tan saa jen. <sup>40</sup> Daar maŋ ni, jab banlee tan sii boɔ kpaab ni ki ko, ki n tan saa jii yeno ŋaan nyik loo. <sup>41</sup> Poob banlee tan sii lakin boɔ naan dii, ki n tan saa jii yeno ŋaan nyik loo.

<sup>42</sup> “Li paak, ii chek i mɔŋ paak maŋ, kimaan i ki mi daar nba ki min i Yomdaano saa jeni. <sup>43</sup> Ŋaan bant nan li-i tee ki ŋaadaano poŋ mi yoo nba ki nanyuko yaa wun baar u ŋaak ni nyioku, u sii kare guu; u kan sak ki nanyuko na n tan koo ki jamo. <sup>44</sup> Li paak, li ŋan ki i mun teen siir yoo kura, kimaan min nisaarik Bik mun bia tan saa jen, yoo nba ki i ki dukii n jenu poe.

*Daabir nba saa sak u yomdaano mɔb bianjinba  
(Luk 12.41-48)*

<sup>45</sup> “Daabilano tee yandaano ki tuun u chanbaa nba wanto bianjinba? Ŋooe tee wunba ki u chanbaa teeno daabiyudaano a wuu gorii u daabileeb, kii teemm mann nan li sonu. <sup>46</sup> Li-i tee ki u chanbaa tan kpen ki la ki u tuun nna, parpeenn sii tee daabir maŋ yare. <sup>47</sup> Barmoniie ki n beeri na, u chanbaa maŋ saa jii u mokint kur ki teen daabir maŋ nuu ni, a wuu gorii. <sup>48</sup> Ŋaan



li-i tee ki daabir maŋ tee daabiyoonn ki dukin a u chanbaa kan kpen yiami, <sup>49</sup> ki piin ki boo u daabileeb, ki ɲɔɔ nan danyuurit bia lakin ki nyu ki di, <sup>50</sup> u chanbaa maŋ tan saa kpen daar nba ki u ɲaa u kpenu tamae, nan yoo nba ki u ki mi. <sup>51</sup> U chanbaa na saa dat u tubir bonbiir, ki teenɔ nan baa tuu teen kpinkpannii damm bianjinba na. Leŋ maŋe ki u ji sii mɔ fabin ki ɲman nyana.

## 25

### *Ki jiin sapaamm piik po*

<sup>1</sup> “Yennu naan labaar tee nan sapaamm piik nba din jii bi fita ki saa a bin took pooyookir sɔɔ nae. <sup>2</sup> Sapaamm maŋ ni banɲmu din tee jatite, ki banɲmu mun tee subindamm. <sup>3</sup> Sapaanjata na din jii bi fita, ɲaan ki tenn kpan ki guun bi mɔɲi, <sup>4</sup> ki sapaansubindamm na ɲarin jii kpan ki liak salena ni, ki dia pukin bi fita po. <sup>5</sup> Pooyookir sɔɔ maŋ din ki baar yiami, ki gɔɔn tan soor sapaamm na kura, ki bi gɔɔn.

<sup>6</sup> “Ki tansuunii ki bi tan gbat kunkɔr a ‘Gotir, pooyookir sɔɔ nae baat na. Nyin man ki tookɔ.’ <sup>7</sup> Ki sapaamm piik na kur fiir ki ɲak bi fita na. <sup>8</sup> ɲanne ki sapaanjata na miar subindamm na a ‘I kan turit i kpan na waami-i? Kimaan ti fita na loon lin kpeene.’ <sup>9</sup> Ki subindamm na jiin a ‘Aaii, li kan jaŋ timm nan yimmi. Ii saa man binba kɔi kpan boor ki saa daa i yara.’ <sup>10</sup> Sapaanjata na nba din yaat ki saan a bin daa kpan yoo nba, ki pooyookir sɔɔ na dokit. Subindamm banɲmu nba teen siir na din wei pooyookir sɔɔ maŋe, ki

saan poochiann ɲaak na ni ki kɔɔ diiuk ni, ki bi loon gann ki kpar.

<sup>11</sup> “Li poorpo, sapaanjata na nba tan jen yoo nba, ki bi baar see tammɔb na boor ki yi a ‘Chanbaa, chanbaa, lootir gann ki tin kɔɔ.’ <sup>12</sup> Ki pooyookir sɔɔ na jiin a, ‘Barmɔniie ki n beeri na, n ki miini.’ ”

<sup>13</sup> Yiisa bia din betib a “Ii mi man, kimaan i ki mi daar nba koo yoo nba ki min i Yomdaano tan saa jeni.”

*Ki jiin daaba bantaa po*  
(Luk 19.11-27)

<sup>14</sup> “Yennu naan labaar bia tee nan ɲaadaansɔɔ nba din lor a wun saan sɔnu, ɲaan yiin u daaba ki tan chentib likirii a bin gaar kii kpentir nae.

<sup>15</sup> U din tur sinsinn yɔɔ na bɔtoot tusbamm ɲanɲmu, ki tur wunba paa na tusbamm ɲanlee, ki tur wunba joont na tusbamm yennkɔɔ. U din tur sɔɔ kur nan waa mi li yɔɔ kotir nba tee bianɲinbae, ɲaan yaat saan. <sup>16</sup> Wunba din gaar tusbamm ɲanɲmu na din nyiie nan u likirii yiama ki piin kpinkpouɲ, ki la nyɔɔt tusbamm ɲanɲmu ki pukin li paak. <sup>17</sup> Nnae ki wunba din gaar tusbamm ɲanlee na mun nyii ki kpentir ki la nyɔɔt tusbamm ɲanlee ki pukin li paak.

<sup>18</sup> Naan wunba gaar tusbamm yenn na ɲarin din nyiie, ki gbiir bootuk, ki pii u yomdaano likirii na.

<sup>19</sup> “Li din yukir bonchiann, ki ɲaadaano man tan jen, ki yiin u daaba na, a wun kan bi likirii man, ki la baa la nyɔɔt bianɲinba. <sup>20</sup> Wunba din gaar tusbamm ɲanɲmu na nba kɔɔ yoo nba, ki u jii tusbamm ɲanɲmu leer ki pukin tur u

yomdaano, naan yet a 'N yomdaano, a din turin tusbamm nanjmu, naan gotir, n mun bia la nyoot tusbamm nanjmu.' <sup>21</sup> Ki u yomdaano na beto a 'N faan, a tee daabinanoe, ki bia tuun fanu; faa dia waamina fanu bianjinba na, li paak, n saa jii saamewa ki teen a nuu ni. Parpeenn nba ki n mok na, li ji tee min nan fin yare.'

<sup>22</sup> "Ki wunba mun din gaar tusbamm nanlee na koo ki baar u yomdaano na boor, ki yeto a 'N yomdaano, gotir, a din turin tusbamm nanlee-e, naan n kpent ki la nyoot tusbamm nanlee pukin.' <sup>23</sup> Ki u yomdaano yeto a 'N faan, a tee daabinanoe, ki bia tuun fanu; faa dia waamina fanu bianjinba na, li paak, n saa jii saamewa ki teen a nuu ni. Parpeenn nba ki n mok na, li ji tee min nan fin yare.'

<sup>24</sup> "Ki wunba mun din gaar tusbamm yenn na narin koo ki baar u yomdaano boor ki yeto a 'N yomdaano, n mi nan a tuu tee wunba di fobite, kimaan linba ki a ki dii fara li paak na, fin narin loon naninbae ki fii di; siaminba ki a lek ki buri naan fin narin jaan leje. <sup>25</sup> Li paak, n daan tiina janmaaniie, ki jii a tusbamm yenn na ki gbiir pii tij ni. Li paak, nanne na. Gaat a bont.'

<sup>26</sup> "Nanne ki u yomdaano na beto a 'Fin daabiyoonn na, a tee gbannyakdaano; a pon mi nan n tee wunba di linba ki n ki dii fara li paake, ki bia mi nan n jaan siaminba ki n ki bure, <sup>27</sup> ki bee ki a ki kpent niib n likirii man ki bin tan paanin nyooti? Maa bo tan jen na n bo saa la n bont ki nyoot paa li paake. <sup>28</sup> Li paak, gaat likirii

man u boor man, ki pukin wunba mək tusbamm piik na; <sup>29</sup> kimaan wunba kur mək bona, bi saa pukinɔ ki wun məkɪt bonchiann; ɲaan wunba kɔŋ bont, bi bia saa tont bonmintik nba ki u mək nae. <sup>30</sup> ɲaan jayann na ɲarin, jiiɔ man kii nyi ki saa lu-u nanyer po, bunbɔnn ni. Leɲewa ki u sii mɔ fabin ki ɲman nyana.'

*Yiisa nba saa bu niib buut bianjinba*

<sup>31</sup> "Tɔn, min nisaarik Bik-i tani jen nan n paŋ nan malakanba kur yoo nba, n saa kar n naangbouŋ paak, ki la baakchiɔŋ, <sup>32</sup> ki lakin tingbouŋ na nibooru kur n tɔɔnn, ki bɔkitib nan pekpaarik nba tuu bɔkit pei nan buunii bianjinba na. <sup>33</sup> N tan saa jii pei ki sennib n niidiitu po, ɲaan jii buunii na mun ki sennib n niigaŋ po. <sup>34</sup> Ki min Bat saa yet binba see n niidiitu po na a 'Yimm nba ki n Baa Yennu teen piisin i paak na, ii saana man ki tan kɔɔ naan nba ki Yennu ɲamm ki guuni durinya piinu niwa na, <sup>35</sup> kimaan kon din məkɪn, ki i dinnin; ki nyunnyukuru məkɪn ki i turin nyun. N din tee saamɔe, ki i gaarin saauŋ i ɲei ni. <sup>36</sup> N din somm yanne, ki i turin tiat; ki n yiar, ki i sommin; bi din kɔɔnin dansarik, ki i yoo gɔntin.'

<sup>37</sup> "Ki yentinna na tan saa jiin ki boin a 'Ti Yomdaano, bee yooe ki ti din la-a ki kon mɔka ki ti dinnani? koo bee yooe ki nyunnyukuru din mɔka ki ti tura nyumi? <sup>38</sup> koo bee yooe ki ti din la-a ki a tee saamɔ ki ti gaara saauŋ ti ɲei ni? koo ki a somm yann ki ti tura tiati? <sup>39</sup> koo bee daare ki ti din la ki a yiar ki ti sommani? koo ki a kɔɔ dansarik, ki ti baar ki gɔnani?' <sup>40</sup> Ki min

Bat mun tan saa jiin a 'Barmõniie ki n beeri na, yaa din tun linba ki tur wunba tee tatimõõ n naa waas sinsuuk ni na, i din tuun ki teen mine.'

<sup>41</sup> "Li poorpo, n tan saa jiant ki bet binba see n niiganj po na a 'Yimm nibiit nba ñan nan tubdatu na, seetir nna. Ii saa man ki saa koo muu nba di ki kaa kpeenu, ki Yennu ñamm ki guun Sintaanii nan u niib na ni, <sup>42</sup> kimaan kon din mokin, ñaan ki i minnin jeet; ki nyunnyukuru mokin, ñaan ki i minnin nyun. <sup>43</sup> N din tee saamoe, ki i ki sak gaarin i ñei ni; ki n tan somm yann, ñaan ki i minnin tiat; ki n tan yiar, ki i ki sommin, ki n bia tan koo dansarik, ki i ki gonin.'

<sup>44</sup> "Li yoo ki bi mun tan saa ñmat ki boin a 'Ti Yomdaano, bee yooe ki ti din la-a ki kon moka, koo nyunnyukuru moka, koo ki a tee saamo, koo ki a somm yann, koo ki a yiar, koo ki a koo dansarik, ñaan ki ti yet a sommiri?' <sup>45</sup> Li yoo mane ki n saa jiin a, 'Barmõniie ki n beeri na, yaa din yet yin tun linba ki tur wunba tee tatimõõ n naa waas sinsuuk ni na, i din yet yin tun ki tur mine.' <sup>46</sup> Binba na tan saa saan ki saa la tubdatu nba kaa gbennu na, ñaan ki yentinna na n mun saan ki saa be manfoor nba kaa gbennu na ni."

## 26

*Yudamm nba lor a bin kpi Yiisa bianjinba  
(Mak 14.1-2; Luk 22.1-2; Joonn 11.45-53)*

<sup>1</sup> Yiisa nba din pak maan na kur ki gbenn yoo nba, ki u bet u poorpoweiteeb a, <sup>2</sup> "I mi

nan daarpoe tee yukitgar\* tiaru jaamm. Bi daan saa jii min nisaarik Bik ki tur niib ki bin kpaan dapunpunn paak.”

<sup>3</sup> Li yoo maŋ ki mannteeb yudamm nan Juu teeb saakab tikir leeb Kayafas ŋaak ni, wunba tee mannteeb yudamm saakoo na. <sup>4</sup> Bi din lor baa saa teen bianjinba ki boor soor Yiisa-e ki kpiu. <sup>5</sup> Ŋaan bi din lor nan bi kan sooro jaamm daa na ni, kimaan bi-i teen nna, see ki kpikpiruk baar.

*Poosoo nba din but tulaarii Yiisa yur paak bianjinba*

*(Mak 14.3-9; Joohn 12.1-8)*

<sup>6-7</sup> Ton, Yiisa nba din be Betani doo ni, Simonn nba din tee gbaatir na ŋaak, ki kar di jeet, ki poosoo koo ki dia salennann,† ki li gbee nan tulaarii nba daauk paar bonchiann, ki u baar tan but Yiisa yur paak. <sup>8</sup> Yiisa poorpoweiteeb na nba la nna yoo nba, ki bi burin nan leeb nan wutoor ki yeen a “Bee ki poo na biir tulaarii na nna mani? <sup>9</sup> Bi bo saa fit koir ki gaar likirii bonchiann ki somm talasdamm.”

<sup>10</sup> Ki Yiisa bann bi bunburimii maŋ paak, ki boib a “Bee teen ki i burin ki daamii poo na? Bonŋanne ki u tun ki turin maŋ. <sup>11</sup> Talasdamm ŋarin sii yoo be i boore, ŋaan min ŋarin kii yoo be nani kaa. <sup>12</sup> Tulaarii nba ki u but n paak na, u teen n piinu siire. <sup>13</sup> Barmoniie ki n beeri na, siaminba kur ki bi saa moont barnanii na

---

\* **26:2** 26.2 Yennu malaka din kpai Ijipt teeb bijakpera, ŋaan nyik Israel yab. (Nyinu 12.29) † **26:6-7** 26.6-7 Bi din jii tanŋann nba ki bi yir “alabaster” nae ki nan salenn maŋ.

tingbounj na ni, bi bia saa moont poo manj nba tun linba na, ki li sii tee tiarin ki jiin u po.”

*Judas nba sak nyii Yiisa poor bianjinba  
(Mak 14.10-11; Luk 22.3-6)*

<sup>14</sup> Li yoo na ki Yiisa poorpoweiteeb na ni yeno, wunba ki bi yiu Judas Iskariot na, nyii ki saan mannteeb yudamm boor, <sup>15</sup> ki saa boib a “I saa turin bee njaan ki n lon sonii ki Yiisa n koo i nuu ni?” Ki bi kan salimpeena likbina piintaa ki turo. <sup>16</sup> Laa din nyii li yoo manj ki u lon sonii nba ki u saa jii Yiisa ki kubin bi nuu ni.

*Yiisa nan u poorpoweiteeb nba din dii yukitgar tiaru jaamm bianjinba  
(Mak 14.12-21; Luk 22.7-13, 21-23; Joonn 13.21-30)*

<sup>17</sup> Boroboro nba ki bi din ki tee datinj na jaamm piinu daar, ki Yiisa poorpoweiteeb baar u boor, ki tan boib a “A loon ki tin saan lee ki teen siir ki guuna yukitgar tiaru jaamm na dinu?”

<sup>18</sup> Ki u betib a “Ti saa man doo na ni, jasoo nna njaak, ki saa beto a ‘Ti Wanntooe tunt a ti tan beta a u yoo pera, ki u loon njoon nan u poorpoweiteeb n di yukitgar tiaru jaamm na a njaak na ni.’ ”

<sup>19</sup> Ki u poorpoweiteeb na set tun nan waa wannib bianjinba na, ki teen jaamm manj jeet siir.

<sup>20</sup> Daajoouk nba din tan baar, ki Yiisa nan u poorpoweiteeb piik nan banlee na koo ki kar a bin di. <sup>21</sup> Baa di yoo nba, ki Yiisa yetib a “Barmoniie ki n beeri na, i ni yeno saa nyi n poora.”

<sup>22</sup> Ki u poorpoweiteeb na para biir bonchiann, ki bi piin ki boio yeno yeno a “N Yomdaano, barmonii, a yeen mine-e?”

<sup>23</sup> Ki u jiin a, “Wunba ki min nan ηoo lakin sukii kpinsenyen nie saa nyi n poor. <sup>24</sup> Min nisaarik Bik set saa kpo nan Yennu gbouj nba wann bianjinba nae, ηaan bonbiir sii be wunba yaa wun nyi n poor na paak. Bi-i bonni kii mar li daano gbaa, li bo so.”

<sup>25</sup> Nanne ki Judas nba yaa wun nyi u poor na mun boio a “Wanntoo, a yeen mine-e?”

Ki Yiisa jiin a “Nan faa yaa na.”

*Ki jiin ti Yomdaano jeet dinu po*

*(Mak 14.22-26; Luk 22.14-20; 1 Korint teeb 11.23-25)*

<sup>26</sup> Baa di jeet man yoo nba na, ki Yiisa jii boroboro, ki tur Yennu niipoouk, ηaan ηmit ηmit, ki tur u poorpoweiteeb na, ki betib a “Gaat man ki di. Linba nae tee n gbanant,” <sup>27</sup> ki bia jii nyunnyunman nan tiloona nyun, ki tur Yennu niipoouk ki jii turib, ki betib a, “Gaat man, ki i kura n nyu. <sup>28</sup> Linba nae tee n son nba gbeen Yennu molor na, son nba tan saa nyi n gbanant ni, nisaarii bonchiann paak, ki Yennu n nyik chab bi biite na. <sup>29</sup> N beerie, n ji kan mi nyu tiloona nyun na, see daar nba ki min nan yimm tan saa lakin nyu li bonpaann, n Baa Yennu naan ni.”

<sup>30</sup> Nanne ki bi yin Yenjiantu yanii, ηaan nyii ki saan Olif Tiinii kunkonn paak.

*Yiisa nba yet a Piita saa noi a u ki miu bianjinba  
(Mak 14.27-31; Luk 22.31-34; Joonn 13.36-38)*



<sup>31</sup> Li yoo na ki Yiisa betib a “Nyiok na, i kura saa tin n̄aan nyikima, kimaan li sob Yennu gboun ni a ‘Yennu tan saa kpi pekpaarik na, ki pei nba ki u tuu kpaarib na saa yat.’ <sup>32</sup> N̄aan mi-i tan̄i fiir kuun ni, li poorpo, n saa liit i t̄oonn ki saan Galilii.”

<sup>33</sup> Ki Piita jiin a, “N Yomdaano, soɔ kur-i lekii tan̄i tin nyika, n̄aan min n̄arin kan mi tin ki nyikaani.”

<sup>34</sup> Ki Yiisa beto a “Barm̄oniie ki n beera na, dinna nyiok na, nan kojosinsinn n tan bui na, ki a noi taar muntaawa a a ki mimi.”

<sup>35</sup> Ki Piita jiin a, “Li-i lekii baar nan min nan fin n lakin kpo gbaa, n kan mi noi nan n ki miani.”

Ki Yiisa poorpoweiteeb na kura mun bia yet nna.

*Yiisa nba miar Yennu nan ninm̄onn bianjinba  
(Mak 14.32-42; Luk 22.39-46)*

<sup>36</sup> N̄anne ki Yiisa nan u poorpoweiteeb saan siaminba ki bi yi Gefsemene na; ki u saa betib a “Ii be nna man, n̄aan ki n saan i t̄oonn po ki saa miar Yennu.” <sup>37</sup> Ki u jii Piita nan Sebedii waas banlee na ki pukin u m̄oŋ po, ki bi saan. Ki u saa la parbiir nan yanȳetuk, <sup>38</sup> ki betib a “Parbibooru nba soorin na per lin kpima. Biat nna man kii nyoi ki pukin n po.”

<sup>39</sup> N̄anne ki u chat saan waaminna bi t̄oonn, ki baa fabin, ki u yugbiar siit tin̄, n̄aan mei Yennu ki yeen a “N Baa, li-i bonni saa fiti, fan n̄aan ki biak nba baat n paak na n yakirin. N̄aan n̄aant ki a loommo n tun, ki li daa tee n loommu.”

<sup>40</sup> Ki u tan n̄mat u poorpoweiteeb bantaa na boor, ki baar soɔ ki bi ḡoont; ki u boi Piita a “I

lek kan fit kii nyoi ki pukin n po yoo waami-i?  
<sup>41</sup> Ii nyoi man njaan kii mei Yennu, ki i tan daa koo jinjammii ni, kimaan i sei narin loon lin tun linba njan, njaan ki i gbanant kaa pañi.”

<sup>42</sup> Ki u din nmat taar munlee ni ki saa mei Yennu ki yeen a “N Baa, li-i tee ki biak nba baat n paak na kan fit yakirin njaan ki n saa dirie, njaant ki a loomm n tun.” <sup>43</sup> Ki u nmat ki saa baar soo ki u poorpoweiteeb na bia goona, kimaan goon din mokib bonchiann.

<sup>44</sup> Ki u bia nmat taar muntaa ni, ki saa mei Yennu ki yeen li bian nan waa bo miar sinsinn na, <sup>45</sup> ki tan nmat baar u poorpoweiteeb man boor ki boib a “I bia lek daa goont ki foi-i? Gotir man, yoo man pera. Bi jii min nisaarik Bik na, ki teen biitdamm nuu niwa. <sup>46</sup> Fiit man, ki tin saan. Gotir man, wunba nyii n poor na pera.”

### *Baa soor Yiisa bianjinba*

*(Mak 14.43-50; Luk 22.47-53; Joonn 18.3-12)*

<sup>47</sup> U mob daa ki baa tin kaawa, ki Judas, wunba tee u poorpoweiteeb na yeno, dokit nan nibur, ki siab dia jukbanjai, ki siab mun dia gbajara, ki nyii mannteeb yudamm nan saakab boor. <sup>48</sup> Judas, wunba nyii u poor na pon daan wann niib man nyinsiare a “Mi-i saki foont wunba ki moot u tankpinn,‡ yii mi nan nooe na, ki yin sooro kenken man.”

<sup>49</sup> Judas nba tan baar yoo nba, li taakpaak ni ki u saan ki saa set Yiisa pen ki yeto a “Wanntoo, a nyiook po,” njaan moot u tankpinn.

---

‡ **26:48** 26.48 Bi binben ni, bi din tee nnae ki want lomm.

<sup>50</sup> Ki Yiisa jiant beto a “N yook, toonbooru nba ki a tun na paaki-i?”

Li yoo na ki niib na ji wuur baar ki tan bib Yiisa. <sup>51</sup> Nanne ki u poorpoweiteeb na ni yeno kakit noot jukbanjiak ki choo pot mannteeb yudaano daabir tubir. <sup>52</sup> Nanne ki Yiisa beto a “Jiint a jukbanjiak man ki noon li took ni, kimaan wunba kon nan juk, u kpenn juk kuume. <sup>53</sup> A ki mi nan n bo saa fit miar n Baa Yennu sommir po, ki u bo saa tun malakanba yama, ki bin gar tusaa piik nan nanlee-e? <sup>54</sup> Naaan mi-i teen nna, nlee ki li saa tun ki gbeen linba sob Yennu gboun ni ki yet a see ki n dii biak nba baat na?”

<sup>55</sup> Nanne ki u boi nibur na a, “I baar nan jukii nan gbajara a i tan soorin nan n tee fat-tooe na-a? N daan tuu be Yenjiantu nasaakak ni daar kura ki want niib Yennu maan, naan ki i tuu ki somi. <sup>56</sup> Naaan linba na kur tun a lin gbeen Yennu sokiniinba nba din sob linba Yennu gboun ni nae.”

Li yoo ki u poorpoweiteeb na kur chyar naan nyiko.

*Bianjinba ki bi jii Yiisa ki baar nana buut boor  
(Mak 14.53-65; Luk 22.54-55, 63-71; Joohn  
18.13-14, 19-24)*

<sup>57</sup> Ki binba soor Yiisa na jiiu ki saan nana mannteeb yudaano Kayafas naak, siaminba ki sennu wantteeb nan tin na ni saakab kar ki guu na. <sup>58</sup> Baa saa nan Yiisa na, ki Piita waa u poorpo banfokira, ki saa baar see mannteeb yudaano man naananyer po, ki tan koo dindoun ni, ki saan kar toontunna na boor, a wun la li joontu.

<sup>59</sup> Ki mannteeb yudamm nan saakab maŋ kur yabir bi mɔŋ paak a bin gbat faak siara damm mɔi ni ki la Yiisa biit ki kpiu. <sup>60</sup> Ki niib bonchiann set dii faak siara u paak, ŋaan kɔŋ u biit. Li poorpo ki jab banlee nyii set ki yet a <sup>61</sup> “Jɔɔ na daan yet a u mɔk yiikoo ki saa fit bet Yenjiantu ŋasaakak na, ŋaan bia jii daa ŋantaa ki maar.”

<sup>62</sup> Ŋanne ki mannteeb yudaano maŋ fiir set, ki boi Yiisa a, “Linba ki jab na piak ki jiin a po na paak tee bee? A ki mɔk li jiinu-u?” <sup>63</sup> Ŋaan ki Yiisa ki jiin siari. Ki mannteeb yudaano maŋ ŋamm boio a, “Betirit Yennu nba fo na paak, fine set tee u Niganntɔɔ Masia ki bia tee u Bija na-a?”

<sup>64</sup> Ki Yiisa jiin a “Nan faa yaa na. Ŋaan n beerie, laa nyii mɔtana ki saa, i tan saa la min nisaarik Bik kar Yabint Yennu niidiitu po, ki bia tan lan ki n be sanpagbana ni ki siik.”

<sup>65</sup> Ŋanne ki mannteeb yudaano maŋ fɔb u mɔŋ liatir ki pat, ŋaan tian a “U yekint u mɔŋ nan Yennu-e. Ki ti ponŋ ji loon siaradamm a ti teen bia? I kura na gbat waa yekint§ u mɔŋ nan Yennu bianbawa. <sup>66</sup> Ki i la nlee?”

Ki bi jiin a “Li tee wun kpoe.”

<sup>67</sup> Li yoo na, ki bi ji siin mɔsant u paak, ki boou, ki siab pebito tanpakii, <sup>68</sup> ŋaan yeen a “Fin Masia, buntir wunba pebita na.”

*Piita nba din nɔi a u ki mi Yiisa bianbwa  
(Mak 14.66-72; Luk 22.56-62; Jɔɔnn 18.15-18,  
25-27)*

---

§ 26:65 26.65 Bi sennu ni, sɔɔ-i yekint u mɔŋ nan Yennu, li tee bin kpiue.

<sup>69</sup> Piita nba kar mannteeb yudaano ŋaadindouŋ ni na, ki ŋaak maŋ ni bonposiak baar u boor ki tan beto a “A mun tuu yoo be nan Yiisa nba nyii Galilii na.”

<sup>70</sup> Ki Piita yet niib maŋ kur boor a “N ki mi faa piak linba na paaki;” <sup>71</sup> ŋaan fiir nyii ki saa be tammob boor. Ki ŋaak maŋ ni bonpoleek bia nyii lau, ki yet binba be leŋ na a “Joo na mun tuu yoo be nan Yiisa nba nyii Nasaref na.”

<sup>72</sup> Ki Piita noi ki por a ŋoo taan ki mi joo maŋi. <sup>73</sup> Ki li yann waaminna ki jab nba see leŋ na nakin ki yet Piita a “A set tee bi ni yenoe, kimaan a maame want.”

<sup>74</sup> Ki Piita por mob a li-i tee ki u faar faakie, Yennu n dat u tubir, a ŋoo ki mi joo maŋi.

Li yoo maŋ ki kojouk bui. <sup>75</sup> Ki Piita ji tiar Yiisa nba bo beto linba na a “Kojouk kan bui kaawa ki a saa noi taar muntaa a a ki mimi.” Ki Piita nyii nanyer po ki saa bui fabin bonchiann.

## 27

### *Baa jii Yiisa ki saan Pailat boor bianinba (Mak 15.1; Luk 23.1-2; Joonn 18.28-32)*

<sup>1</sup> Laa yent sanyapob ni, ki Yennu mannteeb yudamm nan saakab lor baa saa kpi Yiisa bianinba.

<sup>2</sup> Ki bi baano bant ki saan nanao tin yudaano nba ki bi yiu Pailat\* na boor.

### *Bianinba ki Judas kpo (Toona 1.18-19)*

---

\* **27:2** 27.2 Pailat din tee Rom teeb nba nyann Juu teeb na saakayenoe.

<sup>3</sup> Judas, wunba kɔi Yiisa na nba gbat a bi bu joont ki yaa bi saa kpi Yiisa na, ki u par biir bonchiann; ki u jii salimpeena likbina piintaa na ki ŋmat saa jiin tur Yennu mannteeb yudamm nan saakab maŋ, <sup>4</sup> ŋaan yet a “N tun biita, kimaan n kɔi wunba kaa biita.”

Ŋanne ki bi jiin a “Ti baka mun ji be linba na ni-i? Li tee a maame.”

<sup>5</sup> Ki Judas jii likirii na ki lu Yenjiantu ŋasaakak na ni, ŋaan nyii ki saan jɔnn u mɔŋ.

<sup>6</sup> Ŋanne ki mannteeb yudamm tɔkir likirii maŋ ŋaan yet a “Linba na ji tee sɔn likiriie, ki ti sennu nba tee bianjinba na, ti kan fit jii pukin Yenjiantu ŋasaakak likirii ni.” <sup>7</sup> Li paak, ki bi kar dukiin likirii maŋ po, ki tan jii ki saan daa yɔkmaaro tin, a bii pii saamm leŋ. <sup>8</sup> Li paake ki bi yi tin maŋ a “Sɔn Tin” ki tan tuu dinna.

<sup>9</sup> Ki li gbeen Yennu sɔkinii Jeremaya nba din pak linba na a, “Bi jii salimpeena piintaa nba ki Israel tesiab din pa ki li tee u daauk na, <sup>10</sup> ki daa yɔkmaaro tin, nan Yennu nba wannib bianjinba na.”

*Pailat nba bu Yiisa buut bianjinba  
(Mak 15.2-5; Luk 23.3-5; Jɔɔnn 18.33-38)*

<sup>11</sup> Ki Yiisa see tin yudaano Pailat tɔonn; ki Pailat boio a “Fine set tee Juu teeb kpanbar na-a?”

Ki u jiino a “Nan faa yaa na.” <sup>12</sup> Ŋaan mannteeb yudamm nan saakab nba fikisiro na ŋarin, u ki jiimm siari.

<sup>13</sup> Ki Pailat bia boio a “A ki gbia baa piak biira bianjinba maŋi-i?”

14 Njaan Yiisa ki pak siar jiino, ki li ji bakit Pailat bonchiann.

*Pailat nba chab a bin kpi Yiisa bianjinba*  
(Mak 15.6-15; Luk 23.13-25; Joonn 18.39-19.16)

15 Ton, yukitgar tiaru jaamm dinu kur yoo, tin man yudaano tuu nyinn niyenokoe dansarik ni, wunba ki niib na loono, ki naau. 16 Soo din be dansarik ni li yoo, ki u sann yi Barabas, ki niib na miu fanu nan u toona nba tee bianjinba. 17 Baa tan lakin yoo nba, ki Pailat boib a "Nmee ki i loon ki n nyinno dansarik ni ki naau? Barabas koo Yiisa nba ki bi yiu Masia na?" 18 kimaan Pailat mi nan nan paake ki bi soor Yiisa ki teen u nuu ni.

19 Pailat nba daa kar buut kok paak na, ki u naapoo tun toonii ki tan beto a "Nyint a nuu Yennu nipeemo na maan ni, kimaan nyiok n won la daamuk bonchiann n daamiit ni u paak."

20 Ki mannteeb yudamm nan saakab man biir niib na a bin yet Pailat a wun nyinn Barabas njaan kpi Yiisa. 21 Ki Pailat bia namm boib a "Niib banlee na ni, i loon ki n nyinn nmee ki naau?"

Ki bi jiin a "Barabas."

22 Ki Pailat bia namm boib a "Ki Yiisa nba ki bi yiu Masia na narimi, i loon ki n teeno nlee?"

Ki bi kura jiin a "Kpaamo ki tabino dapunpunn paak."

23 Ki Pailat boib a "Bee paake? U biit mantik tee lannpoe?"

Ki bi namm teen fuur sanpaapowa a "Kpaamo tabin dapunpunn paak."

<sup>24</sup> Pailat nba bann nan wuu piak saa, li kaa nyooṭ, ki bia saa baar nan dataar nan moyêtuk na, ki u jii nyun ki wuur wuur u nii, niib na numm ni, ḡaan yet a “N nuu kaa joo nba kaa biit na sɔn nyinnu ni. Li tee i maame.”

<sup>25</sup> Ki niib na jiin a “Nn, u sɔn n jii timm nan ti waas yura paak.”

<sup>26</sup> Nanne ki Pailat nyinn Barabas ki ḡaau, ḡaan te ki bi boo Yiisa kpaasir, ki jiiu tur kunkɔnkɔnna a bin saan kpaau dapunpunn paak.

*Kunkɔnkɔnna na nba din sarikit Yiisa bianinba  
(Mak 15.16-20; Jɔɔnn 19.2-3)*

<sup>27</sup> Ki tin yudaano Pailat kunkɔnkɔnna na jii Yiisa ki koo nana dindouḡ ni, ki bi kunkɔnkɔnleeb na kur tikir ki lintoo. <sup>28</sup> Bi din liat u liant nae, ḡaan jii liatmuḡ nna ki lanno, <sup>29</sup> ki luu kunkonii fokirik ki yirimoo, ki jii patu† ki kubin u niidiitu ni, ki gbaan u tɔonn ki sarikito ki yeen a “Juu teeb bat, ti foonta,” <sup>30</sup> ki piin ki siin moasant u paak, ḡaan gaar patu nba ki bi bo kubino na ki faa u yur paak. <sup>31</sup> Baa tan sarikoo gbenn yoo nba, ki bi liat liatmuḡ na, ḡaan jii u moḡ liant na ki lanno, a bin ji saan ki saa kpaab tabino dapunpunn paak.

*Baa din kpaab Yiisa ki tabino dapunpunn paak  
bianinba*

*(Mak 15.21-32; Luk 23.26-43; Jɔɔnn 19.17-27)*

<sup>32</sup> Baa din saa na, ki bi chet Sairene tin ni jasoo nba ki u sann tee Simonn, ki sooro, ki miau jinno Yiisa kuun dapunpunn na. <sup>33</sup> Baa saa baar siaminba ki bi yi Golgota, ki li paak tee

† **27:29** 27.29 Patu maḡ din see dammir taar niḡe.



“Yukpabuk boor na” <sup>34</sup> ki bi jii daan nba ηmat nan bonkobuk yan‡ ki turɔ a wun nyu; ηaan waa lemm yoo nba, ki u yêṭ nyunu.

<sup>35</sup> Baa kpaau ki tabinɔ dapunpunn paak gbenn yoo nba, ki bi tɔ naatɔɔt ki chent u tiat na, <sup>36</sup> ηaan ji kar leŋ ki guu-u. <sup>37</sup> Bi din sob baa yaa u tun biit nba na, ki tabin u dapunpunn na yur paake. Baa din sob linba na want a “Yiisa nba tee Juu teeb Kpanbar nae na.” <sup>38</sup> Bi mun bia din kpaafat-tee banlee dapunpuna paak leŋ, ki pukin Yiisa po, ki yenɔ be u niidiitu po, ki lɔɔ mun be u niiganj po.

<sup>39</sup> Ki binba somm gaar leŋ na gumii bi yura ki sukiiɔ, <sup>40</sup> ki yeen a “Fin nba yaa a saa fit bet Yenjiantu ηasaakak na ηaan bia jii daa ηantaa ki maar na, fine na, tint a mɔŋ. Li-i tee ki a set tee Yennu Bijae, fan nyi dapunpunn na paak ki sik.”

<sup>41</sup> Nnae biak ki mannteeb yudamm nan sennu wannteeb nan saakab kura mun din sarikitɔ <sup>42</sup> ki yeen a “U tuu tint leebe, ηaan kan fit tinn u mɔŋi. Tɔn, u yaa u tee Israel teeb§ bate, wun sikin u mɔŋ dapunpunn na paak ki tin mantik teenɔ yada. <sup>43</sup> U teen Yennu yadawa, ki yaa u tee Yennu Bijae. Tɔn, li-i tee ki Yennu set loonɔ, ηaant wun tinnɔ mɔtana.”

<sup>44</sup> Ki baa kpaafat-tee nba banlee ki pukin u po na mun bia sarikitɔ nna.

*Yiisa kuun labaar*  
(Mak 15.33-41; Luk 23.44-49; Jɔɔnn 19.28-30)

---

‡ 27:34 27.34 Li pasiar yan diŋit tonte, li pasiar poosiabe din tur linba na. § 27:42 27.42 Juu teeb sanleere tee Israel teeb.

<sup>45</sup> Laa tan baar yonsuuk ni, ki digbann na kur ji bɔnn ki saa tuu yenlekir kut muntaa. <sup>46</sup> Kut muntaa maŋ yooe, ki Yiisa yikin sanpaapowa a “Eli, Eli, lema sabaktani?” Li paak tee a “N Yennu, n Yennu, bee ki a nyikimi?”

<sup>47</sup> Binba see lej na nba gbat u yiini maŋ, ki bi siab beer leeb a, “U yi Elaija-e na.” <sup>48</sup> Ki bi ni yenɔ tin saa jii saapo ki suunt damiituk nna ni, ki jii sakin daauk paak, ki donn turɔ a wun nyu.

<sup>49</sup> Ki u leeb na beerɔ a wun nyikɔ, ki laan Elaija saa baar ki tan tinnɔwa-a?

<sup>50</sup> Ki Yiisa ŋamm yikin sanpaapowa ŋaan ji kpo.

<sup>51</sup> Li yoo na ki chinchenn nba tuu jɔɔn ki puun Yenjiantu ŋasaakak sinsuuk ni na bɔkit li yur paak ki tan sik tin ni; tin din damme, ki tanpiit bɔkit, <sup>52</sup> ki kaat bia loot, ki kpeemm nba din kpo ki tee Yennu niib na bonchiann fiir kuun ni, <sup>53</sup> ki nyii bi kaat ni. Ki Yiisa kuun fiiru poorpo ki bi kɔɔ Jerusalem, ki niib bonchiann lab nan bi ninbina.

<sup>54</sup> Ki kunkɔnkɔnna saakɔɔ nan kunkɔnkɔnna nba pukin u po ki guu Yiisa na nba la tin dammu nan linba kur tun na yoo nba, ki janmaanii soorib bonchiann, ki bi yeen bi leeb a “Barmɔnii, jɔɔ na set tee Yennu Bijae.”

<sup>55</sup> Ki poob nba din tuu waa Yiisa ki nyii Galilii ki sommitɔ na ji wokir see banfɔkira ŋaan gorii linba tuun maŋ. <sup>56</sup> Bi yemme din tee Meeri Magdaliinn, nan Sebedii waas naa, nan Meeri nba din tee Jeems nan Josems naa na.

*Yiisa gbanant piinu labaar*

*(Mak 15.42-47; Luk 23.50-56; Jɔɔnn 19.38-42)*

<sup>57</sup> Ki daajoouk nba tan baar yoo nba, ki Arimatea doo ni mokitsoo baar, ki u sann tee Joosef. U mun bia din tee wunba waa Yiisa-e. <sup>58</sup> Ki u saan yudaano Pailat boor, ki saa miaro a wun chabo ki wun kpaat Yiisa gbanant ki pii. Ki Pailat tur yaak a bin saan jii Yiisa ki turo. <sup>59</sup> Ki Joosef saan ki jii Yiisa gbanant ki pabin katin-yeen ni, <sup>60</sup> ki jiiu saan ki saa piuu u mon mon kapaaun nba ki u din gbiir tanpiiuk lokir ni na, naan birint katangbenir ki biin kamob, naan ji nmat kun. <sup>61</sup> Ki Meeri Magdaliinn nan Meeri loo na kar kpia len, ki took kaauk man.

### *Kunkonkonna nba guu kaauk man bianjinba*

<sup>62</sup> Laa yent sanyiok, daar nba tee namm Juu teeb foon daar na, ki mannteeb yudamm nan Farisiinba saan Pailat boor ki saa beto a <sup>63</sup> “Chanbaa, ti tian nan faak daano man nba daan be na, u daan yet a li-i tee ki u tan kpo, a naan daa nantaa daar u bia saa fiir kuun niwa. <sup>64</sup> Li paak, turin kunkonkonna na mob ki bin saan kii guu u kaauk man bonnann ki saa tuu daa nantaa man daar; li-i kii tee nnai kaa, u poorpoweiteeb tan saa baar ki piitoe, naan yet niib a u fiir kuun nie. Ki kpinkpannii man tan saa gar sinsinn yar na paaka.”

<sup>65</sup> Ki Pailat betib a “Jiin guuteeb man ki bin saan kii guu kaauk man yaa loon bianjinba.”

<sup>66</sup> Ki bi jii guuteeb ki bi saan saa guu kaauk na, naan buun tant ki por kaauk na fanu.

## 28

### *Yiisa kuunfiru labaar*

*(Mak 16.1-10; Luk 24.1-12; Jɔɔnn 20.1-10)*

<sup>1</sup> Ki Juu teeb foon daar na gar, ki lasir daar sanyafaar ki Meeri Magdaliinn nan Meeri loo na nyii saan a bin gon kaauk na. <sup>2</sup> Ton, tin din damm bonchiann, kimaan Yennu malakae nyii sanpaapo sik, ki tan bikit katangbenjir na ki loot kamob, ki nmant kar li paak. <sup>3</sup> Ki u gbanant nyirii nan sanyikintii na, ki u liant peen nan sanpagbounpeeun na. <sup>4</sup> Ki janmaanii soor guuteeb na bonchiann, ki bi ji jekir ki tan baa ki doo doo nan kpeemm na.

<sup>5</sup> Ki malaka na bet poob man a “Yimm daa tiin janmaanii. N mi nan i loon Yiisa nba ki bi daan kpaau dapunpunn paak nae. <sup>6</sup> U kaa nna, u fiir kuun niwa nan waa daan yet bianjinba na. Ii saana man ki tan got waa daan doo siaminba. <sup>7</sup> Ii saa man yian yian, ki saa yet u poorpoweiteeb a u fiir kuun ni ki gar saan Galilii-wa. Lenjewa ki i saa lau. Barmoniie ki n beeri na.”

<sup>8</sup> Ki poob na nyii kaauk man boor ki chiar saan a bin saa bet u poorpoweiteeb; ki janmaanii lek mokib, njan ki bi bia mok parpeenn bonchiann.

<sup>9</sup> Baa din saa na, ki Yiisa chetib sonu ni ki foontib; ki bi gbaan, ki soor u taapant ki jianto.

<sup>10</sup> Ki u betib a “I daa tiin janmaanii; ii saa man ki saa bet n naa waas man a bin saan Galilii; lenjewa ki bi saa lan.”

### *Guuteeb na nba nmat ki saa pak bianjinba*

<sup>11</sup> Poob man nba din saa na, ki guuteeb nba guu kaauk na siab nmat saan doo ni, ki

saa wann mannteeb yudamm na linba teen na kur. <sup>12</sup> Nanne ki mannteeb yudamm maŋ nan saakab na lakin kar ki lor lor; ki tur guuteeb na likirii bonchiann, <sup>13</sup> ŋaan betib a “Ii yet a Yiisa poorpoweiteebe baar tansuunii, yoo nba ki i goont na, ki tan jan piit u gbanant; <sup>14</sup> ŋaan li-i tee ki tiŋ yudaano na gbat nnaie, timm saa dokin i paak u boor ki nyinni.”

<sup>15</sup> Ki guuteeb maŋ gaar likirii na, ŋaan ŋmat ki saa moont, saakab maŋ nba wannib bianjinba na. Ki Juu teeb gaar maan na ki teen barmonii mokmok nan dinna.

*Yiisa nba dokit u poorpoweiteeb paak bianjinba  
(Mak 16.14-18; Luk 24.36-49; Joohn 20.19-23;  
Toona 1.6-8)*

<sup>16</sup> Ki Yiisa poorpoweiteeb piik nan yenokoo na saan Galilii josiar paak, siaminba ki Yiisa din wannib a bin saan na. Ki bi din tan lau lej. <sup>17</sup> Baa lau yoo nba ki bi gbaan ki jianto; ŋaan bi siab din birisowa. <sup>18</sup> Nanne ki u chat nakimm, ŋaan yet a “Yennu turin sanpaak nan tiŋ yent kurawa. <sup>19</sup> Li paak, ii saa man tingbouŋ na ni, nibooru kura boor ki teemm n poorpoweiteeb, ki wurib Yennu nyunwuru, n Baa Yennu maŋ sann ni, nan min u Bija sann ni, nan Seyeen sann ni, <sup>20</sup> ki wannib ki bin sak linba ki n wanni na kur. Naan ii tian man nan n sii be i boor yoo kura mokmok nan durinya gbennu.”

**Yennu Gbouj Moor**  
**Bimoba: Yennu Gbouj Moor Bible**

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 21 Feb 2024 from source  
files dated 29 Jan 2022

00d89ba0-4677-52d9-9bc5-aa3d7c5c966d